

ओं नमः परमात्मने, श्री महागणपतये नमः,

श्री गुरुभ्यो नमः

हरिः ओं

कृष्ण यजुर्वेदीय तैत्तिरीय संहिता

षष्ठं काण्डं

Note: Please refer to the book,TS Kandam 1 for notes and conventions used in this Compilation.

Version Notes:

This is now the current Version 1.1 dated September 30, 2021.

1. This replaces the earlier version 1.0 dated Mar 31, 2020.
2. This version has been updated with the errors found and reported till Sep 30, 2021.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id vedavms@gmail.com

Earlier Versions

1st	Version Number	0.0 dated 30th September 2018
2nd	Version Number	0.0 dated 31st January 2019
3rd	Version Number	1.0 dated 31st March 2020

Contents

6 कृष्ण यजुर्वेदीय तैत्तिरीय संहितायां षष्ठं काण्डं	4
6.1 षष्ठकाण्डे प्रथमः प्रश्नः - सोममन्त्रब्राह्मणनिरूपणं	4
6.2 षष्ठकाण्डे द्वितीयः प्रश्नः - सोममन्त्रब्राह्मणनिरूपणं	38
6.3 षष्ठकाण्डे तृतीयः प्रश्नः - सोममन्त्रब्राह्मणनिरूपणं	65
6.4 षष्ठकाण्डे चतुर्थः प्रश्नः - सोममन्त्रब्राह्मणनिरूपणं	93
6.5 षष्ठकाण्डे पञ्चमः प्रश्नः - सोममन्त्रब्राह्मणनिरूपणं	117
6.6 षष्ठकाण्डे षष्ठः प्रश्नः - सोममन्त्रब्राह्मणनिरूपणं	137

=====

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

6 कृष्ण यजुर्वेदीय तैत्तिरीय संहितायां षष्ठं काण्डं

6.1 षष्ठकाण्डे प्रथमः प्रश्नः – सोममन्त्रब्राह्मणनिरूपणं

TS 6.1.1.1

प्राचीनव॑शं करोति देवमनु॑ष्या दि॒शो व्य॑भजन्त प्राचीं॑ दे॒वा
दक्षि॑णा पि॒तरः प्र॒तीचीं॑ मनु॑ष्या उदी॑चीꣳ रु॒द्रा यत् प्रा॒चीनव॑शं
करोति॑ दे॒वलोक॑मेव तद्-यज॑मान उपा॑वर्तते परि
श्रय॑त्यन्तर्हि॒तोहि॑ दे॒वलो॒को मनु॑ष्यलो॒का-न्नास्मा॑ल्लो॒कात्
स्वे॒तव्य॑मि॒वेत्याहुः॑ को हि तद्-वे॒द यद्य॑मुष्मिँ॑ल्लो॒के ऽस्ति॑ वा
न वेति॑ दि॒क्ष्वती॑का॒शान् करो - [] 1

TS 6.1.1.2

-त्यु॑भयो॑र्लो॒कयो-रभि॑जित्यै के॒शश्म॑श्रु व॑पते न॒खानि॑ नि कृ॑न्तते
मृ॒ता वा ए॒षा त्वग॑मे॒द्ध्यया॑ यत् के॒शश्म॑श्रु मृ॒तामे॒व त्वच॑म-
मे॒द्ध्याम॑प॒हत्य॑ य॒ज्ञियो॑ भू॒त्वा मे॒धमु॑पै॒त्यङ्गि॑रसः सु॒वर्गं॑ लो॒कं
य॑न्तो ऽप्सु दी॒क्षात॑पसी प्रा॒वेश॑यन्न॒प्सु स्ना॑ति सा॒क्षादे॒व दी॒क्षात॑पसी

अव॑ रुन्धे ती॒र्थे स्ना॑ति ती॒र्थे हि ते तां प्रावे॑शयन् ती॒र्थे
स्ना॑ति - [] 2

TS 6.1.1.3

ती॒र्थमे॒व समा॑नानां॑ भवत्य॒पो ऽऽजा॑त्यन्तरत ए॒व मेद्ध्यो॑ भवति
वास॑सा दीक्षयति सौम्यं॑ वै क्षौमं॑ दे॒वतया॑ सोम॒मेष दे॒वता॒मुपै॑ति यो
दीक्ष॑ते सोम॒स्य त॒नूर॑सि त॒नुवं मे पा॑हीत्याह स्वामे॒व दे॒वता॒मुपै॑त्यथो
आ॒शिष॑मे॒वैता॒मा शा॑स्ते ऽग्ने॒स्तूषा॑धानं॑ वा॒योर्वा॑त॒पानं॑ पित॒ृणां
नी॒विरोष॑धीनां प्रघा॒त - [] 3

TS 6.1.1.4

आ॒दि॒त्यानां॑ प्राची॒नता॒नो विश्वे॑षां दे॒वाना॒मोतु॑ नक्ष॒त्राणा॑-
मती॑काशास्तद्-वा ए॒तथ् सर्व॑दे॒वत्यं॑ यद्-वा॒सो यद्-वा॒ससा
दीक्ष॑यति सर्वा॒भिरे॒वैनं॑ दे॒वता॑भिर्दीक्षयति ब॒हिःप्रा॑णो वै म॒नुष्य॑स्त-
स्या॑शनं प्रा॒णो ऽऽजा॑ति स॒प्राण ए॒व दी॑क्षत आ॒शितो॑ भवति
यावा॑ने॒वास्य प्रा॑णस्तेन स॒ह मे॒धमु॑पैति घृ॒तं दे॒वानां॑ मस्तु॑ पित॒ृणां
निष्प॑क्वं म॒नुष्या॑णां तद्-वा - [] 4

TS 6.1.1.5

ए॒त॒थ् स॒र्व॒दे॒व॒त्यं॑ य॒न्न॒व॒नी॒तं॑ य॒न्न॒व॒नी॒ते॒ना॒भ्य॒ङ्के॑ सर्वा॑ ए॒व दे॒वताः॑
 प्री॒णा॒ति प्र॒च्यु॒तो वा ए॒षो॑ऽस्मा॒ल्लो॒का॒द॒गतो॑ दे॒व॒लो॒कं यो॑ दी॒क्षितो॑
 ऽन्त॒रे॒व न॒व॒नी॒तं तस्मा॑-न्न॒व॒नी॒ते॒ना॒भ्य॒ङ्के॑ ऽनु॒लो॒मं य॒जु॒षा व्या॒वृ॒त्या
 इ॒न्द्रो वृ॒त्र॒म॒ह॒न् तस्य॑ क॒नी॒नि॒का॒ परा॑ ऽप॒तत् तदा॑ञ्ज॒न-म॒भ॒वद्-यदा॑ङ्के
 चक्षु॑रे॒व भ्रा॒तृ॒व्य॒स्य वृ॒ङ्के दक्षि॑णं॒ पूर्॒व॒मा ऽङ्के॑ - [] 5

TS 6.1.1.6

स॒व्य॑ हि पूर्॒वं म॒नु॒ष्या आ॒ञ्ज॒ते न नि॑ धा॒व॒ते नी॒व हि म॒नु॒ष्या
 धा॒व॒न्ते प॒ञ्च कृ॒त्व आ ऽङ्के॑ प॒ञ्चाक्ष॑रा प॒ङ्क्तिः पा॒ङ्क्तो य॒ज्ञो य॒ज्ञ॒मे॒वा॒व
 रु॒न्धे परि॑मित॒मा ऽङ्के॑ ऽप॒रि॒मित॑ हि म॒नु॒ष्या आ॒ञ्ज॒ते स॒तू॒ल॒या ऽऽ *ङ्के॑
 ऽप॒तू॒ल॒या हि म॒नु॒ष्या आ॒ञ्ज॒ते व्या॒वृ॒त्यै यद॑प॒तू॒ल॒याञ्जी॒त व॒ज्र इ॒व
 स्या॒थ् स॒तू॒ल॒या ऽऽ *ङ्के॑ मि॒त्र॒त्वा॒ये - [] 6

TS 6.1.1.7

-न्द्रो॑ वृ॒त्र॒म॒ह॒न्त्सो॑ऽ(१)पो॑ऽ(१)भ्य॒म्रि॒य॒त ता॒सां य॒न्मे॒द्ध्यं॑ य॒ज्ञि॒य॑
 स॒दे॒व॒मा॒सीत् तद॑पो॒द॒क्राम॑त् ते द॒र्भा अ॒भ॒वन् यद्-द॑र्भ॒पु॒ञ्जी॒लैः
 प॒व॒य॒ति या॑ ए॒व मे॒द्ध्य॑ा य॒ज्ञि॒याः स॒दे॒वा आ॒प॒स्ता॒भिरे॒वैनं॑ प॒व॒य॒ति

द्वाभ्यां॑ पवयत्य-होरात्राभ्यामे॑वैनं॑ पवयति त्रिभिः॑ पवयति त्रय॑ इमे
लोका॑ एभिरे॑वैनं॑ लोकैः॑ पवयति पञ्चभिः॑ - [] 7

TS 6.1.1.8

पवयति॑ पञ्चाक्षरा॑ पङ्क्तिः॑ पाङ्क्तो॑ यज्ञो॑ यज्ञायै॑वैनं॑ पवयति षड्भिः॑
पवयति॑ षड् वा ऋतव॑ ऋतुभिरे॑वैनं॑ पवयति सप्तभिः॑ पवयति सप्त
छन्दा॑सि॒ छन्दोभिरे॑वैनं॑ पवयति नवभिः॑ पवयति नव॑ वै पुरुषे॑ प्राणाः
सप्राणमे॑वैनं॑ पवयत्येकविंशत्या॑ पवयति दश॑ हस्त्या अङ्गुलयो॑
दश॑ पद्या॑ आत्मैकविंशो॑ यावानेव॑ पुरुषस्तमपरिवर्गं॑ - [] 8

TS 6.1.1.9

पवयति॑ चित्पतिस्त्वा पुना॑त्वित्याह॑ मनो॑ वै चित्पतिर्मनसै॑वैनं॑
पवयति॑ वाक्पतिस्त्वा पुना॑त्वित्याह॑ वाचै॑वैनं॑ पवयति देवस्त्वा सविता॑
पुना॑त्वित्याह॑ सवितृप्रसूत॑ ए॒वैनं॑ पवयति तस्य॑ ते पवित्रपते॑ पवित्रेण॑
यस्मै॑ कं पुने॑ तच्छकेयमित्याहाऽऽशिष-मे॑वैतामाशास्ते ॥ 9

(अतीकाशान् करोत्य - वेशयन् तीर्थे स्नाति - प्रघातो -

मनुष्याणां तद्वा - आऽङ्गै - मित्रत्वाय - पञ्चभि - रपरिवर्ग -

मष्टाचत्वारिंशच्च) (A1)

TS 6.1.2.1

यावन्तो वै देवा यज्ञायापुनत त एवाभवन्. य एवं विद्वान्. यज्ञाय
 पुनीते भवत्येव बहिः पवयित्वाऽन्तः प्र पादयति मनुष्यलोक
 एवैनं पवयित्वा पूतं देवलोकं प्र णयत्यदीक्षित एकया ऽऽहुत्येत्याहुः
 स्रुवेण चतस्रो जुहोति दीक्षितत्वाय स्रुचा पञ्चमीं पञ्चाक्षरा पङ्क्तिः
 पाङ्क्तो यज्ञो यज्ञमेवाव रुन्ध आकूत्यै प्रयुजे ऽग्नये - [] 10

TS 6.1.2.2

स्वाहेत्याहा ऽऽकूत्या हि पुरुषो यज्ञमभि प्रयुङ्क्ते यजेयेति मेधायै
 मनसे ऽग्नये स्वाहेत्याह मेधया हि मनसा पुरुषो यज्ञमभिगच्छति
 सरस्वत्यै पूषो ऽग्नये स्वाहेत्याह वाग्वै सरस्वती पृथिवी पूषा वाचैव
 पृथिव्या यज्ञं प्र युङ्क्त आपो देवी-र्बृहती-विश्वशंभुव इत्याह या वै
 वर्ष्यास्ता - [] 11

TS 6.1.2.3

आपो देवी-र्बृहती-विश्वशंभुवो यदेतद्-यजुर्न ब्रूयाद्-दिव्या
 आपो ऽशान्ता इमं लोकमा गच्छेयुरापो देवी-र्बृहती-विश्वशंभुव
 इत्याहास्मा एवैना लोकाय शमयति तस्माच्छान्ता इमं लोकमा

गच्छन्ति द्यावापृथिवी इत्याह द्यावापृथिव्योर्. हि यज्ञ उर्वन्तरिक्ष-
मित्याहान्तरिक्षे हि यज्ञो बृहस्पतिर्नो हविषा वृधात्वि - [] 12

TS 6.1.2.4

-त्याह ब्रह्म वै देवानां बृहस्पति-ब्रह्मणैवास्मै यज्ञमव रुन्धे यद्-
ब्रूयाद्-विधेरिति यज्ञस्थाणुमृच्छेद्-वृधात्वित्याह यज्ञस्थाणुमेव
परि वृणक्ति प्रजापति-यज्ञमसृजत सो ऽस्मात् सृष्टः पराडैथ् स
प्र यजुरल्लीनात् प्र साम त-मृगुदयच्छद्-यदृगुदयच्छत्
त-दौद्ग्रहणस्यौद्ग्रहणत्व-मृचा - [] 13

TS 6.1.2.5

जुहोति यज्ञस्योद्यत्या अनुष्टुप्-छन्दसा-मुदयच्छदित्या-
हुस्तस्मादनुष्टुभा जुहोति यज्ञस्योद्यत्यै द्वादश वाथ्सबन्धान्युदयच्छ-
न्नित्याहु-स्तस्माद्-द्वादशभि-र्वाथ्सबन्धविदो दीक्षयन्ति सा वा
एषर्गनुष्टुग्-वागनुष्टुग्-यदेतयर्चा दीक्षयति वाचैवैनꣳ सर्वया दीक्षयति
विश्वे देवस्य नेतुरित्याह सावित्र्येतेन मर्तो वृणीत सख्य - [] 14

TS 6.1.3.1

ऋ॒ख्॒सामे॑ वै दे॒वेभ्यो॑ य॒ज्ञायाऽति॑ष्ठ॒माने॒ कृष्णो॑ रू॒पं कृ॒त्वा-
 ऽप॒क्रम्या॑तिष्ठ॒तां ते॑ ऽम॒न्यन्त॒ यं वा॑ इ॒मे उ॒पाव॑थ्स्य॒तः स इ॒दं
 भ॒विष्य॑तीति॒ ते उ॒पा॒मन्त्र॑यन्त॒ ते अ॒हो॒रात्र॑यो-र्म॒हि॒मान॑-म॒प॒नि॒धाय॑
 दे॒वानु॑पाव॒र्तेता॑मेष॒ वा ऋ॒चो व॒र्णो य॑च्छु॒क्लं कृ॑ष्णाजि॒नस्यै॑ष सा॒म्नो
 यत् कृ॑ष्ण-मृ॒ख्॒साम॑योः शिल्पे॑ स्थ इ॒त्याह॑ख्॒सामे॑ ए॒वाव

रुन्ध एष - [] 17

TS 6.1.3.2

वा अ॒हो व॒र्णो य॑च्छु॒क्लं कृ॑ष्णाजि॒नस्यै॑ष रा॒त्रिया॑ यत् कृ॒ष्णं
 य॒दे॒वैन॑योस्तत्र॒ न्यक्तं॑ तदे॒वाव॑ रुन्धे कृ॒ष्णाजि॒नेन॑ दीक्षयति
 ब्र॒ह्म॒णो वा ए॒तद्-रू॒पं यत् कृ॑ष्णाजि॒नं ब्र॒ह्म॒णैवैनं॑ दीक्षयती॒मां
 धिय॑श्च॒ शिक्ष॑माणस्य॒ दे॒वेत्या॑ह यथा॒य॒जुरे॒वैतद्-ग॒र्भो वा ए॒ष
 यद्-दी॒क्षित॑ उ॒ल्बं वा॒सः प्रो॑र्णु॒ते तस्मा॑द् - [] 18

TS 6.1.3.3

ग॒र्भाः प्रा॑वृ॒ता जा॑यन्ते॒ न पु॒रा सो॑मस्य॒ क्रया॑दपो॒र्णीत॑ यत् पु॒रा
 सो॑मस्य॒ क्रया॑दपो॒र्णीत॑ ग॒र्भाः प्र॒जानां॑ परा॒पातु॑काः स्युः क्री॒ते

सो॒मे ऽपो॑र्णु॒ते जा॒यत॑ ए॒व तद॑थो॒ यथा॑ व॒सीया॑ऽसं प्र॒त्यपो॑र्णु॒ते
तादृ॑गे॒व तदङ्गि॑रसः सु॒वर्गं॑ लो॒कं य॑न्त ऊ॒र्जं व्य॑भजन्त
ततो॑ यद॒त्यशि॑ष्यत॒ ते श॒रा अ॑भवन्नु॒र्वै श॒रा य॑च्छ॒रमयी॑ – [] 19

TS 6.1.3.4

मे॒खला॑ भ॒वत्यूर्ज॑मे॒वाव रु॑न्धे म॒द्ध्यतः॑ सं न॒ह्यति॑ म॒द्ध्यत॑ ए॒वास्मा॑
ऊ॒र्जं द॑धाति॒ तस्मान्म॑द्ध्यत॒ ऊर्जा॑ भु॒ञ्जत॑ ऊ॒र्ध्वं वै पु॑रुषस्य
नाभ्यै॑ मे॒द्ध्य-म॒वाची॑न-म॒मेद्ध्यं॑ य॒न्मद्ध्य॑तः स॒न्नह्य॑ति॒ मेद्ध्यं॑
चै॒वास्या॑मे॒द्ध्यं च॑ व्या॒वर्त॑यतीन्द्रो॒ वृ॒त्राय॑ व॒ज्रं प्रा॑हरथ् स॒ त्रेधा॑
व्य॒भव॑थ् स्फ्यस्तृ॒तीयं॑ रथस्तृ॒तीयं॑ यूपस्तृ॒तीयं॑ – [] 20

TS 6.1.3.5

यै॑ ऽन्तःश॒रा अ॑शीर्यन्त॒ ते श॒रा अ॑भवन् तच्छ॒राणां॑ श॒रत्वं
व॒ज्रो वै श॒राः क्षु॑त् खलु॒ वै म॑नुष्यस्य॒ भ्रातृ॑व्यो॒ यच्छ॒रमयी॑
मे॒खला॑ भ॒वति॑ व॒ज्रेणै॑व सा॒क्षात् क्षु॑धं॒ भ्रातृ॑व्यं म॒द्ध्यतो॑ ऽप॒ हते॑
त्रि॒वृद्-भ॑वति॒ त्रि॒वृद्-वै प्रा॑णस्त्रि॒वृत॑मे॒व प्रा॑णं म॒द्ध्यतो॑ यज॒माने॑
द॑धाति॒ पृ॒थ्वी भ॑वति॒ रज्जू॑नां॒ व्या॑वृ॒त्यै मे॑खलया॒ यज॑मानं दी॒क्षय॑ति
यो॒क्त्रेण॑ प॒त्नीं मि॑थु॒नत्वाय॑ – [] 21

TS 6.1.3.6

य॒ज्ञो दक्षि॑णाम॒भ्यद्ध्या॑यत् ता॒ꣳ सम॑भवत् तदिन्द्रो ऽचा॒यथ्
सो ऽम॒न्यत॑ यो वा इ॒तो ज॑निष्यते स इ॒दं भ॑विष्यतीति तां प्रावि॒शत्
तस्या॒ इन्द्र॑ ए॒वाजा॑यत सो ऽम॒न्यत॑ यो वै म॒दितो॑ ऽपरो ज॑निष्यते
स इ॒दं भ॑विष्यतीति तस्या॑ अ॒नुमृ॑श्य यो॒निमा॑ ऽच्छि॒नथ् सा
सू॒तव॑शा ऽभवत् तथ् सू॒तव॑शायै ज॒न्म - [] 22

TS 6.1.3.7

ता॒ꣳ ह॒स्ते न्य॑वेष्टयत तां मृ॒गेषु॑ न्यदधाथ् सा कृ॑ष्णविषाणा-
ऽभव॑दिन्द्रस्य यो॒निर॑सि मा मा हि॒ꣳसी॑रिति कृ॑ष्णविषाणां प्र यच्छति
सयो॑निमेव य॒ज्ञं क॑रोति सयो॑निं दक्षि॑णाꣳ सयो॑निमिन्द्रꣳ
सयो॑नित्वाय कृ॒ष्यै त्वा सु॑स॒स्याया॒ इत्या॑ह तस्मा॑दकृ॑ष्टप॒च्या ओ॑षधयः
पच्य॑न्ते सु॒पिप्प॒लाभ्य॑स्त्वौष॒धीभ्य॑ इत्या॑ह तस्मा॑दोष॒धयः॑ फलं
गृह्ण॑न्ति यद्ध॒स्तेन॑ - [] 23

TS 6.1.3.8

कण्डू॑येत पा॒मन॑म्भावु॒काः प्र॒जाः स्यु॑र्यथ् स्म॒येत॑ न॒ग्नं भा॑वु॒काः
कृ॑ष्णविषा॒णया॑ कण्डू॑यतेऽपि॒गृह्य॑ स्म॒यते॑ प्र॒जानां॑ गोपी॒थाय॑ न पु॒रा

दक्षिणाभ्यो॑ नेतोः॑ कृष्णविषाणामव॑ चृतेद्-यत् पुरा॑ दक्षिणाभ्यो॑ नेतोः॑
 कृष्णविषाणामव॑ चृतेद्-योनिः॑ प्रजानां॑ परापातु॑का स्यान्नीतासु॑
 दक्षिणासु॑ चात्वाले॑ कृष्णविषाणां॑ प्रास्यति॑ योनिर्वै॑ यज्ञस्य॑ चात्वालं॑
 योनिः॑ कृष्णविषाणा॑ योनावेव॑ योनिं॑ दधाति॑ यज्ञस्य॑
 सयो॒नित्वाय॑ ॥ 24 (रुन्ध॑ एष - तस्मा॑ - च्छर॑मयी - यूप॑स्तृतीयं
 - मिथु॑नत्वाय - जन्म॑ - हस्ते॑ना - षाच॑त्वारिंशच्च) (A3)

TS 6.1.4.1

वाग्वै॑ देवेभ्यो॑ ऽपाक्रामद्-यज्ञायातिष्ठ॑माना सा वनस्पतीन् प्राविश॑त्
 सैषा वाग्वनस्पतिषु॑ वदति॑ या दुन्दु॑भौ या तूणवे॑ या वीणायां॑
 यद्-दीक्षितदण्डं॑ प्रयच्छति॑ वाचमेवाव॑ रुन्ध॑ औदु॑ंबरो भवत्यूर्वा
 उदु॑ंबर ऊर्जमेवाव॑ रुन्धे॑ मुखेन॑ सम्मितो॑ भवति॑ मुखत॑ एवास्मा॑
 ऊर्जं॑ दधाति॑ तस्मान् मुखत॑ ऊर्जा॑ भुञ्जते - [] 25

TS 6.1.4.2

क्रीते॑ सोमे॑ मैत्रावरुणाय॑ दण्डं॑ प्र यच्छति॑ मैत्रावरुणो॑ हि पुरस्ता-
 दृत्विग्भ्यो॑ वाचं॑ विभजति॑ तामृत्विजो॑ यजमाने॑ प्रति॑ षापयन्ति॑ स्वाहा॑
 यज्ञं॑ मनसेत्याह॑ मनसा॑ हि पुरुषो॑ यज्ञमभिगच्छति॑ स्वाहा॑

द्यावा॑पृथि॒वीभ्या॑ -मि॒त्याह॑ द्यावा॑पृथि॒व्योर्. हि य॒ज्ञः स्वा॒होरोर॑-
 न्तरि॑क्षादि॒त्याहा॑न्तरि॑क्षे हि य॒ज्ञः स्वाहा॑ य॒ज्ञं वा॒तादा॑ रभ
 इत्या॑हायं - [] 26

TS 6.1.4.3

ँवाव॑ यः पव॑ते स य॒ज्ञस्तमे॒व सा॒क्षादा॑ रभते॒ मुष्टी॑ करोति॒ वाचं॑
 ँच्छ॑ति य॒ज्ञस्य॑ धृ॒त्या अदी॑क्षि॒ष्टायं॑ ब्रा॒ह्मण॑ इति॒ त्रिरु॑पा॒श्वाह॑
 दे॒वेभ्य॑ ए॒वैनं॑ प्रा॒ऽऽह॑ त्रि॒रुच्चै॑रु॒भये॑भ्य ए॒वैनं॑ दे॒वमनु॑ष्ये॒भ्यः
 प्रा॒ऽऽह॑ न पु॒रा नक्ष॑त्रेभ्यो॒ वाचं॑ ँ॒वि सृ॑जेद्-यत्पु॒रा नक्ष॑त्रेभ्यो
 वाचं॑ ँ॒विसृ॑जेद्-य॒ज्ञं ँ॒वि च्छि॑न्द्या - [] 27

TS 6.1.4.4

-दु॒दितेषु॑ नक्ष॑त्रेषु॒ व्रतं॑ कृ॒णुते॑ति॒ वाचं॑ ँ॒वि सृ॑जति॒ यज्ञ॑व्रतो॒ वै
 दी॑क्षि॒तो य॒ज्ञमे॒वाभि॑ वाचं॑ ँ॒वि सृ॑जति॒ यदि॑ वि॒सृजे॑द्-वै॒ष्णवी॑मृ॒चमनु॑
 ब्रू॒याद्-य॒ज्ञो वै वि॑ष्णु॒र्यज्ञे॑नै॒व य॒ज्ञं सं॑ त॒नोति॑ दै॒वीं धि॑यं म॒नाम॑ह
 इत्या॑ह य॒ज्ञमे॒व तन्म्र॑दयति॒ सुपा॑रा नो॒ अस॑द्-व॒श इत्या॑ह व्यु॒ष्टिमे॒वाव॑
 रुन्धे॑ - [] 28

TS 6.1.4.5

ब्रह्मवादि॑नो॒ वदन्ति॑ हो॒तव्यं॑ दी॒क्षित॑स्य॒ गृहा॑(३) इ॒ न हो॑तव्या(३)मि॒ति
हवि॑र्वै दी॒क्षितो॑ यज्जु॒हुयाद्-यज॑मानस्याव॒दाय॑ जुहु॒याद्-यन्न
जुहु॒याद्-यज्ञ॑परु॒रन्तरि॑याद्-ये दे॒वा म॑नोजा॒ता म॑नो॒युज॑ इत्याह प्रा॒णा
वै दे॒वा म॑नोजा॒ता म॑नो॒युज॑स्तेष्वे॒व प॑रोक्षं जुहोति॒ तन्ने॑व हु॒तं
नेवाहु॑त॒ स्वप॑न्तं वै दी॒क्षित॑ रक्षा॒सि जिघा॑सन्त्यग्निः- [] 29

TS 6.1.4.6

खलु॑ वै रक्षो॒हा ऽग्ने॑ त्व॒ सु जा॑गृहि व॒ य सु॑ मन्दिषीम॒हीत्या॑हाग्नि-
मेवाधि॑पां कृ॒त्वा स्व॑पिति॒ रक्ष॑सामप॒हत्या॑ अ॒व्रत्य॑मि॒व वा ए॒ष करो॑ति
यो दी॒क्षितः॑ स्व॑पिति॒ त्वम॑ग्ने व्र॒तपा॑ अ॒सीत्या॑हाग्निर्वै दे॒वानां॑ व्र॒तप॑तिः
स ए॒वैनं॑ व्र॒तमा॑ लं॒भय॑ति दे॒व आ॑ म॒र्त्येष्वे॑त्याह दे॒वो - [] 30

TS 6.1.4.7

ह्येष॑ सन् म॒र्त्येषु॑ त्वं य॒ज्ञेष्वि॑ड्य॒ इत्या॑है॒त हि॑ य॒ज्ञेष्वि॑डते ऽप
वै दी॒क्षिता॑थ् सु॒षुपु॑ष इन्द्रि॒यं दे॒वताः॑ क्रामन्ति॒ विश्वे॑ दे॒वा अ॒भि
मा॒माऽव॑वृ॒त्र-न्नित्या॑-हेन्द्रि॒येणै॑वैनं दे॒वता॑भिः सं न॒यति॑ यदे॒तद्-यजु॑र्न

ब्रूयाद्-यावत् एव पशूनभि दीक्षेत तावन्तो ऽस्य पशवः स्यू
रास्वेयथ् - [] 31

TS 6.1.4.8

सोमा ऽऽ भूयो भरेत्याहा-परिमितानेव पशूनव रुन्धे चन्द्रमसि
मम भोगाय भवेत्याह यथादेवत-मेवैनाः प्रति गृह्णाति वायवे
त्वा वरुणाय त्वेति यदेवमेता नानुदिशेदयथादेवतं दक्षिणा
गमयेदा देवताभ्यो वृश्च्येत यदेवमेता अनुदिशति यथादेवतमेव
दक्षिणा गमयति न देवताभ्य आ - [] 32

TS 6.1.4.9

वृश्च्यते देवीरापो अपां नपादित्याह यद्-वो मेद्ध्यं यज्ञियञ्
सदेवं तद्-वो माऽव क्रमिषमिति वावैतदाहाच्छिन्नं तन्तुं पृथिव्या
अनु गेषमित्याह सेतुमेव कृत्वा ऽत्येति ॥ 33

(भुञ्जते - ऽयं - छिन्दाद् - रुन्धे - ऽग्नि - राह देव - इयद्
- देवताभ्य आ - त्रयस्त्रिञ्शच्च) (A4)

TS 6.1.5.1

दे॒वा वै दे॒व॒य॒जन॑-म॒द्ध्य॒व॒साय॑ दि॒शो न प्रा॒जा॒नन् ते॑(१) ऽन्यो॑-
 ऽन्य॑मुपा॒धावन् त्वया॑ प्र जा॒नाम॑ त्वयेति॒ ते ऽदि॒त्याꣳ सम॑दि॒ध्रय॑न्त
 त्वया॑ प्र जा॒नामेति॑ सा ऽब्र॑वीद्-वरं॑ वृ॒णै मत्प्रा॑यणा ए॒व वो य॒ज्ञा
 म॒दु॒दय॑ना अ॒सन्निति॑ तस्मा॒दादि॒त्यः प्रा॑यणी॒यो य॒ज्ञाना॑मादि॒त्य
 उ॒दय॑नी॒यः पञ्च॑ दे॒वता॑ य॒जति॑ पञ्च॒ दि॒शो दि॒शां

॥
 प्र॒ज्ञा॒त्या - [] 34

TS 6.1.5.2

अथो॑ पञ्चा॒क्षरा॑ प॒ङ्क्तिः॑ पा॒ङ्क्तो य॒ज्ञो य॒ज्ञमे॒वाव रु॑न्धे पथ्याꣳ
 स्व॒स्तिम॑य॒जन् प्रा॒चीमे॒व तया॑ दि॒शं प्रा॒जा॒नन्न॒ग्निना॑ दक्षि॒णा
 सो॒मेन॑ प्र॒तीचीꣳ स॒वि॒त्रोदी॑ची-म॒दि॒त्योर्द॒ध्वां पथ्याꣳ स्व॒स्तिं
 य॑जति॒ प्रा॒चीमे॒व तया॑ दि॒शं प्र जा॑नाति॒ पथ्याꣳ
 स्व॒स्तिमि॑ष्ट्वाऽग्नी॒षोमौ॑ य॒जति॑ चक्षु॒षी वा ए॒ते य॒ज्ञस्य॑
 य॒दग्नी॑षोमौ॒ ताभ्या॑मे॒वानु॑ पश्य - [] 35

TS 6.1.5.3

–त्यग्नीषोमाविष्ट्वा सवितारं यजति सवितृप्रसूत एवानु पश्यति
 सवितारमिष्ट्वाऽदितिं यजतीयं वा अदितिरस्यामेव प्रतिष्ठायानु
 पश्यत्यदितिमिष्ट्वा मारुतीमृचमन्वाह मरुतो वै देवानां विशो
 देवविशं खलु वै कल्पमानं मनुष्यविशमनु कल्पते यन्
 मारुतीमृचमन्वाह विशां क्लृप्त्यै ब्रह्मवादिनो वदन्ति
 प्रयाजवदननूयाजं प्रायणीयं कार्यं-मनूयाजव – [] 36

TS 6.1.5.4

दप्रयाज-मुदयनीयमितीमे वै प्रयाजा अमी अनूयाजाः सैव सा
 यज्ञस्य सन्ततिस्तत् तथा न कार्यमात्मा वै प्रयाजाः प्रजाऽनूयाजा
 यत् प्रयाजा-नन्तरियादात्मान-मन्तरियाद्-यदनूयाजा-नन्तरियात्
 प्रजामन्तरियाद्-यतः खलु वै यज्ञस्य विततस्य न क्रियते तदनु
 यज्ञः परा भवति यज्ञं पराभवन्तं यजमानोऽनु – [] 37

TS 6.1.5.5

परा भवति प्रयाजवदेवा-नूयाजवत् प्रायणीयं कार्यं
 प्रयाजवदननूयाजव-दुदयनीयं नाऽऽत्मानमन्तरेति न प्रजां न

य॒ज्ञः॑ प॒रा॒भ॒व॒ति॒ न॒ य॒ज॒मा॒नः॑ प्रा॒य॒णी॒य॒स्य॑ निष्का॒स उ॒द॒य॒नी॒य॒म॒भि
नि॒र्व॒प॒ति॒ सै॒व सा॒ य॒ज्ञ॒स्य॑ स॒न्त॒ति॒र्याः॑ प्रा॒य॒णी॒य॒स्य॑ या॒ज्या॑ यत्
ता उ॒द॒य॒नी॒य॒स्य॑ या॒ज्याः॑ कुर्यात् प॒रा॒ङ्मुं॑ लो॒क॒मा रो॒हेत् प्र॒मा॒यु॒कः
स्याद्-याः॑ प्रा॒य॒णी॒य॒स्य॑ पु॒रो॒नु॒वा॒क्या॑स्ता () उ॒द॒य॒नी॒य॒स्य॑ या॒ज्याः॑
करो॒त्य॒स्मि॒न्ने॒व लो॒के प्र॒ति ति॒ष्ठति॑ ॥ 38

(प्र॒जा॒त्यै - प॒श्य॒त्य - नू॒या॒ज॒व - द्य॒ज॒मा॒नोऽनु॑ - पु॒रो॒नु॒वा॒क्या॑स्ता
- अ॒ष्टौ च) (A5)

TS 6.1.6.1

क॒द्रूश्च॑ वै सु॒पर्णी॑ चाऽऽत्म॒रूप॑यो-र॒स्प॒र्ध॒धे॒ताꣳ सा क॒द्रूः
सु॒पर्णी॑म॒ज॒य॒थ् सा ऽब्र॑वीत् तृ॒ती॒य॒स्या॒मि॒तो दि॒वि सो॒म॒स्त॒मा ह॒र
ते॒नाऽऽत्मा॑नं निष्क्री॒णी॒ष्वे॒ती॒यं वै क॒द्रू॒रसौ॑ सु॒पर्णी॑ छ॒न्दाꣳसि
सौ॒पर्णे॒याः सा ऽब्र॑वीद॒स्मै वै पि॒तरौ॑ पु॒त्रान् बि॒भृत॑-स्तृ॒ती॒य॒स्या॒मि॒तो
दि॒वि सो॒म॒स्त॒मा ह॒र ते॒नाऽऽत्मा॑नं नि ष्क्री॒णी॒ष्वे - [] 39

TS 6.1.6.2

ति मा क॒द्रू॒रवो॑च॒दिति॑ ज॒ग॒त्यु॑द॒प॒त-च्च॑तु॒र्द॒शा॒क्ष॒रा स॒ती सा ऽप्रा॑प्य
न्य॒व॒र्त॒त त॒स्यै॑ द्वे अ॒क्ष॒रे अ॒मी॒ये॒ताꣳ सा प॒शु॑भिश्च दी॒क्ष॒या

चाऽऽ *गच्छत् तस्माज्जगती छन्दसां पशव्यतमा तस्मात् पशुमन्तं
दीक्षोप नमति त्रिष्टुगुदपतत् त्रयोदशाक्षरा सती सा ऽप्राप्य
न्यवर्तत तस्यै द्वे अक्षरे अमीयेताञ् सा दक्षिणाभिश्च - [] 40

TS 6.1.6.3

तपसा चाऽगच्छत् तस्मात् त्रिष्टुभो लोके माद्ध्यन्दिने सवने दक्षिणा
नीयन्त एतत् खलु वाव तप इत्याहुर्यः स्वं ददातीति
गायत्र्युदपतच्चतुरक्षरा सत्यजया ज्योतिषा तमस्या अजा ऽभ्यरुन्ध
तदजाया अजत्वञ् सा सोमं चाऽऽ *हरच्चत्वारि चाक्षराणि
सा ऽष्टाक्षरा स-मपद्यत ब्रह्मवादिनो वदन्ति - [] 41

TS 6.1.6.4

कस्मात् सत्याद्-गायत्री कनिष्ठा छन्दसाञ् सती यज्ञमुखं परीयायेति
यदेवादः सोममा ऽहरत् तस्माद्-यज्ञमुखं पर्येत् तस्मात् तेजस्विनीतमा
पद्भ्यां द्वे सवने समगृह्णान् मुखेनैकं यन्मुखेन समगृह्णात्
तदधयत् तस्माद् द्वे सवने शुक्रवती प्रातस्सवनं च माद्ध्यन्दिनं

च॒ तस्मात्॑ तृतीयसवन॑ ऋ॒जी॒षम॑भि॒ षु॒ण्वन्ति॑ धी॒तमि॒व हि॑
मन्यन्त॑ - [] 42

TS 6.1.6.5

आ॒शिर॒मव॑ नयति॑ स॒शु॒क्र॒त्वाया॑थो॒ सं भ॑रत्ये॒वैन॑त् त॒
सोम॑-मा॒ह्निय॑माणं॒ गन्ध॑र्वो॒ विश्वा॑व॒सुः॒ पर्य॑मु॒ष्णाथ् स॑ ति॒स्रो रा॒त्रीः
परि॑मु॒षितो॑ ऽव॒सत् तस्मात्॑ ति॒स्रो रा॒त्रीः॑ क्री॒तः सोमो॑ वसति॒ ते दे॒वा
अ॒ब्रु॒वन्थ् स्त्री॑कामा॒ वै गन्ध॑र्वा॒ स्त्रि॒त्रया॑ नि॒ ष्क्री॑णामेति॒ ते वाच॑
स्त्रि॒यमे॑कहायनीं॒ कृ॒त्वा तया॑ नि-र॒क्री॑णन्थ् सा रोहि॒द्-रूपं॑ कृ॒त्वा
गन्ध॑र्वेभ्यो- [] 43

TS 6.1.6.6

ऽप॒क्रम्या॑तिष्ठत् तद्-रोहि॒तो जन्म॑ ते दे॒वा अ॒ब्रु॒वन्नप॑ यु॒ष्मद॑क्री॒मी-
न्नास्मानु॑-पाव॒र्तते॑ वि॒ ह्वया॑महा॒ इति॑ ब्र॒ह्म गन्ध॑र्वा॒ अव॑दन्नगायन् दे॒वाः
सा दे॒वान् गाय॑त उ॒पाव॑र्तत॒ तस्माद्-गाय॑न्त॒ स्त्रि॒यः काम॑यन्ते
कामु॑का ए॒न॒ स्त्रियो॑ भवन्ति॒ य एवं॑ वे॒दाथो॑ य एवं॑ वि॒द्वानपि॑
ज॒न्येषु॑ भवति॒ तेभ्य॑ ए॒व द॑दत्यु॒त यद्-ब॒हुतया॑ - [] 44

TS 6.1.6.7

भवन्त्येकहायन्या क्रीणाति वाचैवैनं॑ सर्वया क्रीणाति तस्मादेकहायना
मनुष्या वाचं॑ वदन्त्यकूटया ऽकर्णया ऽकाणया ऽश्लोणया ऽसप्तशफया
क्रीणाति सर्वयैवैनं॑ क्रीणाति यच्छ्वेतया॑ क्रीणीयाद्-दुश्चर्मा यजमानः
स्याद्-यत् कृष्णया-ऽनुस्तरणी स्यात् प्रमायुको यजमानः स्याद्-यद्
द्विरूपया वार्त्रघ्नी स्यात् स वाऽन्यं जिनीयात् तं वाऽन्यो
जिनीयादरुणया पिङ्गाक्ष्या () क्रीणात्येतद्-वै सोमस्य रूपं॑
स्वयैवैनं॑ देवतया क्रीणाति ॥ 45

(निष्क्रीणीष्व - दक्षिणाभिश्च - वदन्ति - मन्यन्ते-गन्धर्वेभ्यो-
बहुतयाः-पिङ्गाक्ष्या-दश च) (A6)

TS 6.1.7.1

तद्धिरण्यमभवत् तस्माद्दभ्यो हिरण्यं पुनन्ति ब्रह्मवादिनो वदन्ति
॥ कस्मात् सत्यादनस्थिकेन प्रजाः प्रवीयन्ते ऽस्थन्वतीर्जायन्त इति
यद्धिरण्यं घृते ऽवधाय जुहोति तस्मादनस्थिकेन प्रजाः प्र वीयन्ते
ऽस्थन्वतीर्जायन्त एतद्-वा अग्नेः प्रियं धाम यद्-घृतं तेजो

हिरण्यमियं ते शुक्र तनूरिदं वच इत्याह सतेजसमेवैनञ्

सतनुं - [] 46

TS 6.1.7.2

करोत्यथो सं भरत्येवैनं यदबद्ध-मवदध्याद्-गर्भाः प्रजानां
परापातुकाः स्युर्बद्धमव दधाति गर्भाणां धृत्यै निष्टक्यं बद्धनाति
प्रजानां प्रजननाय वाग्वा एषा यथ् सोमक्रयणी जू-रसीत्याह
यद्धि मनसा जवते तद्-वाचा वदति धृता मनसेत्याह मनसा हि

वाग्धृता जुष्टा विष्णव इत्याह - [] 47

TS 6.1.7.3

यज्ञो वै विष्णु र्यज्ञायैवैनां जुष्टां करोति तस्यास्ते सत्यसवसः
प्रसव इत्याह सवितृप्रसूतामेव वाचमव रुन्धे काण्डेकाण्डे वै
क्रियमाणे यज्ञञ् रक्षाञ्सि जिघाञ्सन्त्येष खलु वा अरक्षोहतः
पन्था योऽग्नेश्च सूर्यस्य च सूर्यस्य चक्षुरा ऽरुहमग्नेरक्षणः

कनीनिकामित्याह य एवारक्षोहतः पन्थास्तञ् समारोहति - [] 48

TS 6.1.7.4

वाग्वा ए॒षा य॒थ् सो॒म॒क्रय॑णी॒ चि॒द॒सि॒ म॒नाऽसी॑त्याह॒ शा॒स्त्ये॒वैना॑मे॒तत्
 तस्मा॑च्छि॒ष्टाः प्र॒जा जा॑यन्ते॒ चि॒द॒सी॒त्याह॒ यद्धि॑ म॒नसा॑ चे॒तय॑ते
 तद्-वा॒चा व॑दति॒ म॒नाऽसी॑त्याह॒ यद्धि॑ म॒नसाऽभि॑गच्छति॒ तत् क॑रोति
 धी-र॒सीत्या॑ह॒ यद्धि॑ म॒नसा॑ ध्यायति॒ तद्-वा॒चा - [] 49

TS 6.1.7.5

व॒दति॑ दक्षिणा॒ऽसी॑त्याह॒ दक्षि॑णा॒ ह्येषा॑ य॒ज्ञिया॑ऽसीत्याह॒ य॒ज्ञिया॑मे॒वैनां॑
 क॑रोति॒ क्षत्रि॑या॒ऽसी॑त्याह॒ क्षत्रि॑या॒ ह्येषा॑ ऽदिति-र॒स्युभ॑यत॒श्शी॒र्ष्णीत्या॑ह
 य॒दे॒वाऽऽदि॑त्यः प्रा॒यणी॑यो॒ य॒ज्ञाना॑मा॒दित्य॑ उ॒दय॑नीय-स्तस्मा॑दे॒वमा॑ह
 य॒दब॑द्धा॒ स्या॑दय॒ता स्या॑द्-यत् प॒दिब॑द्धा-ऽनु॒स्तर॑णी॒ स्यात् प्र॒मायु॑को
 य॒ज॒मा॒नः स्या॑द् - [] 50

TS 6.1.7.6

यत् क॑र्णगृही॒ता वा॒र्त्र॑घ्नी॒ स्या॒थ् स वा॒ऽन्यं जि॑नीयात् तं वा॒ऽन्यो
 जि॑नीयान्मि॒त्रस्त्वा॑ प॒दि ब॑द्ध्ना॒त्वित्या॑ह॒ मि॒त्रो वै शि॒वो दे॒वानां॑
 ते॒नै॒वैनां॑ प॒दि ब॑द्ध्नाति॒ पू॒षा ऽध्व॑नः पा॒त्वित्या॑हे॒यं वै पू॒षे॒मामे॒वास्या॑

अधि॒पाम॒कः॑ सम॒ष्ट्या॒ इन्द्रा॒या-॑द॒ध्यक्षा॒येत्या॒हेन्द्र॒मेवा॒स्या॒ अद॒ध्यक्षं॑
करो - [] 51

TS 6.1.7.7

-त्यनु॑ त्वा मा॒ता-म॒न्यता॒मनु॑ पि॒तेत्या॒हा-नु॑म॒तयै॒वैन॑या क्रीणाति
सा दे॒वि दे॒वम॒च्छे॒हीत्या॑ह दे॒वी ह्ये॒षा दे॒वः सोम॑ इन्द्रा॒य
सोम॑मित्या॒हेन्द्रा॒य हि सोम॑ आ॒ह्रिय॑ते यदे॒तद्-य॒जुर्न॑ ब्रूयात् परा॒च्येव॑
सोम॑क्रयणीयाद्-रु॒द्रस्त्वा ऽऽ वर्त॑यत्वित्याह रु॒द्रो वै क्रू॒रो - [] 52

TS 6.1.7.8

दे॒वानां॑ तमे॒वास्यै॑ पर॒स्ताद्-द॒धात्या॑वृ॒त्त्यै क्रू॒रमि॒व वा ए॒तत् करो॑ति
यद्-रु॒द्रस्य॑ की॒र्तय॑ति मि॒त्रस्य॑ प॒थेत्या॑ह शान्त्यै॑ वा॒चा वा ए॒ष वि
क्री॑णीते यः सोम॑क्रय॒ण्या स्व॒स्ति सोम॑सखा पु॒नरे॑हि स॒ह र॒य्येत्या॑ह
वा॒चैव॑ वि॒क्रीय॑ पु॒नरा॒त्मन् वाचं॑ ध॒त्ते ऽनु॑पदासुका ऽस्य॒ वाग्भ॑वति
य ए॒वं वे॑द () ॥ 53

(स॒तनुं॑ - वि॒ष्णा॒व इत्या॑ह - स॒मारो॑हति - ध्या॒यति॑ तद् वा॒चा -
यज॑मानः स्यात् - करोति - क्रू॒रो - वे॑द) (A7)

TS 6.1.8.1

षट् पदान्यनु॒ नि॒ क्राम॑ति॒ षड॒हं॑ वा॒ङ् नाति॑ वदत्यु॒त सँव॑त्स॒रस्या॑यने॒
याव॑त्ये॒व वाक्॑ ताम॒व रु॒न्धे स॒प्तमे॑ प॒दे जु॑होति स॒प्तप॑दा श॒क्वरी॑
प॒शवः॑ श॒क्वरी॑ प॒शूने॒वाव॑ रु॒न्धे स॒प्त ग्रा॒म्याः प॒शवः॑ स॒प्ताऽऽर॑ण्याः
स॒प्त छ॒न्दा॑-स्यु॒भय॑स्या-व॒रुद्ध्यै॑ वस्व्य॑सि रु॒द्रा ऽसी॑त्याह
रू॒पमे॒वास्या॑ ए॒तन् महि॑मानं - [] 54

TS 6.1.8.2

ँव्या॑च॒ष्टे बृ॒हस्प॑तिस्त्वा सु॒म्ने र॑ण्व॒त्वित्या॑ह ब्र॒ह्म वै दे॒वानां॑
बृ॒हस्प॑ति-ब्र॒ह्मणै॒वास्मै॑ प॒शून॑व रु॒न्धे रु॒द्रो वसु॑भिरा
चि॒के॒त्वित्या॑हाऽऽ*वृ॒त्त्यै पृ॑थि॒व्यास्त्वा मूर्द्ध॑न्ना जिघ॒र्मि दे॒वय॑जन
इत्या॑ह पृथि॒व्या ह्ये॑ष मूर्द्धा॒ यद्-दे॒वय॑जनमिडायाः प॒द इत्या॑हे॒डायै॑
ह्ये॒तत् प॒दं यथ् सो॑म॒क्रय॑ण्यै घृ॒तव॑ति॒ स्वाहे॑ - [] 55

TS 6.1.8.3

-त्या॑ह यदे॒वास्यै॑ प॒दाद्-घृ॒तमपी॑ड्यत॒ तस्मा॑दे॒वमा॑ह
यद॑ध्व॒र्युर॑न॒ग्नावा॑हुतिं जुहु॒याद॑न्धो॒ ऽध्व॑र्युः स्याद्-र॒क्षाँसि॑
य॒ज्ञँ ह॒न्युर्. हि॑रण्यमु॒पास्य॑ जुहोत्यग्नि॒वत्ये॒व जु॑होति॒ नान्धो॑ ऽध्व॒र्यु

र्भवति न यज्ञं रक्षांसि घ्नन्ति काण्डेकाण्डे वै क्रियमाणे यज्ञं
 रक्षांसि जिघांसन्ति परिलिखितं रक्षः परिलिखिता अरातय
 इत्याह रक्षसामपहत्या - [] 56

TS 6.1.8.4

इदमहं रक्षसो ग्रीवा अपि कृन्तामि यो ऽस्मान् द्वेष्टि यं च वयं
 द्विष्म इत्याह द्वौ वाव पुरुषौ यं चैव द्वेष्टि यश्चैनं द्वेष्टि
 तयोरेवानन्तरायं ग्रीवाः कृन्तति पशवो वै सोमक्रयण्यै पदं
 यावत्तमूतं सं वपति पशूनेवाव रुन्धे ऽस्मे राय इति सं
 वपत्यात्मान-मेवाद्ध्वर्युः - [] 57

TS 6.1.8.5

पशुभ्यो नान्त-रेति त्वे राय इति यजमानाय प्र यच्छति यजमान एव
 रयिं दधाति तोते राय इति पत्निया अर्द्धो वा एष आत्मनो यत्
 पत्नी यथा गृहेषु निधत्ते तादृगेव तत् त्वष्टीमती ते सपेयेत्याह त्वष्टा
 वै पशूनां मिथुनानां रूपकृद्-रूपमेव पशुषु दधात्यस्मै वै
 लोकाय गार्हपत्य आ धीयते () ऽमुष्मा आहवनीयो यद्-
 गार्हपत्य उपवपेदस्मिन् लोके पशुमान्थ् स्याद्-यदाहवनीये

ऽमुष्मिन् लोके पशुमान्त् स्यादुभयोरुप वपत्युभयोरेवैनं लोकयोः
पशुमन्तं करोति ॥ 58

(महिमान् - स्वाहा - ऽपहत्या - अद्ध्वर्यु - धीयते -
चतुर्विंशतिश्च) (A8)

TS 6.1.9.1

ब्रह्मवादिनो वदन्ति विचित्यः सोमा(3) न विचित्या(3) इति सोमो
वा ओषधीनाञ् राजा तस्मिन्. यदापन्नं ग्रसितमेवास्य तद्-यद्-
विचिनुयाद्-यथा ऽऽस्याद्-ग्रसितं निष्विदति तादृगेव तद्-यन्न
विचिनुयाद्-यथा ऽक्षन्नापन्नं विधावति तादृगेव तत् क्षोधुको
ऽद्ध्वर्युः स्यात् क्षोधुको यजमानः सोमविक्रयिन्त् सोमञ्
शोधयेत्येव ब्रूयाद् यदीतरं - [] 59

TS 6.1.9.2

यदीतरमुभयेनैव सोमविक्रयिण-मर्पयति तस्मात् सोमविक्रयी
क्षोधुको ऽरुणो ह स्माऽऽहौपवेशिः सोमक्रयण एवाहं तृतीय
सवनमव रुन्ध इति पशूनां चर्मन् मिमीते पशूनेवाव रुन्धे पशवो हि

तृतीयञ् सवनं यं कामयेतापशुः स्यादित्यृक्षतस्तस्य मिमीतर्क्षं वा
अपशव्यमपशुरेव भवति यं कामयेत पशुमान्त् स्या - [] 60

TS 6.1.9.3

-दिति लोमतस्तस्य मिमीतैतद्-वै पशूनाञ् रूपञ् रूपेणैवास्मै
पशूनव रुन्धे पशुमानेव भवत्यपामन्ते क्रीणाति सरसमेवैनं
क्रीणात्यमात्यो ऽसीत्याहामैवैनं कुरुते शुक्रस्ते ग्रह इत्याह शुक्रो
ह्यस्य ग्रहो ऽनसाऽच्छ याति महिमान-मेवास्याच्छ यात्यनसा - [] 61

TS 6.1.9.4

ऽच्छ याति तस्मादनोवाह्यञ् समे जीवनं यत्र खलु वा एतञ्
शीर्ष्णा हरन्ति तस्माच्छीर्षहार्यं गिरौ जीवनमभि त्यं देवञ्
सवितार-मित्यतिच्छन्दसर्चा मिमीते ऽतिच्छन्दा वै सर्वाणि छन्दाञ्सि
सर्वेभिरेवैनं छन्दोभिर्मिमीते वर्ष्म वा एषा छन्दसां यदतिच्छन्दा
यदतिच्छन्दसर्चा मिमीते वर्ष्मैवैनञ् समानानां
करोत्येकयैकयोत्सर्गं- [] 62

TS 6.1.9.5

मिमी॑ते ज्या॑तया॒मि॒न्याया॑तया॒मि॒न्यैवैनं॑ मिमी॑ते तस्मान्ना॑ना॒वीर्या॑
 अङ्गु॑लयः॒ सर्वा॑स्वङ्गु॒ष्ठमु॒प नि॑ गृह्णा॒ति तस्मा॑त् समा॒वद्वी॒र्यो ज्या॑भि-
 रङ्गु॑लिभि॒स्तस्मा॑त् सर्वा॒ अनु॒ सं च॑रति॒ यत् सह॑ सर्वा॑भिर्मिमी॒त
 सञ्जि॑लि॒ष्टा अङ्गु॑लयो जाये॒र-न्ने॑क॒यैक॒योत्स॑र्गं मिमी॑ते तस्मा॒द्
 विभ॑क्ता जायन्ते॒ पञ्च॑ कृ॒त्वो यजु॑षा मिमी॑ते पञ्चा॑क्षरा पङ्क्तिः॒ पाङ्क्तौ॑
 यज्ञो॑ य॒ज्ञमे॒वाव॑ रुन्धे॒ पञ्च॑ कृ॒त्वस्तू॑ष्णीं- [] 63

TS 6.1.9.6

-दश॑ सं प॒द्यन्ते॑ दशा॑क्षरा॒ विरा॑डन्नं॒ विरा॑ड् विरा॒जैवा॒न्नाद्य॒मव॑ रुन्धे॒
 यद् यजु॑षा मिमी॑ते भू॒तमे॒वाव॑ रुन्धे॒ यत् तू॑ष्णीं भ॒विष्य॑द्-यद्-
 वै ता॒वाने॑व सोमः॒ स्याद् या॑वन्तं॒ मिमी॑ते य॒जमान॑स्यै॒व स्या॑न्नापि॒
 सद॒स्यानां॑ प्र॒जाभ्य॑स्त्वेत्यु॒प स-मू॑हति॒ सद॒स्याने॒वान्वा भ॑जति॒
 वास॑सोप॒ नह्य॑ति॒ सर्व॑दे॒वत्यं॑ वै - [] 64

TS 6.1.9.7

वासः॑ सर्वा॑भिरे॒वैनं॑ दे॒वता॑भिः स-म॑र्दध॒यति॑ प॒शवो॑ वै सोमः॑ प्रा॒णाय॑
 त्वेत्यु॑प॒ नह्य॑ति प्रा॒णमे॒व प॒शुषु॑ दधा॒ति व्या॒नाय॑ त्वेत्यनु॑ शृ॒न्थति॑

व्या॒नमे॒व प॒शुषु॑ दधाति॒ तस्मा॑त् स्व॒पन्तं॑ प्रा॒णा न॒ जह॑ति ॥ 65

(इ॒तरं॑ – प॒शुमा॑न्त् स्याद् – या॒त्यन॑सो – थ्सर्गं॑ – तू॒ष्णीꣳ –
सर्व॑दे॒वत्यं॑ वै – त्रय॑स्त्रिꣳश॒च्च) (A9)

TS 6.1.10.1

यत् क॒लया॑ ते श॒फेन॑ ते क्री॒णानी॑ति प॒णेता॑गोअर्घꣳ सोमं॑
कुर्या॑द्गोअर्घꣳ य॒जमान॑-म॒गोअर्घ॑म॒ध्वर्युं॑ गोस्तु॒ महि॑मानं॒ नाव॑
तिरे॑द् गवा॒ ते क्री॒णानी॑त्येव ब्रूयाद् गोअर्घ॑मेव सोमं॑ करोति॒
गोअर्घꣳ य॒जमानं॑ गोअर्घ॑म॒ध्वर्युं॑ न गो॒र्महि॑मानमव॒ तिर॑त्यजया॒ क्रीणा॑ति
सत॑पसमे॒वैनं॑ क्रीणाति॒ हिर॑ण्येन क्रीणाति॒ सशु॑क्रमे॒वै- [] 66

TS 6.1.10.2

-नं॑ क्रीणाति॒ धेन्वा॑ क्रीणाति॒ साशि॑रमे॒वैनं॑ क्रीणात्यृष॒भेण॑ क्रीणाति॒
सेन्द्र॑मे॒वैनं॑ क्रीणात्यन॒डुहा॑ क्रीणाति॒ वहि॑र्वा अन॒ड्वान्. वहि॑नैव वहि॒
यज्ञ॑स्य क्रीणाति॒ मिथु॑नाभ्यां॑ क्रीणाति॒ मिथु॑नस्याव-रु॒द्ध्यै वा॑ससा
क्रीणा॑ति सर्व॑दे॒वत्यं॑ वै वा॒सः सर्वा॑भ्य ए॒वैनं॑ दे॒वता॑भ्यः
क्रीणा॑ति दश॒ सं प॑द्यन्ते॒ दशा॑क्षरा॒ विरा॑डन्नं॒ विरा॑ड्
विरा॑जैवा॒न्नाद्य॑मव॒ रुन्धे॑ – [] 67

TS 6.1.10.3

तपसस्तनूरसि प्रजापतेर्वर्ण इत्याह पशुभ्य एव तदध्वर्युर्नि हुत
 आत्मनोऽनाव्रस्काय गच्छति श्रियं प्र पशूनाप्नोति य एवं वेद शुक्रं
 ते शुक्रेण क्रीणामीत्याह यथा यजुरेवैतद् देवा वै येन हिरण्येन
 सोममक्रीणन् तदभीषहा पुनरा ऽददत् को हि तेजसा विक्रेष्यत
 इति येन हिरण्येन – [] 68

TS 6.1.10.4

सोमं क्रीणीयात् तदभीषहा पुनरा ददीत तेज एवाऽऽत्मन् धत्ते ऽस्मे
 ज्योतिः सोमविक्रयिणि तम इत्याह ज्योतिरेव यजमाने दधाति तमसा
 सोमविक्रयिणमर्पयति यदनुपग्रथ्य हन्याद्-दन्दशूकास्तां समां
 सर्पाः स्युरिदमहं सर्पाणां दन्दशूकानां ग्रीवा उप ग्रथ्णामीत्याहा-
 दन्दशूकास्तां समां सर्पा भवन्ति तमसा सोमविक्रयिणं

विद्ध्यति स्वान – [] 69

TS 6.1.10.5

भ्राजेत्याहैते वा अमुष्मिन् लोके सोममरक्षन् तेभ्यो ऽधि सोममाऽहरन्.
 यदेतेभ्यः सोमक्रयणा-न्नानुदिशेदक्रीतो ऽस्य सोमः स्यान्नास्यैते

ऽमुष्मिन् लोके सोमञ् रक्षेयुर्यदेतेभ्यः सोमक्रयणाननुदिशति
 क्रीतो ऽस्य सोमो भवत्येते ऽस्यामुष्मिन् लोके सोमञ् रक्षन्ति ॥ 70

(सशुक्रमेव - रुन्ध - इति येन हिरण्येन - स्वान -
 चतुश्चत्वारिंशच्च) (A10)

TS 6.1.11.1

वारुणो वै क्रीतः सोम उपनद्धो मित्रो न एहि सुमित्रथा इत्याह
 शान्त्या इन्द्रस्योरुमा विश दक्षिणमित्याह देवा वै यञ् सोममक्रीणन्
 तमिन्द्रस्योरौ दक्षिण आ ऽसादयन्नेष खलु वा एतर्हीन्द्रो यो यजते
 तस्मादेवमाहोदायुषा स्वायुषेत्याह देवता एवा-न्वारभ्योत् - [] 71

TS 6.1.11.2

तिष्ठत्यु-र्वन्तरिक्ष-मन्विहीत्याहा-न्तरिक्षदेवत्यो(1) ह्येत्र्हि
 सोमोऽदित्याः सदोऽस्यदित्याः सद आ सीदेत्याह यथायजुरेवैतद्
 वि वा एनमेतदर्दधयति यद् वारुणञ् सन्तं मैत्रं करोति
 वारुण्यर्चा ऽऽ सादयति स्वयैवैनं देवतया स-मर्दधयति वाससा
 पर्यान्हति सर्वदेवत्यं वै वासः सर्वाभिरेवै - [] 72

TS 6.1.11.3

-नं दे॒वताभिः॑ सम॑र्द्धयत्यथो॑ रक्ष॑सामप॑हत्यै॒ वनेषु॑ व्यन्तरि॑क्षं
त॒तानेत्या॑ह वनेषु॑ हि व्यन्तरि॑क्षं त॒तान वाज॑मर्वथ्स्वित्या॑ह वाज॑
ह्यर्वथ्सु॑ पयो॑ अ॒घ्नियास्वित्या॑ह पयो॑ ह्य॒घ्नियासु॑ ह॒थ्सु क्र॑तुमि॒त्याह
ह॒थ्सु हि क्र॑तुं वरु॑णो वि॒क्ष्वग्नि॑मि॒त्याह वरु॑णो हि वि॒क्ष्वग्निं॑

दिवि॑ सूर्य - [] 73

TS 6.1.11.4

मि॒त्याह दि॒वि हि सूर्य॑ꣳ सोम॑म॒द्रावि॒त्याह ग्रा॑वा॒णो वा अ॒द्रय॑स्तेषु
वा ए॒ष सोमं॑ दधाति॒ यो यज॑ते तस्मा॑दे॒वमा॒होदु॑ त्यं जा॒तवे॑दस॒मिति॑
सौर्य॑र्चा कृ॒ष्णाजिनं॑ प्र॒त्यान॑ह्यति॒ रक्ष॑सामप॑हत्या॒ उ॒स्रावे॑तं
धूर्षा॑हावि॒त्याह यथा॑य॒जुरे॒वैतत् प्र च्य॑वस्व भुव॑स्पत॒ इत्या॑ह

भू॒तानाꣳ ह्ये॑ - [] 74

TS 6.1.11.5

-ष पति॑र्विश्वा॒न्यभि॑ धामा॒नीत्या॑ह वि॒श्वानि॑ ह्ये॑(1) षोऽभि॑ धामा॒नि
प्रच्य॑वते॒ मा त्वा॑ परि॒परी वि॑ददि॒त्याह यदे॒वादः सोम॑मा॒ह्रिय॑माणं
गन्ध॑र्वो वि॒श्वाव॑सुः पर्य॑मुष्णात् तस्मा॑-दे॒वमा॒हापरि॑मोषाय॒ यज॑मानस्य

स्वस्त्ययन्यसीत्याह यजमानस्यैवैष यज्ञस्यान्वारंभो ऽनवच्छित्यै
वरुणो वा एष यजमानमभ्यैति यत् - [] 75

TS 6.1.11.6

क्रीतः सोम उपनद्धो नमो मित्रस्य वरुणस्य चक्षस इत्याह
शान्त्या आ सोमं वहन्त्यग्निना प्रति तिष्ठते तौ संभवन्तौ
यजमानमभि सं भवतः पुरा खलु वावैष मेधायाऽऽत्मानमारभ्य
चरति यो दीक्षितो यदग्नीषोमीयं पशुमालभत आत्मनिष्क्रयण
एवास्य स तस्मात् तस्य नाऽऽश्यं पुरुषनिष्क्रयण इव ह्यथो
खल्वाहु () रग्नीषोमाभ्यां वा इन्द्रो वृत्रमहन्निति यदग्नीषोमीयं
पशुमालभते वार्त्रघ्न एवास्य स तस्माद्-वाश्यं वारुण्यर्चा परि
चरति स्वयैवैनं देवतया परि चरति ॥ 76

(अन्वारभ्योथ् - सर्वाभिरेव - सूर्यं - भूतानां ह्ये - ति य -
दाहुः - सप्तविंशतिश्च) (A11)

Prasna Korvai with starting Padams of 1 to 11 Anuvaakams :-

(प्राचीनव॑श्ं - या॑वन्त - ऋ॒ख॒सामे॑ - वा॒ग्वै दे॒वेभ्यो॑ -
दे॒वा वै दे॒वय॑जनं - क॒द्रूश्च॑ - तद्धि॑रण्य॒ - षट् प॒दानि॑ -
ब्र॒ह्मवा॑दि॒नो वि॒चित्यो॑ - यत् क॒लया॑ ते - वा॒रु॒णो वै क्री॑तः सोम॒
- ए॒काद॑श)

Korvai with starting Padams of 1, 11, 21 Series of Panchaatis :-

(प्राचीनव॑श्ं - स्वा॑हेत्याह - ये॑ऽन्तः श॒रा - ह्ये॑ष सं -
तप॑सा च - यत्कर्ण॑गृही - तेति॑ लो॒मतो॑ - वा॒रु॒णः - षट्थ्
स॑प्ततिः)

First and Last Padam of First Prasnam of 6th Kandam

(प्राचीनव॑श्ं - परि॑ चरति)

॥ हरिः॑ ओं ॥

॥ कृष्ण॑ यजुर्वेदीय तैत्तिरीय संहितायां षष्ठकाण्डे प्रथमः प्रश्नः

समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

6.2 षष्ठकाण्डे द्वितीयः प्रश्नः – सोममन्त्रब्राह्मणनिरूपणं

TS 6.2.1.1

यदु॒भौ वि॒मु॒च्याऽऽति॒थ्यं गृ॒ह्नी॒याद्-य॒ज्ञं वि॒ च्छि॒न्द्याद्-यदु॒भाववि॒मु॒च्य
यथा॒ ऽना॒गता॒याऽऽति॒थ्यं क्रि॒यते ता॒दृगे॒व तद्-वि॒मु॒क्तो-
ऽन्यो॑ऽन॒ड्वान् भव॒त्यवि॒मु॒क्तो ऽन्यो॑ ऽथाऽऽति॒थ्यं गृ॒ह्णाति॑ य॒ज्ञस्य॑ स॒न्तत्यै॑
पत्न्य॑न्वार॒भते॒ पत्नी॑ हि पा॒रीण॑ह्यस्येशे॒ पत्न्यै॑वानु॒मतं॑ निर्व॒पति॑ यद्-वै
पत्नी॑ य॒ज्ञस्य॑ करोति॒ मिथु॑नं तदथो॒ पत्न्या॑ ए॒वै- [] 1

TS 6.2.1.2

-ष य॒ज्ञस्या॑न्वारं॒भो ऽन॒वच्छि॒त्यै या॒वद्भि॒र्वै राजा॑ ऽनु॒चरै॑-रा॒गच्छ॑ति
सर्वे॑भ्यो॒ वै तेभ्य॑ आ॒ति॒थ्यं क्रि॒यते छन्दा॑ऽसि॒ खलु॒ वै सोम॑स्य
राज्ञो॑ ऽनु॒चरा॑ण्यग्ने-रा॒ति॒थ्य-म॒सि वि॒ष्णावे॑ त्वेत्याह॒ गाय॑त्रिया
ए॒वैतेन॑ करोति॒ सोम॑स्याऽऽति॒थ्य-म॒सि वि॒ष्णावे॑ त्वेत्याह॒ त्रिष्टु॑भ ए॒वैतेन॑
करो॑त्यति॒थे-रा॒ति॒थ्य-म॒सि वि॒ष्णावे॑ त्वेत्याह॒ जग॑त्या- [] 2

TS 6.2.1.3

ए॒वैते॑न॒ करो॒त्य॒ग्नये॑॑ त्वा रा॒य॒स्पो॒षदा॒व्.न्ने॒ वि॒ष्ण॒वे॒ त्वे॒त्या॒हा॒नु॒ष्टु॒भ
 ए॒वैते॑न॒ करो॒ति॒ श्ये॒नाय॑ त्वा सो॒म॒भृते॒ वि॒ष्ण॒वे॒ त्वे॒त्या॒ह॒ गाय॑त्रिया
 ए॒वैते॑न॒ करो॒ति॒ पञ्च॑ कृ॒त्वो गृ॒ह्णाति॑ पञ्चा॒क्षरा॑ प॒ङ्क्तिः॑ पा॒ङ्क्तौ॑ य॒ज्ञो
 य॒ज्ञमे॒वाव॑ रु॒न्धे ब्र॒ह्म॒वादि॑नो॒ वद॑न्ति॒ कस्मा॑त् स॒त्याद्-गा॑यत्रिया
 उ॒भय॑त आ॒ति॒थ्य॒स्य॑ क्रि॒यत॑ इति॒ यदे॒वादः॑ सो॒ममा- [] 3

TS 6.2.1.4

ऽह॒रत् तस्मा॑द्-गा॒यत्रि॒या उ॒भय॑त आ॒ति॒थ्य॒स्य॑ क्रि॒यते॑ पु॒रस्ता॑च्चो
 परि॒ष्टाच्च॑ शि॒रो वा ए॒तद् य॒ज्ञस्य॑ यदा॒ति॒थ्यं॑ नव॒कपालः॑ पु॒रोडा॑शो
 भव॑ति॒ तस्मान्न॑व॒धा शि॒रो वि॒ष्यू॒तं नव॑कपालः पु॒रोडा॑शो भव॑ति॒ ते
 त्रय॑स्त्रि॒कपाला॑स्त्रि॒वृता॑ स्तो॒मेन॑ स॒मि॒तास्ते॒ज-स्त्रि॑वृत् तेज
 ए॒व य॒ज्ञस्य॑ शी॒र्षन् द॑धाति॒ नव॑कपालः पु॒रोडा॑शो भव॑ति॒ ते
 त्रय॑-स्त्रि॒कपाला॑स्त्रि॒वृता॑ प्रा॒णेन॑ स॒मि॒तास्त्रि॑वृद् वै- [] 4

TS 6.2.1.5

प्रा॒ण-स्त्रि॑वृ॒तमे॒व प्रा॒णम॑भि॒पूर्वँ॑ य॒ज्ञस्य॑ शी॒र्षन् द॑धाति
 प्र॒जाप॑ते॒र्वा ए॒तानि॑ प॒क्ष्मा॑णि॒ यदश्व॑वाला॒ ऐ॒क्ष्वी॑ ति॒रश्ची॑ यदाश्व॒वालः॑

प्र॒स्त॒रो भ॒वत्यै॒क्ष॒वी ति॒रश्ची॑ प्र॒जाप॑तेरेव तच्चक्षुः सं भ॒रति॑ दे॒वा वै या
आहु॑तीरजुहवुस्ता असुरा निष्काव-मादन् ते दे॒वाः कार्ष्ण॑र्य-मपश्यन्
कर्म॑ण्यो वै कर्म॑नेन कुर्वीतेति ते कार्ष्ण॑र्यमयान् परिधीन्- [] 5

TS 6.2.1.6

-कुर्व॑त तैर्वै ते रक्षा॑स्यपाघ्नत यत् कार्ष्ण॑र्यमयाः परि॒धयो॑ भवन्ति
रक्ष॑सामपहत्यै स॑स्पर्शयति रक्ष॑सा-मनन्ववचाराय न पु॒रस्तात्
परि॑ दधात्यादित्यो ह्ये॒वोद्यन् पु॒रस्ताद्-रक्षा॑स्यपहन्त्यूर्ध्वे समि॒धावा
दधा॑त्युपरिष्ठादेव रक्षा॑स्यप हन्ति यजु॒षा ऽन्यां॑ तूष्णीम॒न्यां मि॒थुन॒त्वाय॑
द्वे आ॑ दधाति द्वि॒पाद्-यज॑मानः प्रतिष्ठित्यै ब्रह्म॒वादि॑नो वदन्त्य- [] 6

TS 6.2.1.7

-ग्निश्च॑ वा ए॒तौ सोम॑श्च कथा सोमायाऽऽतिथ्यं क्रियते नाग्नय इति
यदग्ना॑वग्निं मथित्वा प्र॒हरति॑ तेनैवाग्नय आतिथ्यं क्रियते
ऽथो॑ खल्वाहुरग्निः सर्वा दे॒वता॑ इति यद्ध॒विरा॑साद्याग्निं मन्थति
ह॒व्यायै॑वाऽऽसन्नाय सर्वा दे॒वता॑ जनयति ॥ 7

(प॒न्या ए॒व - जग॑त्या - आ - त्रि॒वृद्धै - प॒रिधीन् - व॒दन्त्ये -
क॑चत्वारि॒शच्च) (A1)

TS 6.2.2.1

दे॒वा॒सु॒राः सँ॑य॒त्ता आ॒सन् ते दे॒वा मि॒थो वि॒प्रि॒या आ॒सन्
 तेऽ॑(१)न्योऽन्य॒स्मै ज्यै॒ष्या॒याति॑ष्ठ॒मानाः पञ्च॒धा व्य॑क्राम॒न्नग्नि॑र्व॒सुभिः
 सो॒मो रु॒द्रैरिन्द्रो॑ म॒रुद्भिर्व॑रुण॒ आदि॒त्यैर्बृ॒हस्प॑तिर्वि॒श्वैर्दे॒वैस्ते
 ऽम॒न्यन्ता॑सु॒रेभ्यो॒ वा इ॒दं भ्रातृ॑व्येभ्यो रद्ध्यामो यन्मि॒थो वि॒प्रि॒याः
 स्मो या न इ॒माः प्रि॒यास्त॒नुव॒स्ताः स॒मव॑द्याम॒है ताभ्यः॒ स
 निर्॒च्छाद् यो- [] 8

TS 6.2.2.2

नः प्रथ॒मो(१)ऽन्योऽन्य॒स्मै द्रु॒ह्यादि॑ति तस्माद्-यः स॒तानू॑न॒प्त्रिणां॑ प्रथ॒मो
 द्रु॒ह्यति॑ स आ॒र्तिमा॑च्छति॒ यत् तानू॑न॒प्त्रं स॒मव॑द्यति॒ भ्रातृ॑व्याभिभू॒त्यै
 भव॑त्यात्म॒ना परा॑ ऽस्य॒ भ्रातृ॑व्यो भवति पञ्च॒ कृत्वो ऽव॑ द्यति पञ्च॒धा
 हि ते तथ् स॒मवा॑द्यन्ताथो पञ्चाक्ष॒रा प॒ङ्क्तिः पाङ्क्तो॑ य॒ज्ञो य॒ज्ञमे॒वाव
 रुन्ध॑ आप॒तये॑ त्वा गृह्णामीत्याह प्रा॒णो वा- [] 9

TS 6.2.2.3

आप॒तिः प्रा॒णमे॒व प्री॑णाति॒ परि॑पतय॒ इत्या॑ह॒ मनो॒ वै परि॑पति॒र्मन॑
 ए॒व प्री॑णाति॒ तनू॑न॒प्त्रं इत्या॑ह॒ तनु॒वो हि ते ताः स॒मवा॑द्यन्त

शाक्वरायेत्याह शक्त्यै हि ते ताः समवाद्यन्त शक्म-
 न्नोजिष्ठायेत्याहौजिष्ठं हि ते तदात्मनः समवाद्यन्ता-
 -नाधृष्टमस्यनाधृष्य-मित्याहानाधृष्टं ह्येतदनाधृष्यं

देवानामोज- [] 10

TS 6.2.2.4

इत्याह देवानां ह्येतदोजो ऽभिश्स्तिपा अनभिश्स्तेन्य-मित्याहा-
 भिश्स्तिपा ह्येतद-नभिश्स्तेन्य-मनु मे दीक्षां दीक्षापति-
 र्मन्यतामित्याह यथायजुरेवैतद्-घृतं वै देवा वज्रं कृत्वा सोम-मघ्न-
 न्नन्तिक-मिव खलु वा अस्यैतच्चरन्ति यत् तानूनप्त्रेण
 प्रचरन्त्यंशुरंशु-स्ते देव सोमाऽऽप्यायतामित्याह य- [] 11

TS 6.2.2.5

-देवास्यापुवायते यन्मीयते-तदेवास्यैतेनाऽऽप्याययत्या
 तुभ्यमिन्द्रः प्यायतामा त्वमिन्द्राय प्यायस्वेत्या-होभावेवेन्द्रं च
 सोमं चाऽऽप्याययत्या प्यायय सखीन्थ् सन्या मेधयेत्याहर्त्विजो
 वा अस्य सखायस्तानेवाऽऽप्याययति स्वस्ति ते देव सोम
 सुत्यामशीये- [] 12

TS 6.2.2.6

-त्याहा ऽऽशिषमेवैतामा शास्ते प्र वा एते ऽस्मा-ल्लोकाच्च्यवन्ते ये
सोममा-प्याययन्त्य-न्तरिक्षदेवत्यो हि सोम आप्यायित एष्टा रायः
प्रेषे भगायेत्याह द्यावापृथिवीभ्यामेव नमस्कृत्यास्मिन् लोके
प्रति तिष्ठन्ति देवासुराः सँयत्ता आसन् ते देवा बिभ्यतोऽग्निं प्राविशन्
तस्मादाहुरग्निः सर्वा देवता इति ते- [] 13

TS 6.2.2.7

ऽग्निमेव वरूथं कृत्वा ऽसुरानभ्यभव-न्नग्निमिव खलु वा एष
प्र विशति यो ऽवान्तरदीक्षा-मुपैति भ्रातृव्याभिभूत्यै भवत्यात्मना
॥ ऽस्य भ्रातृव्यो भवत्यात्मानमेव दीक्षया पाति प्रजामवान्तरदीक्षया
सन्तरां मेखलां समायच्छते प्रजा ह्यात्मनोऽन्तरतरा तप्तव्रतो
भवति मदन्तीभिर्मार्जयते निर्हाग्निः शीतेन वायति समिद्ध्यै या ते
अग्ने () रुद्रिया तनूरित्याह स्वयैवैनद् देवतया व्रतयति सयोनित्वाय
शान्त्यै ॥ 14 (यो - वा - ओज - आह य - दशीये - ति ते -

ऽग्न - एकादश च) (A2)

TS 6.2.3.1

तेषामसुराणां तिस्रः पुर आस-न्नयस्म-य्यवमा ऽथ रजता ऽथ
हरिणी ता देवा जेतुं नाशक्नुवन् ता उपसदैवाजिगीषन्
तस्मादाहुर्यश्चैवं वेद यश्च नोपसदा वै महापुरं जयन्तीति त इषुः
स-मस्कुर्वता-ग्निमनीकः सोमः शल्यं विष्णुं तेजनं ते ऽब्रुवन्
क इमामसिष्यतीति- [] 15

TS 6.2.3.2

रुद्र इत्यब्रुवन् रुद्रो वै क्रूरः सो ऽस्यत्विति सो ऽब्रवीद् वरं वृणा
अहमेव पशूना-मधिपतिरसानीति तस्माद् रुद्रः पशूना-
मधिपतिस्ताः रुद्रो ऽवासृजथ् स तिस्रः पुरो भित्त्वैभ्यो लोकेभ्यो-
ऽसुरान् प्राणुदत यदुपसद उपसद्यन्ते भ्रातृव्यपराणुत्यै नान्यामाहुतिं
पुरस्ता-ज्जुहुयाद्-यदन्यामाहुतिं पुरस्ताज्जुहुया- [] 16

TS 6.2.3.3

दन्यन्मुखं कुर्याथ् स्रुवेणाऽऽधारमा धारयति यज्ञस्य प्रज्ञात्यै
पराङ्तिक्रम्य जुहोति पराच एवैभ्यो लोकेभ्यो यजमानो भ्रातृव्यान्
प्र णुदते पुन-रत्याक्रम्योपसदं जुहोति प्रणुद्यैवैभ्यो लोकेभ्यो

भ्रातृ॑व्याञ्जित्वा भ्रातृ॑व्यलोक-मभ्यारो॑हति दे॒वा वै याः प्रा॒तरु॑पसद
 उपा॑सीद-न्नह॑स्ताभिरसुरान् प्राणु॑दन्त याः साय॑ञ् रत्रि॑यै ताभि॑र्यथ्
 सायं॑प्रातरु॑पसद - [] 17

TS 6.2.3.4

उप॑सद्यन्ते ऽहो॑रात्राभ्यामे॒व तद्-यज॑मानो भ्रातृ॑व्यान् प्र णु॑दते
 याः प्रा॒तर्या॒ज्याः स्यु॑ स्ताः सायं॑ पुरो॑नुवाक्याः कुर्या॑दया॒तयाम॑त्वाय
 तिस्र॑ उप॑सद उपै॑ति त्रय॑ इ॒मे लो॒का इ॒माने॒व लो॒कान् प्री॑णाति
 षट्थ् सं प॑द्यन्ते षड् वा ऋ॒तव॑ ऋ॒तूने॒व प्री॑णाति द्वाद॑शाही॒ने सोम॑
 उपै॑ति द्वाद॑श॒ मासाः॑ सं॒वत्सरः॑ सं॒वत्सर॑मे॒व प्री॑णाति चतु॑र्वि॒ंशतिः॑

सं- [] 18

TS 6.2.3.5

पद्य॑न्ते चतु॑र्वि॒ंशति-॑र्द्धमा॒सा अ॑र्द्धमा॒साने॒व प्री॑णा॒त्यारा॑ग्रा-
 मवा॑न्तरदी॒क्षा-मु॑पेयाद्-यः का॒मये॑तास्मिन् मे॒ लो॒के ऽर्द्धु॑कञ्
 स्या॑दित्ये॒कम॑ग्रे ऽथ॒ द्वाव॑थ॒ त्री॑नथ॒ चतु॑र ए॒षा वा आ॑रा॒ग्रा
 ऽवा॑न्तरदी॒क्षा ऽस्मि॑न्ने॒वास्मै॑ लो॒के ऽर्द्धु॑कं भवति॒ परो॑वरी॒यसी-

मवान्तरदीक्षा-मुपेयाद्-यः कामयेतामुष्मिन् मे लोके ऽर्द्धुकु७
स्यादिति चतुरो ऽग्रे () ऽथ त्रीनथ द्वावथैकमेषा वै परोवरीयस्य-
वान्तरदीक्षा ऽमुष्मिन्नेवास्मै लोके ऽर्द्धुकं भवति ॥ 19

(असिष्यतीति - जुहुयाथ - सायं प्रातरुपसद - श्वतुर्विंशतिः सं
- चतुरोऽग्रे - षोडश च) (A3)

TS 6.2.4.1

सुवर्गं वा एते लोकं यन्ति य उपसद उपयन्ति तेषां य उन्नयते
हीयत एव स नोदनेषीति सूत्रीयमिव यो वै स्वार्थेतां यता७ श्रान्तो
हीयत उत स निष्च्याय सह वसति तस्मात् सकृदुन्नीय नापरमुन्नयेत
दद्धनोन्नयेतैतद्-वै पशूनां रूपं रूपेणैव पशूनव रुन्धे- [] 20

TS 6.2.4.2

यज्ञो देवेभ्यो निलायत विष्णू रूपं कृत्वा स पृथिवीं प्राविशत्
तं देवा हस्तान्त् स७रभ्यैच्छन् तमिन्द्र उपर्युपर्यत्यक्रामत्
सो ऽब्रवीत् को मा ऽय-मुपर्युपर्यत्यक्रमी-दित्यहं दुर्गे हन्तेत्यथ
कस्त्वमित्यहं दुर्गादाहर्तेति सो ऽब्रवीद् दुर्गे वै हन्ता ऽवोचथा
वराहो ऽयं वाममोषः- [] 21

TS 6.2.4.3

स॒प्तानां॑ गि॒रीणां॑ प॒रस्ताद्-॑वि॒त्तं॑ वैद्य॒मसुराणां॑ बि॒भर्ति॑ तं ज॒हि
यदि॑ दु॒र्गे ह॒न्ता ऽसी॒ति स॑ दर्भ॒पुञ्जी॒लमु॒द्वृह्य॑ स॒प्त गि॒रीन्
भि॒त्त्वा तम॑ह॒न्थ् सो॑ ऽब्र॒वीद् दु॒र्गाद्-॑वा आ॒हर्ता॑ ऽवोच॒था ए॒तमा॑ ह॒रेति॑
तमे॑भ्यो॒ य॒ज्ञ ए॒व य॒ज्ञमा॑ ऽह॒रद्-॑यत् तद्-वि॒त्तं॑ वैद्य॒मसुराणां॑-
मवि॑न्दन्त॒ तदे॒कं॑ वैद्यै॑ वे॒दित्व॑मसुराणां- [] 22

TS 6.2.4.4

वा॑ इ॒यम॑ग्र आ॒सीद् या॒वदा॑सी॒नः प॒राप॑श्यति॒ तावद् दे॒वानां॑ ते दे॒वा
अ॒ब्रुव॑न्न॒स्त्वेव॑ नो॒ ऽस्या॑मपीति॒ कियद्-॑वो दा॒स्याम॑ इति॒ याव॑दियञ्
स॒लावृ॑की त्रिः प॒रि॒क्राम॑ति॒ तावन्नो॑ द॒त्तेति॑ स इन्द्रः॑ स॒लावृ॑की रू॒पं
कृ॒त्वेमां॑ त्रिः स॒र्वतः॑ प॒र्य॑क्रामत् तदि॒माम॑विन्दन्त॒ यदि॑मामविन्दन्त॒ तद्
वेद्यै॑ वे॒दित्वञ्- [] 23

TS 6.2.4.5

सा वा इ॒यञ् स॒र्वेव॑ वे॒दिरि॑यति॒ शक्ष्या॑मीति॒ त्वा अ॒वमा॑य॒ यज॑न्ते
त्रि॒ञ्शत् प॒दानि॑ प॒श्चात् ति॒रश्ची॑ भवति॒ षट्त्रि॑ञ्शत् प्राची
चतु॑र्वि॒ञ्शतिः॑ पु॒रस्तात् ति॒रश्ची॑ द॒शद॑श सं प॒द्यन्ते॑ द॒शाक्ष॑रा

विराडन्नं विराड् विराजैवान्नाद्यमव रुन्ध उद्धन्ति यदेवास्या अमेद्ध्यं
तदप हन्त्युद्धन्ति तस्मादोषधयः परा भवन्ति () बर्हिः स्तृणाति
तस्मादोषधयः पुनरा भवन्त्युत्तरं बर्हिष उत्तरबर्हिः स्तृणाति
प्रजा वै बर्हिर्यजमान उत्तरबर्हि र्यजमान-मेवा-यजमानादुत्तरं
करोति तस्माद्-यजमानो ज्यजमानादुत्तरः ॥ 24

(रुन्धे - वाममोषो - वेदित्वमसुराणां - वैदित्वं - भवन्ति -
पञ्चविंशतिश्च) (A4)

TS 6.2.5.1

यद्-वा अनीशानो भारमादत्ते वि वै स लिशते यद् द्वादश
साहस्योपसदः स्यु स्तिस्त्रो ऽहीनस्य यज्ञस्य विलोम क्रियेत तिस्र
एव साहस्योपसदो द्वादशाहीनस्य यज्ञस्य सवीर्यत्वायाथो सलोम
क्रियते वथ्सस्यैकः स्तनो भागी हि सोऽथैकञ् स्तनं व्रतमुपैत्यथ
द्वावथ त्रीनथ चतुर एतद् वै- [] 25

TS 6.2.5.2

क्षुरपवि नाम व्रतं येन प्र जातान् भ्रातृव्यान् नुदते प्रति
जनिष्यमाणानथो कनीयसैव भूय उपैति चतुरो ऽग्रे स्तनान् ॥

व्रतमु॒पैत्यथ॒ त्री॒नथ॒ द्वा॒वथै॒कमे॒तद्-वै॑ सु॒जघ॒नं॑ ना॒म व्र॒तं त॒पस्य॑ꣳ
 सु॒वर्ग्य॑मथो॒ प्रै॒व जा॑यते॒ प्र॒जया॑ प॒शुभि॑र्य॒वागू॑ रा॒जन्य॑स्य व्र॒तं क्रू॒रेव॑
 वै य॒वागूः॑ क्रू॒र इ॒व- [] 26

TS 6.2.5.3

रा॒ज॒न्यो॑ व॒ज्रस्य॑ रू॒पꣳ स॒मृद्ध्य॑ आ॒मि॒क्षा वै॒श्यस्य॑ पा॒कय॒ज्ञस्य॑
 रू॒पं पु॒ष्च्यै॑ प॒यो ब्रा॒ह्मण॑स्य॒ तेजो॑ वै ब्रा॒ह्मण॑स्ते॒जः प॒यस्ते॒जसै॒व
 ते॒जः प॒य आ॒त्मन् ध॒त्ते ऽथो॑ प॒यसा॒ वै गर्भा॑ व॒र्द्धन्ते॒ गर्भ॑ इ॒व ख॒लु
 वा ए॒ष यद् दी॑क्षि॒तो यद॑स्य॒ पयो॑ व्र॒तं भ॑वत्या॒त्मान॑मे॒व तद् व॑र्द्धयति
 त्रि॒व्रतो॑ वै म॒नुरा॑सीद् द्वि॒व्रता॑ अ॒सुरा॑ ए॒कव्र॑ता- [] 27

TS 6.2.5.4

दे॒वाः प्रा॒तर्म॑द्ध्य॒न्दिने॑ सा॒यं तन् मनो॑र्व्र॒तमा॑सीत् पा॒कय॒ज्ञस्य॑ रू॒पं
 पु॒ष्च्यै॑ प्रा॒तश्च॑ सा॒यं चा॑सुराणां॒ निर्म॑द्ध्यं॒ क्षु॒धो रू॒पं त॒तस्ते॑ प॒रा
 ऽभ॑वन् म॒द्ध्य॒न्दिने॑ म॒द्ध्य॒रात्रे॑ दे॒वानां॑ त॒तस्ते॑ ऽभ॑वन्थु॒ सुव॑र्गं
 लो॒कमा॑यन्. यद॑स्य॒ मद्ध्य॒न्दिने॑ म॒द्ध्य॒रात्रे॑ व्र॒तं भ॑वति म॒द्ध्य॒तो वा

अ॒न्ने॒न भु॒ञ्ज॒ते म॒द्ध्य॒त ए॒व तदूर्जं॑ ध॒त्ते भ्रा॒तृ॒व्याभि॒भू॒त्यै

भ॒व॒त्या॒त्म॒ना- [] 28

TS 6.2.5.5

॥
प॒रा ऽस्य॑ भ्रा॒तृ॒व्यो भ॒वति॑ ग॒र्भो वा ए॒ष यद् दी॒क्षि॒तो यो॒नि
दी॒क्षि॒तवि॒मितं॑ यद् दी॒क्षि॒तो दी॒क्षि॒तवि॒मि॒तात् प्र॒वसे॒द् यथा॑ यो॒नेर्ग॒र्भः
स्क॒न्दति॑ ता॒दृगे॒व तन्न॑ प्र॒वस्त॒व्यमा॒त्म॒नो गो॒पी॒थायै॒ष वै व्याघ्रः॑
कु॒लगो॒पो यद॒ग्नि॒स्तस्मा॒द् यद् दी॒क्षि॒तः प्र॒वसे॒त् स ए॒नमी॒श्वरो॑ ऽनू॒त्थाय॑
ह॒न्तोर्न॑ प्र॒वस्त॒व्यमा॒त्म॒नो गु॒प्त्यै दक्षि॑णतः श॒य ए॒तद्-वै य॒ज॒मा॒नस्या॑
() ऽऽय॒त॒न॒स्व ए॒वाऽऽय॒त॒ने श॒ये ऽग्नि॑म॒भ्यावृ॒त्य श॒ये दे॒वता॑ ए॒व
य॒ज्ञम॒भ्यावृ॒त्य श॒ये ॥ 29

(ए॒तद्वै-कू॒र इ॒वै-क॒व्र॒ता-आ॒त्म॒ना-य॒ज॒मा॒नस्य॑-त्रयो॑दश च) (A5)

TS 6.2.6.1

पु॒रोह॒विषि॑ दे॒वय॒जने॑ या॒जये॒द्-यं का॒मये॒तोपै॒नमु॒त्तरो॑ य॒ज्ञो न॒मेद॒भि
सु॒वर्गं॑ लो॒कं ज॒येदि॒त्ये॒तद्-वै पु॒रोह॒विर्दे॒वय॒जनं॑ य॒स्य हो॒ता
प्रा॒तर॒नुवा॒क -म॒नुब्रु॒व-न्न॒ग्नि॒मप॑ आ॒दि॒त्यम॒भि वि॒पश्य॑त्यु॒पै॒नमु॒त्तरो॑
य॒ज्ञो न॒मत्य॑भि सु॒वर्गं॑ लो॒कं ज॒यत्या॒प्ते दे॒वय॒जने॑ या॒जये॒द् -

भ्रातृव्यवन्तं पन्थां वा ऽधिस्पर्शयेत् कर्तं वा यावन्नानसे

यातवै- [] 30

TS 6.2.6.2

न रथायैतद्-वा आप्तं देवयजनमाप्नोत्येव भ्रातृव्यं नैनं भ्रातृव्य
 आप्नोत्येकोन्नते देवयजने याजयेत् पशुकाम-मेकोन्नताद्-वै
 देवयजनादङ्गिरसः पशूनसृजन्तान्तरा सदोहविर्द्धाने उन्नतः
 स्यादेतद्-वा एकोन्नतं देवयजनं पशुमानेव भवति त्र्युन्नते देवयजने
 याजयेत् सुवर्गकामं त्र्युन्नताद्-वै देवयजनादङ्गिरसः सुवर्गं
 लोकमाय-न्नन्तरा ऽऽहवनीयं च हविर्द्धानं चो- [] 31

TS 6.2.6.3

-न्नतः स्यादन्तरा हविर्द्धानं च सदश्चान्तरा सदश्च गार्हपत्यं
 चैतद्-वै त्र्युन्नतं देवयजनं सुवर्गमेव लोकमेति प्रतिष्ठिते देवयजने
 याजयेत् प्रतिष्ठाकाममेतद्-वै प्रतिष्ठितं देवयजनं यथ सर्वतः समं
 प्रत्येव तिष्ठति यत्रान्याअन्या ओषधयो व्यतिषक्ताः स्यु स्तद्-याजयेत्
 पशुकाममेतद्-वै पशूनां रूपं रूपेणैवास्मै पशू- [] 32

TS 6.2.6.4

नव रुन्धे पशुमानेव भवति निर्ऋतिगृहीते देवयजने याजयेद्-यं
 कामयेत निर्ऋत्यास्य यज्ञं ग्राहयेयमित्येतद्-वै निर्ऋतिगृहीतं
 देवयजनं यथ् सदृश्यै सत्या ऋक्षं निर्ऋत्यैवास्य यज्ञं ग्राहयति
 व्यावृत्ते देवयजने याजयेद् व्यावृत्कामं यं पात्रे वा तल्पे वा
 मीमांसेरन् प्राचीनमाहवनीयात् प्रवणञ् स्यात् प्रतीचीनं
 गार्हपत्यादेतद्-वै व्यावृत्तं देवयजनं वि पाप्मना () भ्रातृव्येणा-
 ऽऽ*वर्तते नैनं पात्रे न तल्पे मीमांसन्ते कार्ये देवयजने
 याजयेद्-भूतिकामं कार्यो वै पुरुषो भवत्येव ॥ 33

(यातवै - हविर्धानं च - पशून् - पाप्मना - ऽष्टादश च) (A6)

TS 6.2.7.1

तेभ्य उत्तरवेदिः सिंही रूपं कृत्वोभया-नन्तराऽपक्रम्यातिष्ठत् ते
 देवा अमन्यन्त यतरान् वा इयमुपावथ्स्यति त इदं भविष्यन्तीति
 तामुपामन्त्रयन्त सा ऽब्रवीद् वरं वृणै सर्वान् मया कामान् व्यश्नवथ
 पूर्वा तु मा ऽग्नेराहुति-रश्नवता इति तस्मादुत्तरवेदिं पूर्वामग्ने-
 र्व्याघारयन्ति वारेवृत्ञ ह्यस्यै शम्यया परि मिमीते- [] 34

TS 6.2.7.2

मात्रै॒वास्यै॒ सा ऽथो॑ यु॒क्तेनै॒व यु॒क्तमव॑ रुन्धे वि॒त्ताय॑नी मे ऽसीत्या॑ह
 वि॒त्ता ह्ये॒नाना॑वत् ति॒क्ताय॑नी मे ऽसीत्या॑ह ति॒क्तान्. ह्ये॒नाना॑वद॒वता॑न्मा
 नाथि॑तमित्या॑ह नाथि॑तान्. ह्ये॒नाना॑वद॒वतान् मा व्यथि॑तमित्या॑ह
 व्यथि॑तान्. ह्ये॒नाना॑वद्-वि॒देर॒ग्निर्न॒भो नामा- [] 35

TS 6.2.7.3

ग्ने॑ अङ्गि॒र इति॑ त्रि॒र्. हर॑ति य ए॒वैषु॑ लो॒केष्व॒ग्नय॑-स्ताने॒वाव रुन्धे॑
 तूष्णीं॑ चतु॒र्थं ह॑रत्य॒नि-रु॒क्तमे॒वाव रुन्धे॑ सि॒ंहीर॑सि
 म॒हिषी॒रसीत्या॑ह सि॒ंहीर्ह्य॑षा रू॒पं कृ॒त्वोभया॑-नन्तरा॒ ऽप॒क्रम्या॑तिष्ठदु॒रु
 प्रथ॑स्वो॒रु ते य॒ज्ञप॑तिः प्रथ॒तामि॑त्या॒ह यज॑मानमे॒व प्र॒जया॑ प॒शुभिः॑
 प्रथ॑यति ध्रु॒वा- [] 36

TS 6.2.7.4

ऽसी॑ति स॒ं ह॑न्ति धृ॒त्यै दे॒वेभ्यः॑ शु॒न्धस्व॑ दे॒वेभ्यः॑ शु॒ंभस्वे॒त्यव॑
 चो॒क्षति॑ प्र च॒ किर॑ति शु॒द्ध्या॑ इन्द्र॒घोष॑स्त्वा वसु॒भिः पु॒रस्ता॑त्
 पा॒त्वित्या॑ह दि॒ग्भ्य ए॒वैनां॑ प्रो॒क्षति॑ दे॒वाश्चे॑दु-त्तर॒वेदि॒रुपा॑वव॒र्तीहै॒व

वि जयामहा इत्यसुरा वज्रमुद्यत्य देवानभ्यायन्त तानिन्द्रघोषो वसुभिः

पुरस्तादपा- [] 37

TS 6.2.7.5

-नुदत मनोजवाः पितृभिर्दक्षिणतः प्रचेता रुद्रैः
 पश्चाद्-विश्वकर्मा ऽऽदित्यैरुत्तरतो यदेवमुत्तरवेदिं प्रोक्षति दिग्भ्य
 एव तद्-यजमानो भ्रातृव्यान् प्र णुदत इन्द्रो यतीन्थ् सालावृकेभ्यः
 प्रायच्छत् तान् दक्षिणत उत्तरवेद्या आदन्. यत् प्रोक्षणीना-मुच्छिष्येत
 तद् दक्षिणत उत्तरवेद्यै नि नयेद्-यदेव तत्र क्रूरं तत् तेन शमयति
 यं द्विष्यात् तं ध्यायेच्छुचै () वैनमर्पयति ॥ 38

(मिमीते - नाम - ध्रुवा - ऽप - शुचा - त्रीणि च) (A7)

TS 6.2.8.1

सोत्तरवेदिरब्रवीथ् सर्वान् मया कामान् व्यश्नवथेति ते देवा
 अकामयन्तासुरान् भ्रातृव्यानभि भवेमेति ते ऽजुहवुः सि॒॒हीरसि
 सपत्नसाही स्वाहेति तेऽसुरान् भ्रातृव्या-नभ्यभवन् ते ऽसुरान्
 भ्रातृव्या-नभिभूयाकामयन्त प्रजां विन्देमहीति ते ऽजुहवुः सि॒॒हीरसि
 सुप्रजावनिः स्वाहेति ते प्रजामविन्दन्त ते प्रजां वित्त्वा- [] 39

TS 6.2.8.2

ऽकामयन्त प॒शून्. वि॒न्देम॒हीति॑ ते ऽजु॒हवुः॑ सि॒॒॒ही॒रसि॑ रा॒यस्पोष॑वनिः
 स्वा॒हेति॑ ते प॒शून्वि॒न्दन्त॑ ते प॒शून्. वि॒त्त्वाऽकाम॑यन्त प्रति॒ष्ठां
 वि॒न्देम॒हीति॑ ते ऽजु॒हवुः॑ सि॒॒॒ही॒रस्या॑दि॒त्यव॑निः स्वा॒हेति॑ त इ॒मां
 प्रति॒ष्ठाम॑वि॒न्दन्त॑ त इ॒मां प्रति॒ष्ठां वि॒त्त्वा ऽकाम॑यन्त दे॒वता॑ आ॒शिष॑
 उपे॒यामे॑ति तेऽजु॒हवुः॑ सि॒॒॒ही॒रस्या॑ वह॒ दे॒वान् दे॒वय॑ते- [] 40

TS 6.2.8.3

यज॑मानाय स्वा॒हेति॑ ते दे॒वता॑ आ॒शिष॑ उपा॒यन् प॒ञ्च कृ॒त्वो
 व्याघा॑रयति प॒ञ्चाक्ष॑रा प॒ङ्क्तिः॑ पा॒ङ्क्तो य॒ज्ञो य॒ज्ञमे॒वाव रु॒न्धे ऽक्ष॑णया
 व्याघा॑रयति तस्मा॑दक्ष॒णया॑ प॒शवो॑ ऽङ्गानि॒ प्र हर॑न्ति प्रति॒ष्ठित्यै॑
 भू॒तेभ्य॑स्त्वेति॒ स्रुच॑मु॒द्धृत्वा॑ति य ए॒व दे॒वा भू॒तास्तेषां॑ तद्-भा॒गधे॒यं
 ताने॒व तेन॑ प्रीणाति॒ पौतु॑द्र॒वान् परि॒धीन् परि॑ दधात्येषां- [] 41

TS 6.2.8.4

लो॒कानां॑ वि॒धृत्या॑ अ॒ग्नेस्त्रयो॑ ज्याया॒सो भ्रा॑तर आ॒सन् ते
 दे॒वेभ्यो॑ ह॒व्यं व॑हन्तः प्रा॒मीय॑न्त सौ ऽग्नि॑र॒बिभे॑दित्थं वा॒व
 स्य आ॒र्तिमा॑ ऽरि॒ष्यती॑ति स॒ निला॑यत स॒ यां व॑नस्पति॒ष्वव॑सत् तां

पू॒तु॒द्रौ॒ या॒मो॒ष॒धी॒षु॒ ता॒ꣳ सु॒ग॒न्धि॒ते॒ज॒ने॒ यां॒ प॒शु॒षु॒ तां॒ पे॒त्व॒स्या॒न्त॒रा
शृ॒ङ्गे॒ तं॒ दे॒व॒ताः॒ प्रै॒ष॒मै॒च्छ॒न् त॒म॒न्व॒वि॒न्द॒न् त॒म॒ब्रु॒व- [] 42

TS 6.2.8.5

-न्नु॒प॒ न॒ आ॒ वर्त॒स्व॒ ह॒व्यं॒ नो॒ व॒हे॒ति॒ सो॑ ऽब्र॒वी॒द् व॒रं॒ वृ॒णै
य॒दे॒व॒ गृ॒ही॒त॒स्या॒हु॒त॒स्य॒ ब॒हिः॒प॒रि॒धि॒ स्क्व॒न्दा॒त् त॒न्मे॒ भ्रा॒तृ॒णां
भा॒ग॒धे॒य॒म॒स॒दि॒ति॒ त॒स्मा॒द्-य॒द्-गृ॒ही॒त॒स्या॒हु॒त॒स्य॒ ब॒हिः॒प॒रि॒धि
स्क्व॒न्द॒ति॒ तेषां॑ तद् भा॒ग॒धे॒यं॒ ता॒ने॒व॒ ते॒न॒ प्री॒णा॒ति॒ सो॑ऽम॒न्य॒ता॒स्थ॒न्व॒न्तो॑
मे॒ पूर्वे॑ भ्रा॒तरः॑ प्रा॒मेष॑ता॒स्थानि॑ शा॒त॒या॒ इति॑ स॒ या॒न्य- [] 43

TS 6.2.8.6

-स्था॒न्य॒शा॒त॒य॒त॒ तत् पू॒तु॒द्रव॑-भ॒व॒द्-य॒न्मा॒ꣳस॑-मु॒प॒मृ॒तं॒ तद्-गु॒ल्गु॒लु
य॒दे॒ता॒न्थ् सं॒भा॒रा॒न्थ् सं॒ भ॒र॒त्य॒ग्नि॒मे॒व॒ तथ् सं॒भ॒र॒त्य॒ग्नेः॑ पु॒री॒ष-
म॒सी॒त्या॒हा॒ग्ने॒र्ह्य॑तत् पु॒री॒षं॑ यथ् सं॒भा॒रा॒ अथो॑ ख॒ल्वा॒हु॒रे॒ते॒ वा॒वैनं॑ ते
भ्रा॒तरः॑ प॒रि॒ शे॒रे॒ यत् पौ॒तु॒द्र॒वाः॑ प॒रि॒ध॒य॒ इति॑ ॥ 44

(वि॒त्त्वा - दे॒व॒य॒त - ए॒षा - म॒ब्रु॒वन् - या॒नि - च॒तु॒श्च॒त्वा॒रि॒ꣳश॒च्च)
(A8)

TS 6.2.9.1

बद्धमव॑ स्यति॑ वरुणपा॒शादे॑वैने॑ मुञ्चति॑ प्र णेनेक्ति॑ मेद्ध्ये॑ ए॒वैने॑
 करोति॑ सावि॒त्रिय॑र्चा हु॒त्वा ह॑विर्द॒धाने॑ प्र॒ वर्त॑यति॒ सवि॑तृप्रसूत॒ ए॒वैने॑
 प्र॒ वर्त॑यति॒ वरु॑णो वा ए॒ष दु॒र्वागु॑भयतो॒ बद्धो॑ यदक्षः॒ स
 यदु॒थ्सर्जे॑द्-यज॑मानस्य॒ गृहा॑-नभ्यु॒थ्सर्जे॑त् सु॒वाग् दे॒व दु॒र्याꣳ
 आ व॒देत्या॑ह॒ गृहा॑ वै दु॒र्याः॑ शान्त्यै॒ पत्न्यु॑- [] 45

TS 6.2.9.2

-पान॑क्ति॒ पत्नी॑ हि सर्व॑स्य॒ मित्रं॑ मि॒त्रत्वाय॑ यद्-वै पत्नी॑ य॒ज्ञस्य॑ करोति॒
 मिथु॑नं तदथो॒ पत्न्या॑ ए॒वैष॑ य॒ज्ञस्या॑-न्वारं॒भोऽन॑वच्छि॒त्यै वर्त्म॑ना वा
 अ॒न्वित्य॑ य॒ज्ञꣳ रक्षाꣳ॑सि जिघाꣳ॑सन्ति॒ वैष्ण॑वीभ्या॒मृग्भ्यां॑ व॒र्त्मनो॑
 जु॒होति॑ य॒ज्ञो वै विष्णु॑र्य॒ज्ञादे॒व रक्षाꣳ॑स्यप॒ हन्ति॑ यद॒ध्वर्यु॑-र॒नग्ना-
 वाहु॑तिं जुहु॒या-द॒न्धोऽध्व॑र्युः स्याद्-रक्षाꣳ॑सि॒ य॒ज्ञꣳ ह॒न्युर्- [] 46

TS 6.2.9.3

-हिर॑ण्यमु॒पास्य॑ जुहोत्य॒ग्नित्ये॒व जु॑होति॒ नान्धो॑ ऽध्व॒र्युर्भव॑ति॒ न
 य॒ज्ञꣳ रक्षाꣳ॑सि घ्नन्ति॒ प्राची॑ प्रेत॒मध्व॑रं क॒ल्पय॑न्ती॒ इत्या॑ह
 सु॒वर्ग॑मे॒वैने॑ लो॒कं ग॑मयत्यत्र॒ रमे॑थां व॒र्ष्मन् पृ॑थिव्या॒ इत्या॑ह॒ वर्ष्म॑

ह्येतत् पृथिव्या यद् देवयजनञ् शिरो वा एतद्-यज्ञस्य यद्धविर्धानं
दिवो वा विष्णवुत वा पृथिव्या- [] 47

TS 6.2.9.4

इत्याशीर्षदयर्चा दक्षिणस्य हविर्धानस्य मेथीं नि हन्ति शीर्षत
एव यज्ञस्य यजमान आशिषो ऽव रुन्धे दण्डो वा औपरस्तृतीयस्य
हविर्धानस्य वषट्कारे-णाक्ष-मच्छिनद्-यत्-तृतीयं छदिर्.
हविर्धानयो-रुदाहियते तृतीयस्य हविर्धानस्यावरुद्ध्यै शिरो वा
एतद्-यज्ञस्य यद्धविर्धानं विष्णो रराटमसि विष्णोः पृष्ठमसीत्याह
तस्मादेतावद्धा शिरो विष्यूतं विष्णोः () स्यूरसि
विष्णो ध्रुवमसीत्याह वैष्णवञ् हि देवतया हविर्धानं यं प्रथमं
ग्रन्थिं ग्रथनीयाद्-यत् तं न विस्रञ् सयेदमेहेनाद्ध्वर्युः प्र मीयेत
तस्मात् स विस्रस्यः ॥ 48

(पत्नी -हन्यु-र्वा पृथिव्या-विष्यूतं विष्णोः-षड्विंशतिश्च) (A9)

TS 6.2.10.1

देवस्य त्वा सवितुः प्रसव इत्यग्निमा दत्ते प्रसूत्या
अश्विनोर्बाहुभ्यामित्याहाश्विनौ हि देवानामद्ध्वर्यु आस्तां पूष्णो

हस्ताभ्यामित्याह यत्यै वज्र इव वा एषा यदभिरभिरसि
 नारिरसीत्याह शान्त्यै काण्डेकाण्डे वै क्रियमाणे यज्ञञ् रक्षाञ्सि
 जिघाञ्सन्ति परिलिखितञ् रक्षः परिलिखिता अरातय इत्याह
 रक्षसामपहत्या- [] 49

TS 6.2.10.2

इदमहञ् रक्षसो ग्रीवा अपि कृन्तामि यौ ऽस्मान् द्वेष्टि यं च वयं
 द्विष्म इत्याह द्वौ वाव पुरुषौ यं चैव द्वेष्टि यश्चैनं द्वेष्टि तयोरेवा-
 नन्तरायं ग्रीवाः कृन्तति दिवे त्वा ऽन्तरिक्षाय त्वा पृथिव्यै त्वेत्याहैभ्य
 एवैनां लोकेभ्यः प्रोक्षति परस्तादर्वाचीं प्रोक्षति तस्मात्- [] 50

TS 6.2.10.3

परस्तादर्वाचीं मनुष्या ऊर्जमुप जीवन्ति क्रूरमिव वा एतत् करोति
 यत् खनत्यपो ऽव नयति शान्त्यै यवमतीरव नयत्यूर्ग्वै यव
 ऊर्गुदुंबर ऊर्जेवोर्जञ् समर्द्धयति यजमानेन सम्मितौदुंबरी भवति
 यावानेव यजमानस्तावती-मेवास्मि-न्नूर्जं दधाति पितृणाञ्
 सदनमसीति बर्.हिरव स्तृणाति पितृदेवत्या(1)ञ्- [] 51

TS 6.2.10.4

ह्येतद्-यन्निखातं यद्-बर्.हिरनवस्तीर्य मिनुयात् पितृदेवत्या
निखाता स्याद्-बर्.हिरवस्तीर्य मिनोत्यस्यामेवैनां मिनोत्यथो
स्वारुहमेवैनां करोत्युद्-दिवः स्तभानाऽऽ *न्तरिक्षं पृणेत्याहैषां
ँलोकानां विधृत्यै द्युतानस्त्वा मारुतो मिनोत्वित्याह द्युतानो ह
स्म वै मारुतो देवानामौदुंबरीं मिनोति तेनैवै- [] 52

TS 6.2.10.5

-नां मिनोति ब्रह्मवनिं त्वा क्षत्रवनिमित्याह यथायजुरेवैतद् घृतेन
द्यावापृथिवी आ पृणेत्यामित्यौदुंबर्यां जुहोति द्यावापृथिवी एव
रसेनानक्त्या-न्तमन्व-वस्रावयत्यान्तमेव यजमानं तेजसा
ऽनक्त्यैन्द्रमसीति छदिरधि नि दधात्यैन्द्रं हि देवतया सदो
विश्वजनस्य छायेत्याह विश्वजनस्य ह्येषा छाया यथ् सदो
नवछदि- [] 53

TS 6.2.10.6

तेजस्कामस्य मिनुयात् त्रिवृता स्तोमेन सम्मितं तेजस्त्रिवृत् तेजस्व्येव
भव-त्येकादश-छदीन्द्रियकाम-स्यैकादशाक्षरा त्रिष्टुगिन्द्रियं

त्रिष्टु॑गिन्द्रि॒याव्ये॑व भवति पञ्चदश॑छदि भ्रातृ॑व्यवतः पञ्चदशो॑ वज्रो
 भ्रातृ॑व्याभिभू॒त्यै सप्त॑दशछदि प्रजा॑कामस्य सप्तदशः॑ प्रजापतिः
 प्रजा॑पतेराप्त्या एकविंश॑तिछदि प्रतिष्ठा॑काम-स्यैकविंशः॑ स्तोमानां
 प्रतिष्ठा॑ प्रतिष्ठित्या उ॒दरं॑ वै सद॒ ऊर्गु॑दुंबरो मद्ध्यत॑ औदुंबरीं॑ मिनोति
 मद्ध्यत॑ ए॒व प्र॒जाना॑मूर्जं दधाति॑ तस्मान्- [] 54

TS 6.2.10.7

मद्ध्यत॑ ऊर्जा भुञ्जते॑ यजमानलोके॒ वै दक्षि॑णानि छदीं॑षि
 भ्रातृ॑व्यलोक उत्तराणि॑ दक्षिणान्युत्तराणि॑ करोति॒ यजमान॑-मेवा-
 यजमाना॑दुत्तरं करोति॒ तस्माद् यजमानो॑ऽयजमाना॑दुत्तरो ऽन्तर्वर्तान्
 करोति॒ व्यावृ॑त्त्यै तस्माद॑रण्यं प्रजा॑ उप जीवन्ति॒ परि॑ त्वा गिर्वणो
 गिर॑ इत्याह॒ यथा॑यजुरे॒वैतदिन्द्र॑स्य॒ स्यूर॑सीन्द्रस्य॒ ध्रुव॑मसीत्याहैन्द्रं॑
 हि दे॒वतया॑ सदो () यं प्रथ॑मं ग्रन्थिं॑ ग्रथ्नीयाद्-यत् तं न
 विस्र॑स्ये-दमेहेनाद्ध्वर्युः॑ प्र मीयेत॒ तस्मात् स॑ विस्रस्यः॑ ॥ 55

(अप॑हत्यै - तस्मात् - पितृ॑देवत्यं - तेनै॑व - नव॑छदि - तस्मात्
 - सदः॑ - पञ्चदश॑ च) (A10)

TS 6.2.11.1

शि॒रो वा ए॒तद्-य॒ज्ञस्य॒ यद्ध॑वि॒र्धानं॑ प्रा॒णा उप॒रवा॑ ह॒विर्धा॑ने
 खाय॑न्ते तस्मा॑च्छी॒र्षन् प्रा॒णा अध॑स्तात् खाय॑न्ते
 तस्मा॑दध॒स्ताच्छी॒र्षाः प्रा॒णा रक्षो॑ह॒णो व॒लग॒हनो॑ वैष्ण॒वान्
 ख॒नामी॑त्याह वैष्ण॒वा हि दे॒वत॑यो॒पर॒वा अ॒सुरा॑ वै नि॒र्यन्तो॑ दे॒वानां॑
 प्रा॒णेषु॑ व॒लगान् न्य॒खन॑न् तान् बा॒हुमा॒त्रे ऽन्व॑वि॒न्दन् तस्मा॑द् बा॒हुमा॒त्राः
 खाय॑न्त इ॒दम॒हं तं व॑लग॒मुद्-व॑पामि- [] 56

TS 6.2.11.2

यं नः॑ स॒मानो॑ य-म॒स॒मानो॑ नि॒च॒खाने॑त्याह द्वौ वाव॑ पु॒रुषौ॑
 यश्चै॒व स॒मानो॑ यश्चा॒स॒मानो॑ यमे॒वास्मै॑ तौ व॒लगं॑ नि॒खन॑त॒स्तमे॒वोद्-
 व॒पति॑ सं तृ॒णति॑ तस्मा॑त् सन्तृ॒ण्णा अ॒न्तर॑तः प्रा॒णा न सं भि॑नति
 तस्मा॑दसं॒भिन्नाः॑ प्रा॒णा अ॒पो ऽव॑ न॒यति॑ तस्मा॑दा॒र्द्रा अ॒न्तर॑तः प्रा॒णा
 यव॑मती॒रव॑ न॒य- [] 57

TS 6.2.11.3

-त्यूर्गे॑ यवः प्रा॒णा उप॒रवाः॑ प्रा॒णेष्वे॒वोर्जं॑ दधाति ब॒र्हि॒रव॑ स्तृणाति
 तस्मा॑ल्लो॒मशा॑ अ॒न्तर॑तः प्रा॒णा आ॒ज्ये॑न॒ व्याघा॑रयति ते॒जो वा आ॒ज्यं॑

प्राणा उपरवाः प्राणेष्वेव तेजो दधाति हनू वा एते यज्ञस्य
यदधिषवणे न सं तृणत्यसन्तृण्णे हि हनू अथो खलु दीर्घसोमे
संतृद्ये धृत्यै शिरो वा एतद्-यज्ञस्य यद्धविर्द्धानं- [] 58

TS 6.2.11.4

प्राणा उपरवा हनू अधिषवणे जिह्वा चर्म ग्रावाणो दन्ता
मुखमाहवनीयो नासिको-त्तरवेदि-रुदरꣳ सदो यदा खलु वै
जिह्वया दथस्वधि खादत्यथ मुखं गच्छति यदा मुखं गच्छत्यथोदरं
गच्छति तस्माद्धविर्द्धाने चर्मन्नधि ग्रावभि-रभिषुत्याऽऽहवनीये हुत्वा
प्रत्यञ्चः परेत्य सदसि भक्षयन्ति यो वै विराजो यज्ञमुखे दोहं वैद
दुह एवै () नामियं वै विराट् तस्यै त्वक् चर्मोधो ऽधिषवणे
स्तना उपरवा ग्रावाणो वथ्सा ऋत्विजो दुहन्ति सोमः पयो
य एवं वैद दुह एवैनां ॥ 59

(वपामि-यवमतीरव नयति-हविर्द्धानं-मेव-त्रयोविꣳशतिश्च) (A11)

Prasna Korvai with starting Padams of 1 to 11 Anuvaakams :-

(यदु॒भौ - दे॒वा॒सु॒रा मि॒थ - स्तेषा॑ꣳ - सु॒वर्गं - य॑द्वा अ॒नी॒शानः
- पु॒रोह॑वि॒षि - तेभ्यः॑ - सो॒त्तर॑वे॒दि - ब॒द्धन् - दे॒वस्या॑भि॒न् व॑ज्रः
- शि॒रो वा - ए॒काद॑श)

Korvai with starting Padams of 1, 11, 21 Series of Panchaatis :-

(यदु॒भा - वि॒त्याह॑ दे॒वानां॑ - य॒ज्ञो दे॒वेभ्यो॑ - न रथा॑य -
यज॑मानाय - प॒रस्ता॑दर्वा॒ची - न्न॑व पञ्चा॒शत्)

First and Last Padam of Second Prasnam of 6th Kandam

(यदु॒भौ - दु॒ह ए॒वैनां॑)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां षष्ठकाण्डे द्वितीयः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

6.3 षष्ठकाण्डे तृतीयः प्रश्नः – सोममन्त्रब्राह्मणनिरूपणं

TS 6.3.1.1

चा॒त्वाला॒द्-धि॒ष्णिया॒नुप॑ व॒पति॑ यो॒निर्वै॑ य॒ज्ञस्य॑ चा॒त्वालं॑ य॒ज्ञस्य॑
सयो॒नित्वा॑य दे॒वा वै य॒ज्ञं परा॑ ऽज॒यन्त॑ तमा॒ग्नीद्ध्रात्॑ पु॒नरपा॑ज॒यन्नेतद्
वै य॒ज्ञस्या-परा॑जितं॒ यदा॒ग्नीद्ध्रं॑ यदा॒ग्नीद्ध्राद्-धि॒ष्णिया॒न्. वि॒हरति॑
यदे॒व य॒ज्ञस्या-परा॑जितं॒ तत॑ ए॒वैनं॑ पु॒नस्तनु॑ते परा॒जित्ये॑व॒ खलु॑ वा
ए॒ते यन्ति॑ ये॒ बहि॑ष्पव॒मान् सर्प॑न्ति॒ बहि॑ष्पव॒माने॑ स्तु॒त- [] 1

TS 6.3.1.2

आ॒हाग्नी॒दग्नी॑न्. वि॒ हर॑ ब॒र्हिः स्तृ॑णाहि॒ पुरो॒डाशा॑ अ॒लं कु॑र्विति॑
य॒ज्ञमे॒वाप॑जित्य॒ पुन॑स्तन्वा॒ना य॒न्त्यङ्गारै॑र्द्वे॒ सव॑ने॒ वि हर॑ति
श॒लाका॑भि-स्तृ॒तीयं॑ स॒शुक्र॑त्वायाथो॒ सं भर॑त्ये॒वैनद्-धि॒ष्णिया॒
वा अ॒मुष्मि॑न् लो॒के सो॑ममर॒क्षन् ते॒भ्योऽधि॑ सो॒ममाऽहर॑न् त
मन्व॒वाय॑न् तं॒ पर्य॑वि॒शन्. य॒ एवं॑ वे॒द वि॒न्दते॑- [] 2

TS 6.3.1.3

परिवेष्टारं॑ ते सोमपी॑थेन॒ व्या॑र्द्ध्यन्त॒ ते दे॒वेषु॑ सोमपी॒थमै॑च्छन्त॒ तान्
 दे॒वा अ॑ब्रुवन्॒ द्वेद्वे॑ नाम॒नी कुरु॑र्ध्वमथ॒ प्र वा ऽऽ॒फस्य॑थ॒ न वेत्य॒ग्नयो॑
 वा अथ॒ धिष्णि॑यास्तस्माद् द्विना॑मा॒ ब्राह्म॑णो ऽर्धु॑कस्तेषां॒ ये नेदि॑ष्ठं
 पर्य॑विशन्॒ ते सोम॑पीथं॒ प्राऽऽ॒प्नुव॑न्नाहवनी॒य आ॒ग्नी॒र्ध्वीयो॑ हो॒त्रीयो॑
 मा॒र्जा॒लीय॑स्तस्मात् तेषु॑ जुह्वत्यतिहाय॒ वषट्॑ करोति॒ वि ह्ये॑- [] 3

TS 6.3.1.4

-ते सोमपी॑थेनाऽऽर्द्ध्यन्त॒ दे॒वा वै याः प्रा॑ची-राहु॒ती-रजु॑हवुर्ये
 पुरस्ता॑दसुरा॒ आस॑न् ता॒ स्ताभिः॑ प्राणु॒दन्त॒ याः प्र॑तीची॒र्ये प॒श्चाद॑सुरा
 आस॑न् ता॒ स्ताभि-॑रपानु॒दन्त॒ प्राची॑रन्या आहु॒तयो॑ हूयन्ते
 प्रत्य॑ङ्ङासीनो॒ धिष्णि॑यान् व्याघारयति॒ पश्चा॑च्चैव पुरस्ता॒च्च यज॑मानो
 भ्रातृ॑व्यान् प्र णु॒दते॒ तस्मात्॑ परा॒चीः प्र॒जाः प्र वी॑यन्ते प्रतीची- [] 4

TS 6.3.1.5

जायन्ते प्रा॒णा वा ए॒ते यद्-धिष्णि॑या॒ यद॑र्ध्वर्युः प्रत्य॑ङ् धिष्णि॒या-
 नति॑सर्पेत् प्रा॒णान्थ् सं क॑र्षेत् प्र॒मायु॑कः स्यान्नाभिर्वा ए॒षा य॒ज्ञस्य॑
 यद्धो॑तोर्ध्वः खलु॒ वै नाभ्यै॑ प्रा॒णो ऽवा॑ङ्पानो॒ यद॑र्ध्वर्युः प्रत्य॑ङ्

हो॒ता॒र॒म॒ति॒स॒र्पे॒द॒पा॒ने प्रा॒णं द॒ध्यात् प्र॒मा॒यु॒कः स्या॒न्ना॒द्ध्व॒र्यु॒रु॒प॒ गा॒येद्
वा॒ग्वी॒र्यो वा अ॒द्ध्व॒र्यु-र्य॑द॒ध्व॒र्यु-रु॒प॒गा॒ये-दु॒द्गा॒त्रे- [] 5

TS 6.3.1.6

वा॒च॒ सं प्र॒ य॒च्छे-दु॒प॒दा॒सु॒का ऽस्य॒ वा॒ख् स्या॒द्-ब्र॒ह्म॒वा॒दि॒नो वद॑न्ति
ना॒स॒ स्थि॑ते सो॒मै॒ऽद्ध्व॒र्युः प्र॒त्य॒ङ्ख् स॒दो ऽती॑या॒दथ॑ क॒था दा॑क्षि॒णानि॒
हो॒तु॒मे॒ति या॒मो हि स॒ तेषां॑ क॒स्मा अ॒ह दे॒वा या॒मं वा॑ ऽया॒मं वा॑ ऽनु
जा॒स्य॒न्ती॒त्यु-त्त॑रे॒णाऽऽग्नी॑द्ध्रं प॒री॒त्य जु॒होति॑ दा॒क्षि॒णानि॒ न
प्रा॒णान्थ् सं क॑र्ष॒ति न्य॑न्ये धि॒ष्णि॒या उ॒प्यन्ते॒ () ना॒न्ये या॒न् नि॒वप॑ति
ते॒न ता॒न् प्री॑णाति॒ या॒न् न नि॒वप॑ति॒ यद॑नुदि॒शति॒ ते॒न ता॒न् ॥ 6

(स्तु॒ते - वि॒न्दते॒ - हि - वी॑यन्ते प्र॒ती॒ची - रु॒द्ग्रा॒त्र - उ॒प्यन्ते -
चतु॑र्दश च) (A1)

TS 6.3.2.1

सु॒व॒र्गा॒य वा ए॒तानि॑ लो॒काय॑ हू॒यन्ते॒ यद् वै॑स॒र्ज॒नानि॒ द्वाभ्यां॑
गा॒र्ह॒प॒त्ये जु॒होति॑ द्वि॒पाद् य॒ज॒मा॒नः प्र॑तिष्ठि॒त्या आ॒ग्नी॑द्ध्रे
जु॒होत्य॑न्तरि॒क्ष ए॒वाऽऽक॑र॒मत आ॒ह॒व॒नी॒ये जु॒होति॑ सु॒व॒र्ग॒मे॒वैनं॑ लो॒कं

गमयति देवान्. वै सुवर्गं लोकं यतो रक्षाऽस्यजिघाऽसन् ते
सोमेन राज्ञा रक्षाऽस्यपहत्याप्तु-मात्मानं कृत्वा सुवर्गं लोकमायन्
रक्षसा-मनुपलाभायाऽऽत्तः सोमो भवत्यथ- [] 7

TS 6.3.2.2

वैसर्जनानि जुहोति रक्षसामपहत्यै त्वऽ सोम तनूकृद्भ्य इत्याह
तनूकृद्ध्येष द्वेषोभ्यो ऽन्यकृतेभ्य इत्याहान्यकृतानि हि रक्षाऽस्युरु
यन्ता ऽसि वरूथमित्याहोरु ण स्कृधीति वावैतदाह जुषाणो
अप्तराज्यस्य वेत्वित्याहाप्तुमेव यजमानं कृत्वा सुवर्गं लोकं
गमयति रक्षसा-मनुपलाभायाऽऽ सोमं ददत- [] 8

TS 6.3.2.3

आ ग्राव्.ण्ण आ वायव्यान्या द्रोणकलशमुत् पत्नीमा नयन्त्यन्वनाऽसि
प्र वर्तयन्ति यावदेवास्यास्ति तेन सह सुवर्गं लोकमेति
नयवत्यर्चा ऽऽग्नीद्ध्रे जुहोति सुवर्गस्य लोकस्याभिनीत्यै ग्राव्.ण्णो
वायव्यानि द्रोणकलशमाग्नीद्ध्र उप वासयति वि ह्येनं तैर्गृह्णते यथ्
सहोपवासये-दपुवायेत सौम्यर्चा प्र पादयति स्वयै- [] 9

TS 6.3.2.4

-वैनं देवतया प्र पादयत्यदित्याः सदोऽस्यदित्याः सद आ सीदेत्याह
यथायजुरेवैतद्-यजमानो वा एतस्य पुरा गोप्ता भवत्येष वो देव
सवितः सोम इत्याह सवितृप्रसूत एवैनं देवताभ्यः सं प्र यच्छत्येतत्
त्वञ् सोम देवो देवानुपागा इत्याह देवो ह्येष सन्- [] 10

TS 6.3.2.5

देवानुपैतीदमहं मनुष्यो मनुष्यानित्याह मनुष्यो(1) ह्येष सन्
मनुष्यानुपैति यदेतद् यजुर्न ब्रूयादप्रजा अपशुर्यजमानः स्याथ्
सह प्रजया सह रायस्पोषेणेत्याह प्रजयैव पशुभिः सहेमं
लोकमुपावर्तते नमो देवेभ्य इत्याह नमस्कारो हि देवानाञ्
स्वधा पितृभ्य इत्याह स्वधाकारो हि- [] 11

TS 6.3.2.6

पितृणामिदमहं निर्वरुणस्य पाशादित्याह वरुणपाशादेव निर्मुच्यते
ऽग्ने व्रतपत आत्मनः पूर्वा तनूरादेयेत्याहुः को हि तद्-वेद यद्
वसीयान्थ् स्वे वशे भूते पुनर्वा ददाति न वेति ग्रावाणो वै सोमस्य

राज्ञो॑ मलि॑म्लु॒से॒ना॒ य॒ ए॒वं॑ वि॒द्वान्॑ ग्रा॒व्.ण्ण॑ आ॒ग्नी॑द्ध्र॒ उप॒वा॒स॒य॒ति॒
नैनं॑ मलि॑म्लु॒से॒ना॒ वि॒न्दति॑ () ॥ 12

(अथ॑-द॒दते॑ - स्व॒या - स॒न्थ् - स्व॑धा॒कारो॑ हि - वि॒न्दति॑) (A2)

TS 6.3.3.1

वै॒ष्ण॒व्य॒र्चा॑ हु॒त्वा॑ यू॒प॒म॒च्छै॑ति॒ वै॒ष्ण॒वो॑ वै दे॒व॒त॒या॒ यू॒पः॑ स्व॒यै॒वैनं॑
दे॒व॒त॒या॒ ऽच्छै॑त्य॒त्य॒न्या॒नगां॑ ना॒न्या-नु॒पा॒गा॒मि॒त्या॒हा॒ति॒ ह्य॒न्या॒ने॒ति॒ ना॒न्या-
नु॒पै॒त्य॒र्वाक् त्वा॒ परै॑र॒वि॒दं॒ परो॑ ऽव॒रै॒रि॒त्या॒हा॒र्वा॒ग्घ्ये॑नं॒ परै॑र्वि॒न्दति॑
परो॑ ऽव॒रै॒स्तं॑ त्वा॒ जु॒षे- [] 13

TS 6.3.3.2

वै॒ष्ण॒वं॑ दे॒व॒य॒ज्या॒या॒ इ॒त्या॒ह॑ दे॒व॒य॒ज्या॒यै॒ ह्ये॑नं॒ जु॒षते॑ दे॒व॒स्त्वा॑ स॒वि॒ता
म॒द्ध्वा॑ ऽन॒त्वि॒त्या॒ह॑ ते॒ज॒सै॒वैन-म॒न॒क्त्यो॑ष॒धे॒ त्रा॒य॒स्वैन॑ ऽ स्व॒धि॒ते
मै॒न॑ ऽ हि॒ ऽसी॒रि॒त्या॒ह॑ व॒ज्रो॑ वै स्व॒धि॒तिः॑ शा॒न्त्यै॑ स्व॒धि॒ते॒र्वृ॒क्ष॒स्य
बि॒भ्य॒तः॑ प्र॒थ॒मे॒न॒ श॒क॒ले॒न॒ स॒ह॑ ते॒जः॑ प॒रा॑ प॒त॒ति॒ यः॑ प्र॒थ॒मः॑ श॒क॒लः॑
प॒रा॒प॒ते॒त् त॒म॒प्या॑ ह॒रे॒थ् स॒ते॒ज॒स- [] 14

TS 6.3.3.3

-मे॒वैन॒मा॒ हर॒ती॒मे॒ वै॒ लो॒का॒ यू॒पात् प्र॒यतो॑ बि॒भ्यति॑ दि॒वम॒ग्रेण॑ मा
ले॒खी॒रन्त॑रि॒क्षं म॒द्ध्ये॑न॒ मा हि॑ँ॒सी॒रित्या॑है॒भ्य ए॒वैनं॑ँ लो॒के॒भ्यः
शम॑यति॒ वन॑स्पते॒ शत॑वल्.शा॒ वि रो॒हेत्या॑व्रश्च॒ने जु॒होति॑ तस्मा॒-
दा॒व्रश्च॑नाद्-वृ॒क्षाणां॑ भू॒याँस॒ उ॒त् ति॒ष्ठन्ति॑ स॒हस्र॑वल्.शा॒ वि व॒यँ
रु॒हे॒मेत्या॑हा ऽऽशि॒षमे॒वैता॑मा॒ शा॒स्ते ऽन॑क्षसङ्गं- [] 15

TS 6.3.3.4

ँवृ॒श्चेद्-य॑दक्षसङ्गंँ वृ॒श्चे॑द॒धर्ई॑षंँ य॒ज॒मा॒नस्य॑ प्र॒मायु॑कँ स्याद्-यं
का॒मये॑ताप्रतिष्ठितः स्यादित्या॒रोहं॑ तस्मै॑ वृ॒श्चे॑देष॒ वै वन॑स्पती॒ना-
म॒प्रति॑ष्ठितोऽप्रतिष्ठित॒ एव॑ भवति॒ यं का॒मये॑तापशुः स्यादित्य॒पर्णं॑ तस्मै॒
शु॒ष्काग्रंँ॑ वृ॒श्चे॑देष॒ वै वन॑स्पती॒ना-म॒पश॑व्यो ऽपशु॒रेव॑ भवति॒ यं का॒मये॑त
पशु॒मान्थ् स्या॒दिति॑ बहु॒पर्णं॑ तस्मै॑ बहु॒शाखंँ॑ वृ॒श्चे॑देष॒ वै- [] 16

TS 6.3.3.5

वन॑स्पती॒नां प॒शव्यः॑ पशु॒माने॒व भ॑वति॒ प्रति॑ष्ठितंँ वृ॒श्चे॑त्
प्रति॑ष्ठाका॒मस्यै॑ष॒ वै वन॑स्पती॒नां प्रति॑ष्ठितो॒ यः स॒मे भू॒म्यै
स्वाद्-यो॑ने॒ रूढः॑ प्रत्ये॒व ति॑ष्ठति॒ यः प्र॒त्यङ्गु॑प॒नत॑स्तंँ वृ॒श्चे॑त् स हि

मे॒ध॒म॒भ्यु॒प॒न॒तः॑ प॒ञ्च॒ार॒न्निं॑ तस्मै॒ वृ॒श्चेद्-यं॑ का॒म॒ये॒तो॒पै॒न॒मु॒त्त॒रो॑ य॒ज्ञो॑
न॒मे॒दि॒ति॒ प॒ञ्चा॒क्ष॒रा॒ प॒ङ्क्तिः॑ पा॒ङ्क्तो॑ य॒ज्ञ उ॒पै॒न॒मु॒त्त॒रो॑ य॒ज्ञो- [] 17

TS 6.3.3.6

न॒म॒ति॒ ष॒ड॒र॒न्निं॑ प्र॒ति॒ष्ठा॒का॒म॒स्य॑ ष॒ड् वा ऋ॒त॒व ऋ॒तु॒ष्वे॒व प्र॒ति॒ ति॒ष्ठ॒ति॑
स॒प्त॒ार॒न्निं॑ प॒शु॒का॒म॒स्य॑ स॒प्त॒प॒दा॒ श॒क्व॒री॒ प॒श॒वः॑ श॒क्व॒री॒ प॒शू॒ने॒वा॒व
रु॒न्धे॑ न॒वा॒र॒न्निं॑ ते॒ज॒स्का॒म॒स्य॑ त्रि॒वृ॒ता॒ स्तो॒मे॒न॑ स॒म्मितं॑ ते॒ज॒ स्त्रि॒वृ॒त्
ते॒ज॒स्व्ये॒व भ॒व-त्ये॑का॒द॒शा॒र॒न्नि-मि॒न्द्रि॒य॒का॒म-स्यै॑का॒द॒शा॒क्ष॒रा
त्रि॒ष्टु॒गि॒न्द्रि॒यं त्रि॒ष्टु॒गि॒न्द्रि॒या॒व्ये॒व भ॒व॒ति॒ प॒ञ्च॒द॒शा॒र॒न्निं॑ भ्रा॒तृ॒व्य॒व॒तः
प॒ञ्च॒द॒शो॑ व॒ज्रो॒ भ्रा॒तृ॒व्या॒भि॒भू॒त्यै॑ स॒प्त॒द॒शा॒र॒न्निं॑ प्र॒जा॒का॒म॒स्य॑ स॒प्त॒द॒शः
प्र॒जा॒प॒तिः॑ प्र॒जा॒प॒ते॒रा॒प्त्या॑ () ए॒क॒विं॒श॒त्य॒र॒न्निं॑ प्र॒ति॒ष्ठा॒का॒म-
स्यै॑क॒विं॒शः॑ स्तो॒मा॒नां॑ प्र॒ति॒ष्ठा॒ प्र॒ति॒ष्ठि॒त्या॑ अ॒ष्टा॒श्रि॒र्भ॒व-त्य॑ष्टा॒क्ष॒रा
गा॒य॒त्री॒ ते॒जो॑ गा॒य॒त्री॒ गा॒य॒त्री॒ य॒ज्ञ॒मु॒खं॑ ते॒ज॒सै॒व गा॒य॒त्रि॒या॒ य॒ज्ञ॒मु॒खे॒न
स॒म्मितः॑ ॥ 18

(जु॒षे - स॒ते॒ज॒स - म॒न॒क्ष॒सङ्गं॑ - ब॒हु॒शा॒खं॑ वृ॒श्चे॒देष॑ वै - य॒ज्ञ
उ॒पै॒न॒मु॒त्त॒रो॑ य॒ज्ञ - आ॒प्त्या॑ - ए॒का॒त्रि॒विं॒श॒तिश्च॑) (A3)

TS 6.3.4.1

पृथिव्यै॑ त्वा॒ ऽन्तरिक्षाय॑ त्वा॒ दिवे॑ त्वेत्या॒हैभ्य॑ ए॒वैनं॑ लो॒केभ्यः॑
 प्रोक्षति॑ पराञ्चं॑ प्रोक्षति॑ पराडिव॑ हि सु॒वर्गो॑ लो॒कः कू॒रमिव॑ वा
 ए॒तत् करोति॑ यत् ख॒नत्य॑पो॒ ऽव॑ नयति॑ शान्त्यै॑ यव॒मती॑रव॒ नय॑त्यूर्ग्वै
 यवो॑ यज॒मानेन॑ यू॒पः सम्मि॑तो यावा॒नेव॑ यज॒मान॑-स्तावती-
 मेवास्मि॑-न्नूर्जं॑ दधाति- [] 19

TS 6.3.4.2

पितृ॑णाञ् स॒दनम॑सीति॑ ब॒र्.हिर॑व॒ स्तृणा॑ति॒ पितृ॑दे॒वत्या॑(१)ञ्
 ह्येतद्-यन्नि॑खातं॒ यद्-ब॒र्.हिर॑नव॒स्तीर्य॑ मि॒नुया॑त् पितृ॑दे॒वत्यो॑ नि॒खातः॑
 स्याद् ब॒र्.हिर॑व॒स्तीर्य॑ मि॒नोत्य॑स्यामे॒वैनं॑ मि॒नोति॑ यू॒पश॑क॒लमवा॑स्यति॒
 स॒तेज॑समे॒वैनं॑ मि॒नोति॑ दे॒वस्त्वा॑ स॒विता॑ म॒ध्वा ऽन॑क्त्वि॒त्याह॑
 तेज॑सै॒वैन॑म॒नक्ति॑ सु॒पिप्प॒लाभ्य॑-स्त्वौष॑धीभ्य॒ इति॑ च॒षालं॑
 प्रति- [] 20

TS 6.3.4.3

मुञ्च॑ति॒ तस्मा॑च्छी॒र्षत॑ ओष॒धयः॑ फ॒लं गृ॑ह्णन्त्य॒नक्ति॑ तेजो॒
 वा आ॒ज्यं य॑ज॒मानेना॑ग्नि॒ष्ठा ऽश्रिः॑ सम्मि॒ता यद॑ग्नि॒ष्ठा-म॑श्रि॒मन॑क्ति॒

यजमानमेव तेजसा ऽनक्त्यान्त-मनक्त्यान्तमेव यजमानं तेजसा
 ऽनक्ति सर्वतः परि मृशत्यपरिवर्ग-मेवास्मिन् तेजो दधात्युद् दिवः
 स्तभाना ऽन्तरिक्षं पृणेत्याहैषां लो॒कानां वि॒धृत्यै वैष्णव्यर्चा- [] 21

TS 6.3.4.4

कल्पयति वैष्णवो वै देवतया यूपः स्वयैवैनं देवतया कल्पयति
 द्वाभ्यां कल्पयति द्विपाद् यजमानः प्रतिष्ठित्यै यं कामयेत तेजसैनं
 देवताभिरिन्द्रियेण व्यर्द्धयेय-मित्यग्निष्ठां तस्याश्रि-माहवनीयादित्थं
 वैत्थं वा ऽति नावयेत् तेजसैवैनं देवताभिरिन्द्रियेण व्यर्द्धयति यं
 कामयेत तेजसैनं देवताभिरिन्द्रियेण समर्द्धयेयमित्य- [] 22

TS 6.3.4.5

-ग्निष्ठां तस्याश्रिमाहवनीयेन सं मिनुयात् तेजसैवैनं देवताभिरिन्द्रियेण
 समर्द्धयति ब्रह्मवनिं त्वा क्षत्रवनिमित्याह यथायजुरेवैतत् परि
 व्ययत्यूर्ग्वै रशाना यजमानेन यूपः सम्मितो यजमानमेवोर्जा
 समर्द्धयति नाभिदघ्ने परि व्ययति नाभिदघ्न एवास्मा ऊर्जा दधाति
 तस्मान्नाभिदघ्न ऊर्जा भुञ्जते यं कामयेतोर्जनं- [] 23

TS 6.3.4.6

ॐ॒ व्य॑र्द्धये॒य-मि॒त्यूर्द्ध॑वां॒ वा॒ तस्या॑वा॒चीं॒ वा॒ ऽवो॑हे॒दूर्जे॑वैनं॒ व्य॑र्द्धयति॒
यदि॑ का॒मये॑त॒ वर्.षु॑कः॒ पर्जन्यः॑ स्या॒दित्य॑-वा॒चीम॑वो॒हेद् वृ॑ष्टिमे॒व
नि॑ यच्छति॒ यदि॑ का॒मये॑ताव॒र्.षु॑कः स्या॒दित्यूर्द्ध॑वामु॒दूहे॑द् वृ॑ष्टिमे॒वोद्
यच्छति॑ पि॒तृणां॑ नि॒खातं॑ म॒नुष्या॑णामूर्द्ध॒वं नि॒खाता॑दा॒ रश॑नाया॒
ओष॑धीना॒ रश॑ना विश्वेषां- [] 24

TS 6.3.4.7

दे॒वानामूर्द्ध॑व॒ रश॑नाया॒ आ च॑षालादिन्द्रस्य च॒षाल॑
सा॒द्ध्याना॑मतिरिक्त॒ स वा॒ एष॑ सर्वदे॒वत्यो॑ यद्-यूपो॒ यद्-यूपं॑ मि॒नोति॒
सर्वा॑ ए॒व दे॒वताः॑ प्रीणाति॒ यज्ञे॑न॒ वै दे॒वाः सु॑वर्गं॒ लोक॑मा॒यन्
ते ऽम॑न्यन्त॒ मनु॑ष्या॒ नो ऽन्वा॑भविष्यन्तीति॒ ते यू॑पेन॒ योप॑यित्वा॒ सुव॑र्गं
लोक॑मा॒यन् तमृ॑षयो॒ यूपे॑नै॒वानु॑ प्रा॒जान॑न् तद् यू॒पस्य॑ यू॒पत्वं- [] 25

TS 6.3.4.8

ॐ॒ यद् यू॑पं मि॒नोति॑ सु॒वर्ग॑स्य॒ लोक॑स्य॒ प्रजा॑त्यै॒ पुर॑स्तान् मि॒नोति॑
पुर॑स्ताद्धि॒ यज्ञ॑स्य॒ प्रजा॑यते॒ ऽप्रजा॑त॒ हि तद् यद॑तिपन्न आ॒हुरि॑दं
का॒र्यमा॑सीदिति॒ सा॒द्ध्या वै दे॒वा य॑ज्ञमत्यमन्यन्त॒ तान् य॑ज्ञो

नास्पृशत् तान्. यद् यज्ञस्यातिरिक्तमासीत् तदस्पृशदतिरिक्तं वा एतद्
यज्ञस्य यदग्नावग्निं मथित्वा प्रहरत्यतिरिक्तमेतद्- [] 26

TS 6.3.4.9

यूपस्य यदूर्ध्वं चषालात् तेषां तद् भागधेयं तानेव तेन प्रीणाति
देवा वै सञ्स्थिते सोमे प्र स्रुचो ऽहरन् प्र यूपं ते ऽमन्यन्त
यज्ञवेशसं वा इदं कुर्म इति ते प्रस्तरञ् स्रुचां निष्क्रयण-मपश्यन्थ्
स्वरुं यूपस्य सञ्स्थिते सोमे प्र प्रस्तरञ् हरति जुहोति
स्वरुमयज्ञवेशसाय ॥ 27

(दधाति - प्रत्यृ - चा - समर्द्धयेयमित्यू - जैनं - विश्वेषां -
यूपत्व - मतिरिक्तमेतद् - द्विचत्वारिञ्शच्च) (A4)

TS 6.3.5.1

साद्ध्या वै देवा अस्मिँल्लोक आसन् नान्यत् किं चन मिषत्
ते ऽग्निमेवाग्नये मेधाया ऽलभन्त न ह्यन्यदालंभ्य-मविन्दन्
ततो वा इमाः प्रजाः प्राजायन्त यदग्नावग्निं मथित्वा प्रहरति
प्रजानां प्रजननाय रुद्रो वा एष यदग्निर्यजमानः पशुर्यत्
पशुमालभ्याग्निं मन्थेद् रुद्राय यजमान- [] 28

TS 6.3.5.2

-मपि दद्ध्यात् प्रमायुकः स्यादथो खल्वाहुरग्निः सर्वा देवता
हविरेतद्-यत् पशुरिति यत् पशुमालभ्याग्निं मन्थति
हव्यायैवाऽऽसन्नाय सर्वा देवता जनय-त्युपाकृत्यैव मन्थ्य-
स्तन्नेवाऽऽलब्धं नेवानालब्ध-मग्ने-र्जनित्र-मसीत्याहाग्नेर्ह्येत-ज्जनित्रं
वृषणौ स्थ इत्याह वृषणौ- [] 29

TS 6.3.5.3

ह्येता-वुर्वश्यस्यायु-रसीत्याह मिथुनत्वाय घृतेनाक्ते वृषणं
दधाथामित्याह वृषणञ् ह्येते दधाते ये अग्निं गायत्रं छन्दो ऽनु
प्र जायस्वेत्याह छन्दोभिरेवैनं प्र जनयत्यग्नये मथ्यमानायानु
ब्रूहीत्याह सावित्रीमृचमन्वाह सवितृप्रसूत एवैनं मन्थति जातायानु
ब्रूहि- [] 30

TS 6.3.5.4

प्रहियमाणायानु ब्रूहीत्याह काण्डेकाण्ड एवैनं क्रियमाणे समर्द्धयति
गायत्रीः सर्वा अन्वाह गायत्रछन्दा वा अग्निः स्वेनैवैनं छन्दसा
समर्द्धयत्यग्निः पुरा भवत्यग्निं मथित्वा प्र हरति तौ संभवन्तौ

यजमानमभि सं भवतो भवतं नः समनसावित्याह शान्त्यै प्रहृत्य
जुहोति जातायैवास्मा अन्नमपि () दधात्याज्येन जुहोत्येतद्-वा
अग्नेः प्रियं धाम यदाज्यं प्रियेणैवैनं धाम्ना समर्द्धयत्यथो
तेजसा ॥ 31

(यजमान-माह वृषणौ-जातायानु ब्रूह्य-प्य -ष्टदश च) (A5)

TS 6.3.6.1

इषे त्वेति बर्.हिरा दत्त इच्छत इव ह्येष यो यजत उपवी-रसीत्याहोप
ह्येनानाकरोत्युपो देवान् दैवीर्विशः प्रागुरित्याह दैवीर्ह्येता विशः
सतीर्देवानुपयन्ति वह्नीरुशिज इत्याहर्त्विजो वै वह्य उशिज-
स्तस्मादेवमाह बृहस्पते **धारया** वसूनीत्या- [] 32

TS 6.3.6.2

-ह ब्रह्म वै देवानां बृहस्पति ब्रह्मणैवास्मै पशूनव रुन्धे हव्या
ते स्वदन्तामित्याह स्वदयत्येवैनान् देव त्वष्टर्वसु रण्वेत्याह त्वष्टा
वै पशूनां मिथुनानां रूपकृद् रूपमेव पशुषु दधाति रेवती
रमद्ध्वमित्याह पशवो वै रेवतीः पशूनेवास्मै रमयति देवस्य त्वा
सवितुः प्रसव इति- [] 33

TS 6.3.6.3

र॒श॒ना॒मा॒ द॒त्ते॑ प्र॒सू॒त्या॑ अ॒श्वि॒नो॑र्बा॒हु॒भ्या॒-मि॒त्या॒हा॒श्वि॒नौ॑ हि
 दे॒वा॒ना॒म॒ध्व॒र्यू॑ आ॒स्तां॑ पू॒ष्णो॑ ह॒स्ता॒भ्या॒मि॒त्या॒ह॒ य॒त्या॑ ऋ॒त॒स्य॑ त्वा
 दे॒व॒ह॒विः॑ पा॒शे॒नाऽऽ र॒भ॒ इ॒त्या॒ह॒ स॒त्यं॑ वा॒ ऋ॒त॒ञ् स॒त्ये॒नै॒वैन॑मृ॒ते॒ना
 ऽऽर॒भ॒ते ऽक्ष॑ण॒या॒ परि॑ ह॒रति॑ व॒द्ध्य॒ञ् हि॑ प्र॒त्य॒ञ्चं॑ प्र॒ति॒मु॒ञ्च॒न्ति
 व्या॒वृ॒त्यै॑ ध॒र्षा॒ मानु॑षा॒निति॑ नि॒ यु॒नक्ति॑ धृ॒त्या॑ अ॒द्भ्य॑- [] 34

TS 6.3.6.4

स्त्वौष॑धी॒भ्यः॑ प्रो॒क्षा॒मी॒त्या॒हा॒द्भ्यो॑ ह्येष॑ ओष॑धी॒भ्यः॑ सं॒भ॒वति॑
 यत् प॒शु॒रपां॑ पे॒रुर॒सी॒त्या॒हैष॑ ह्य॒पां॑ पा॒ता॒ यो॒ मे॒धा॒याऽऽर॑भ्यते
 स्वा॒त्तं॑ चि॒त् स॒दे॒व॒ञ् ह॒व्य॒मा॒पो॑ दे॒वीः॑ स्व॒द॒तै॒नमि॒त्या॒ह
 स्व॒द॒य॒त्ये॒वैन॑-मु॒परि॑ष्ठात् प्रो॒क्ष॒त्यु॒परि॑ष्ठादे॒वैनं॑ मे॒द्ध्यं॑ करोति
 पा॒य॒य॒त्यन्त॑रत॒ ए॒वैनं॑ () मे॒द्ध्यं॑ करोत्य॒ध॒स्ता॒दु॒पो॒क्षति॑ सर्॒वत॑
 ए॒वैनं॑ मे॒द्ध्यं॑ करोति ॥ 35

(व॒सू॒नी॒ति॑-प्र॒स॒व॒ इ॒त्य॑-द्भ्यो॑-ऽन्त॑रत॒ ए॒वैनं॑ - द॒श॑ च) (A6)

TS 6.3.7.1

अग्निना वै होत्रा देवा असुरा-नभ्यभव-न्नग्नये समिद्ध्यमानायानु
 ब्रूहीत्याह भ्रातृव्याभिभूत्यै सप्तदश सामिधेनी-रन्वाह सप्तदशः
 प्रजापतिः प्रजापतेराप्त्यै सप्तदशान्वाह द्वादश मासाः पञ्चर्तवः
 स सँवत्सरः सँवत्सरं प्रजा अनु प्र जायन्ते प्रजानां प्रजननाय
 देवा वै सामिधेनीरनूच्य यज्ञं नान्वपश्यन्थ् स
 प्रजापति-स्तूष्णीमाघार- [] 36

TS 6.3.7.2

-मा ऽघारयत् ततो वै देवा यज्ञमन्वपश्यन्. यत् तूष्णी-माघार-
 माघारयति यज्ञस्यानुख्यात्या असुरेषु वै यज्ञ आसीत् तं
 देवास्तूष्णीं होमेनावृञ्जत यत् तूष्णी-माघार-माघारयति भ्रातृव्यस्यै
 व तद् यज्ञं वृङ्क्ते परिधीन्थ् सं माष्टिं पुनात्येवैनान् त्रिस्त्रिः सं माष्टिं
 त्र्यावृद्धि यज्ञोऽथो रक्षसामपहत्यै द्वादश सं पद्यन्ते
 द्वादश- [] 37

TS 6.3.7.3

॥
मासाः सँवथ्सरः सँवथ्सरमेव प्रीणात्यथो सँवथ्सरमेवास्मा
उप दधाति सुवर्गस्य लोकस्य समष्ट्यै शिरो वा एतद् यज्ञस्य
यदाघारोऽग्निः सर्वा देवता यदाघार-माघारयति शीर्षत एव यज्ञस्य
यजमानः सर्वा देवता अव रुन्धे शिरो वा एतद् यज्ञस्य यदाघार
आत्मा पशुराघारमाघार्य पशुं समनक्त्यात्मन्नेव यज्ञस्य- [] 38

TS 6.3.7.4

शिरः प्रति दधाति सं ते प्राणो वायुना गच्छतामित्याह वायुदेवत्यो वै
प्राणो वायावेवास्य प्राणं जुहोति सं यज्ञत्रैरङ्गानि सं
यज्ञपतिराशिषेत्याह यज्ञपतिमेवास्याऽऽशिषं गमयति विश्वरूपो
वै त्वाष्ट्र उपरिष्ठात् पशुमभ्यवमीत् तस्मा-दुपरिष्ठात् पशोर्नाव दन्ति
यदुपरिष्ठात् पशुं समनक्ति मेद्ध्यमेवै- [] 39

TS 6.3.7.5

-नं करोत्यृत्विजो वृणीते छन्दास्येव वृणीते सप्त वृणीते सप्त
ग्राम्याः पशवः सप्ताऽऽरण्याः सप्त छन्दास्युभयस्यावरुद्ध्य
एकादश प्रयाजान्. यजति दश वै पशोः प्राणा आत्मैकादशो

यावानेव पशुस्तं प्र यजति वपामेकः परि शय आत्मैवाऽऽत्मानं
परि शये वज्रो वै स्वधितिर्वज्रो यूपशकलो घृतं खलु वै ()
देवा वज्रं कृत्वा सोममघ्नन् घृतेनाक्तौ पशुं त्रायेथामित्याह
वज्रेणैवैनं वशं कृत्वा ऽऽ लभते ॥ 40

(आधारं - पद्यन्ते द्वादशा - तन्नेव यज्ञस्य - मेध्यमेव -
खलु वा - अष्टादश च) (A7)

TS 6.3.8.1

पर्यग्नि करोति सर्वहुतमेवैनं करोत्य-स्कन्दाया-स्कन्नं हि
तद् यद् धृतस्य स्कन्दति त्रिः पर्यग्नि करोति त्र्यावृद्धि यज्ञो ऽथो
रक्षसामपहत्यै ब्रह्मवादिनो वदन्त्यन्वारभ्यः पशू(3)र्नान्वारभ्या(3)
इति मृत्यवे वा एष नीयते यत् पशुस्तं यदन्वारभेत प्रमायुको
यजमानः स्यादथो खल्वाहुः सुवर्गाय वा एष लोकाय
नीयते यत्- [] 41

TS 6.3.8.2

पशुरिति यन्नान्वारभेत सुवर्गाल्लोकाद् यजमानो हीयेत
वपाश्रपणीभ्या-मन्वारभते तन्नेवान्वारब्धं नेवानन्वारब्धमुप

प्रेष्य॑ हो॒त्स्व॑ ह॒व्या दे॒वेभ्य॑ इ॒त्याहे॒षित॑ ॐ हि क॒र्म क्रि॒यते॑ रे॒वती॑र्य॒ज्ञप॑तिं
 प्रि॒यथा ऽऽ वि॒शते॑त्याह॒ यथा॑य॒जुरे॒वैतद॑ग्निना॒ पुर॒स्तादे॑ति
 रक्ष॑साम॒पहत्यै॑ पृथि॒व्याः संपृ॑चः पा॒हीति॑ ब॒र्हि- [] 42

TS 6.3.8.3

-रू॒पास्य॑त्य-स्क॒न्दाया॑-स्क॒न्न ॐ हि तद् यद् ब॒र्हिषि॑ स्क॒न्दत्य॑थो
 ब॒र्हिष॑दमे॒वैनं॑ करोति॒ परा॒डा वर्त॑ते ऽध्व॒र्युः प॒शोः सं॒ज्ञप्य॑मानात्
 प॒शुभ्य॑ ए॒व तन्नि॑ हु॒त आ॒त्मनो॑ऽना॒व्रस्का॑य ग॒च्छति॑ श्रि॒यं प्र
 प॒शूना॑प्नोति॒ य ए॒वं वे॑द प॒श्चाल्लो॑का॒ वा ए॒षा प्रा॑च्यु॒दानी॑यते॒ यत्
 प॒त्नी न॑मस्त आ॒ताने॑त्याहा ऽऽदि॒त्यस्य॑ वै र॒श्मय॑- [] 43

TS 6.3.8.4

आ॒ताना॑स्तेभ्य॒ ए॒व न॑म॒स्करो॑त्यन॒र्वा प्रे॑हीत्याह॒ भ्रातृ॑व्यो॒ वा अ॒र्वा
 भ्रातृ॑व्याप॒नुत्त्यै॑ घृ॒तस्य॑ कु॒ल्याम॑नु॒ सह प्र॒जया॑ सह
 रा॒यस्पो॑षेणे-त्याहाऽऽशि॒षमे॑वैता॒मा शा॑स्त॒ आपो॑ दे॒वीः
 शु॒द्धायु॑व इ॒त्याह॑ यथा॑य॒जुरे॒वैतत् ॥ 44

(लो॒काय॑ नी॒यते॑ यद् - ब॒र्हि - र॒श्मयः॑ - स॒प्तत्रिं॑शच्च) (A8)

TS 6.3.9.1

प॒शोर्वा॑ आ॒लब्ध॑स्य प्रा॒णाञ्छु॑गृच्छति॒ वाक् त॒ आ॒प्याय॑तां प्रा॒णस्त॒
 आ॒प्याय॑तामि॒त्याह॑ प्रा॒णेभ्य॑ ए॒वास्य॑ शुच॑ शमयति॒ सा प्रा॒णेभ्यो॑
 ऽधि॑ पृथि॒वीञ् शुक्॑ प्र वि॒शति॑ शमहो॑भ्यामिति॒ नि
 नय॑त्यहो॒रात्रा॑भ्यामे॒व पृथि॑व्यै शुच॑ शमय॒त्योष॑धे॒ त्राय॑स्वैन॒
 स्वधि॑ते॒ मैन् हि॑सीरि॒त्याह॑ वज्रो॒ वै स्वधि॑तिः- [] 45

TS 6.3.9.2

शान्त्यै॑ पा॒र्श्वत॑ आ च्छ॒यति॑ मद्ध्यतो॒ हि म॑नुष्या॒ आच्छ॑यन्ति
 ति॒रश्ची॑न॒मा च्छ॑यत्यनू॒चीन॑ञ् हि म॑नुष्या॒ आच्छ॑यन्ति॒ व्यावृ॑त्यै रक्ष॒सां
 भा॒गो ऽसी॑ति॒ स्थवि॑मतो॒ बर्हि॑रक्त्वा॒ऽपास्य॑त्यस्नै॒व रक्षा॑सि
 नि॒रव॑दयत॒ इद॑मह॑ रक्षो॒ऽधमं॑ तमो॒ नयामि॑ यो॒ऽस्मान् द्वेष्टि॑ यं च
 वयं॑ द्विष्म॒ इत्या॑ह॒ द्वौ वा॑व पु॒रुषौ॑ यं चै॒व- [] 46

TS 6.3.9.3

द्वेष्टि॑ यश्चैनं॒ द्वेष्टि॑ तावु॒भाव॑धमं॒ तमो॑ नयती॒षे त्वेति॑
 व॒पामु॑त् खि॒दती॑च्छत॒ इव॑ ह्येष॒ यो यज॑ते॒ यदु॑प॒तृन्धाद्-रुद्रो॑ ऽस्य
 प॒शून् घा॑तुकः॒ स्याद् यन्नो॑प॒तृन्धा॑-दयता॒ स्या-द॒न्ययो॑प॒तृण॑त्यन्यया॒

न धृत्यै घृतेन द्यावापृथिवी प्रोर्ण्वाथामित्याह द्यावापृथिवी एव
रसेनानक्त्यच्छिन्नो- [] 47

TS 6.3.9.4

रायः सुवीर इत्याह यथायजुरेवैतत् क्रूरमिव वा एतत् करोति
यद् वपा-मुत्खिद-त्युर्वन्तरिक्ष-मन्विहीत्याह शान्त्यै प्र वा
एषोऽस्माल्लोकाच्च्यवते यः पशुं मृत्यवे नीयमानमन्वारभते
वपाश्रपणी पुनरन्वारभतेऽस्मिन्नेव लोके प्रति तिष्ठत्यग्निना
पुरस्तादेति रक्षसामपहत्या अथो देवता एव हव्येना- [] 48

TS 6.3.9.5

-न्वेति नान्तममङ्गारमति हरेद् यदन्तममङ्गार-मतिहरेद्-देवता अति
मन्येत वायो वीहि स्तोकानामित्याह तस्माद् विभक्ताः स्तोका अव
पद्यन्ते ऽग्रं वा एतत् पशूनां यद् वपाऽग्रमोषधीनां बर्.हिरग्रेणैवाग्रं
समर्द्धयत्यथो ओषधीष्वेव पशून् प्रति ष्ठापयति स्वाहाकृतीभ्यः
प्रेष्येत्याह- [] 49

TS 6.3.9.6

य॒ज्ञस्य॑ समि॒ष्यै प्रा॒णापा॒नौ वा ए॒तौ प॑शू॒नां य॑त् पृ॒षदा॒ज्यमा॒त्मा वपा॑
 पृ॒षदा॒ज्यम॑भि॒घार्य॑ व॒पाम॑भि॒ घार॑यत्या॒त्मन्ने॒व प॑शू॒नां प्रा॒णापा॒नौ द॑धाति
 स्वा॒होर्द्ध्व॑नभ॒सं मा॒रुतं॑ ग॒च्छत॑मित्या॒होर्द्ध्व॑नभा॒ ह स्म॒ वै मा॒रुतो॑
 दे॒वानां॑ व॒पाश्र॑पणी॒ प्र ह॑रति॒ तेनै॒वैने॒ प्र ह॑रति॒ विषू॑ची॒ प्र ह॑रति
 तस्मा॑द् वि॒ष्वञ्चौ॑ प्रा॒णापा॒नौ ॥ 50

(स्व॑धि॒ति - श्रै॒वा - च्छि॑न्नो - ह॒व्येने॑ - ष्ये॒त्याह॑ -

षट्च॑त्वारि॒ंशच्च॑) (A9)

TS 6.3.10.1

प॒शुमा॒लभ्य॑ पु॒रोडा॑शं॒ निर्व॑पति॒ समे॑धमे॒वैन॒मा ल॑भते॒ वपया॑
 प्र॒चर्य॑ पु॒रोडा॑शे॒न प्र च॑रत्यू॒र्वे पु॒रोडा॑श॒ ऊर्ज॑मे॒व प॑शू॒नां
 मद्ध्य॑तो॒ दधा॑त्यथो॒ पशो॑रे॒व छि॒द्रम॑पि॒ दधा॑ति॒ पृषदा॒ज्यस्यो॑प॒हत्य॑
 त्रिः पृ॑च्छति॒ शृ॒तꣳ ह॒वी(३):॑ श॒मित॑रिति॒ त्रिष॑त्या॒ हि दे॒वा यो ऽशृ॑तꣳ
 शृ॒तमा॑ह॒ स ए॑नसा॒ प्रा॒णापा॒नौ वा ए॒तौ प॑शू॒नां- [] 51

TS 6.3.10.2

यत् पृषदाज्यं पशोः खलु वा आलब्धस्य हृदयमात्माऽभि समेति
यत् पृषदाज्येन हृदय-मभिघारयत्यात्मन्नेव पशूनां प्राणापानौ दधाति
पशुना वै देवाः सुवर्गं लोकमायन् ते ऽमन्यन्त मनुष्या
नोऽन्वाभविष्यन्तीति तस्य शिरः छित्त्वा मेधं प्राक्षारयन्थ् स
प्रक्षो ऽभवत् तत् प्रक्षस्य प्रक्षत्वं यत् प्लक्षशाखो-त्तरबर्हि-र्भवति
समेधस्यैव- [] 52

TS 6.3.10.3

पशोरव द्यति पशुं वै ह्रियमाणं रक्षास्यनु सचन्तेऽन्तरा यूपं
चाऽऽहवनीयं च हरति रक्षसामपहत्यै पशोर्वा आलब्धस्य मनोऽप
क्रामति मनोतायै हविषोऽवदीयमानस्यानु ब्रूहीत्याह मन एवास्याव
रुन्ध एकादशावदानान्यव द्यति दश वै पशोः प्राणा आत्मैकादशो
यावानेव पशुस्तस्याव- [] 53

TS 6.3.10.4

द्यति हृदयस्याग्रे ऽव द्यत्यथ जिह्वाया अथ वक्षसो यद्-वै
हृदयेनाभिगच्छति तज्जिह्वाया वदति यज्जिह्वाया वदति तदुरसो ऽधि

निर्वदत्येतद्-वै पशोर्यथापूर्वं ँस्यैव-मवदाय यथाकाम-
मुत्तरेषामवद्यति यथा पूर्वमेवास्य पशोरवत्तं भवति मद्ध्यतो गुदस्याव
द्यति मद्ध्यतो हि प्राण उत्तमस्याव द्यत्यु- [] 54

TS 6.3.10.5

-त्तमो हि प्राणो यदीतरं ँदीतर-मुभयमेवाजामि जायमानो वै
॥ ब्राह्मणस्त्रिभिर्. ऋणवा जायते ब्रह्मचर्येणर्षिभ्यो यज्ञेन देवेभ्यः प्रजया
पितृभ्य एष वा अनृणो यः पुत्री यज्वा ब्रह्मचारिवासी तदवदानैरेवाव
दयते तदवदानाना-मवदानत्वं देवासुराः सँयत्ता आसन् ते देवा
अग्निमब्रुवन् त्वया वीरेणासुरानभि भवामेति- [] 55

TS 6.3.10.6

सो ऽब्रवीद् वरं ँवृणै पशोरुद्धारमुद्धरा इति स एतमुद्धारमुदहरत
दोः पूर्वार्द्धस्य गुदं मद्ध्यतः श्रोणिं जघनार्द्धस्य ततो देवा अभवन्
परा ऽसुरा यत् त्र्यङ्गाणां समवद्यति भ्रातृव्याभिभूत्यै भवत्यात्मना
॥ परा ऽस्य भ्रातृव्यो भवत्यक्षणया ऽव द्यति तस्मादक्षणया पशवो ऽङ्गानि
प्र हरन्ति प्रतिष्ठित्यै ॥ 56 (एतौ पशूनां - समधस्यैव - तस्याऽवो
- त्तमस्याव द्यती - ति - पञ्चचत्वारिंशच्च) (A10)

TS 6.3.11.1

मेदसा॑ सुचौ॑ प्रोर्णो॑ति मेदो॑रूपा॒ वै पश॑वो रू॒पमे॒व पशु॑षु दधाति
यूष॑न्नव॒धाय॒ प्रोर्णो॑ति रसो॒ वा ए॒ष पशू॑नां यद्-यू॒ रसमे॒व पशु॑षु
दधाति॑ पार्श्वे॑न वसाहोमं॒ प्र यौ॑ति मद्ध्यं॒ वा ए॒तत् पशू॑नां यत्
पार्श्वे॑ रस ए॒ष पशू॑नां यद्-वसा॒ यत् पार्श्वे॑न वसाहोमं॒ प्रयौ॑ति
मद्ध्य॑त ए॒व पशू॑नां रसं॑ दधाति॒ घ्नन्ति॑- [] 57

TS 6.3.11.2

वा ए॒तत् पशुं॑ यथ् सं॒ज्ञप॑यन्त्यैन्द्रः॑ खलु॒ वै दे॒वत॑या प्राण
ऐन्द्रो॑ ऽपान ऐन्द्रः॑ प्राणो अङ्गे॑ अङ्गे॒ नि दे॑द्ध्यदित्याह प्राणा॒पाना॒वेव
पशु॑षु दधाति॑ दे॒व त्वष्ट॑र्भूरि॒ ते स॑स्मे॒त्वित्या॑ह त्वाष्ट्रा॒ हि
दे॒वत॑या पश॑वो विषु॒रूपा॒ यथ् स॑लक्ष्माणो॒ भव॑थेत्याह विषु॒रूपा॒ ह्येते
सन्तः॑ स॒लक्ष्मा॑ण ए॒तर्हि॑ भवन्ति॒ दे॒वत्रा॑ यन्त- [] 58

TS 6.3.11.3

-मव॑से सखा॒योऽनु॑ त्वा मा॒ता पि॒तरो॑ म॒दन्त्वित्या॑हा-नु॒मतमे॒वैनं॑
मा॒त्रा पि॒त्रा सु॒वर्गं॑ लो॒कं ग॑मयत्यर्द्ध॒र्चे वसा॑होमं॒ जुहो॑त्यसौ॒ वा
अर्द्ध॑र्च इ॒यमर्द्ध॑र्च इ॒मे ए॒व रसे॑नानक्ति॒ दिशो॑ जुहोति॒ दिश॑ ए॒व

रसे॒नान॒क्त्यथो॑ दि॒ग्भ्य ए॒वोर्ज॑ꣳ र॒सम॒व रु॒न्धे प्रा॒णापा॒नौ वा ए॒तौ
प॒शूनां॑ यत् पृ॒षदा॒ज्यं वा॑नस्प॒त्याः ख॒लु- [] 59

TS 6.3.11.4

वै दे॒वतया॑ प॒शवो॑ यत् पृ॒षदा॒ज्यस्यो॑-प॒हत्याऽऽह॑ वनस्प॒तये ऽनु॑
ब्रू॒हि वनस्प॒तये॑ प्रेष्येति प्रा॒णापा॒नावे॒व प॒शुषु॑ दधात्यन्यस्यान्यस्य
सम॒वत्तꣳ सम॒वद्यति॑ तस्मान्नाना॒रूपाः॑ प॒शवो॑ यू॒ष्णोप॑ सिञ्चति र॒सो
वा ए॒ष प॒शूनां॑ यद्-यू र॒समे॒व प॒शुषु॑ दधातीडा॒मुप॑ ह्यते प॒शवो॑ वा
इ॒डा प॒शूने॒वोप॑ ह्यते च॒तुरु॒प ह्यते॑- [] 60

TS 6.3.11.5

चतु॑ष्पादो हि प॒शवो॑ यं का॒मये॑ताप॒शुः स्या॒दित्य॑मे॒दस्कं॑ तस्मा॒ आ
द॒द्ध्यान्मे॑दो॒रूपा॑ वै प॒शवो॑ रू॒पेणै॒वैनं॑ प॒शुभ्यो॑ निर्भ॒जत्य॑प॒शुरे॒व
भवति॑ यं का॒मये॑त प॒शुमा॒न्थ् स्या॒दिति॑ मे॒दस्वत्॑ तस्मा॒ आ
द॒द्ध्यान्मे॑दो॒रूपा॑ वै प॒शवो॑ रू॒पेणै॒वास्मै॑ प॒शून॑व रु॒न्धे प॒शुमा॒नेव॑
भवति॑ प्र॒जाप॑तिर्य॒ज्ञम॑सृ॒जत॑ स आ॒ज्यं- [] 61

TS 6.3.11.6

पु॒रस्ता॑दसृ॒जत॑ प॒शुं॑ म॒द्ध्य॑तः पृ॒षदा॑ज्यं प॒श्चात्॑ तस्मा॒दाज्ये॑न
 प्रया॒जा इ॑ज्यन्ते प॒शुना॑ म॒द्ध्य॑तः पृ॒षदा॑ज्येना-नूया॒जा-
 स्तस्मा॑दे॒तन्मि॒श्रमि॑व प॒श्चात्सृ॑ष्ट॒ ह्येका॑दशानूया॒जान्॑. यज॑ति द॒श
 वै प॒शोः प्रा॒णा आ॒त्मैका॑दशो यावा॒नेव॑ प॒शुस्त॑मनु॒ यज॑ति घ्नन्ति वा
 ए॒तत् प॒शुं य॑त् सं॒ज्ञप॑यन्ति प्राणापानौ खलु॒ वा ए॒तौ प॒शूनां॑ यत्
 पृ॒षदा॑ज्यं यत् पृ॒षदा॑ज्येना () नूया॒जान्॑. यज॑ति प्राणापानावेव प॒शुषु॑
 दधा॑ति ॥ 62

(घ्नन्ति - यन्तं - खलु - चतुरूपं ह्यत - आज्यं - यत्
 पृषदाज्येन - षट् च) (A11)

=====

Prasna Korvai with starting Padams of 1 to 11 Anuvaakams :-

(चा॒त्वा॒ला॒त् - सु॒व॒र्गा॒य॒ यद् वै॒स॒र्ज॒ना॒नि - वै॒ष्ण॒व्य॒र्चा - पृ॒थि॒व्यै -
सा॒ध्या - इ॒षे त्वे - त्य॒ग्नि॒ना - पर्य॑ग्नि - प॒शोः - प॒शु॒मा॒ल॒भ्य -
मे॒द॒सा॒ सु॒चा - वे॒का॒द॒श)

Korvai with starting Padams of 1, 11, 21 Series of Panchaatis :-

(चा॒त्वा॒ला॒द् - दे॒वा॒नु॒पै॒ति - मु॒ञ्च॒ति - प्र॒ह्नि॒य॒मा॒णाय॑ - पर्य॑ग्नि -
प॒शु॒मा॒ल॒भ्य - च॒तु॒ष्पा॒दो - द्वि॒ष॒ष्टिः)

First and Last Padam of Third Prasnam of 6th Kandam

(चा॒त्वा॒ला॒त् - प॒शु॒षु॑ दधाति)

॥ हरिः ओं ॥

॥ कृष्ण यजुर्वेदीय तैत्तिरीय संहितायां षष्ठकाण्डे तृतीयः प्रश्नः

समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

6.4 षष्ठकाण्डे चतुर्थः प्रश्नः – सोममन्त्रब्राह्मणनिरूपणं

TS 6.4.1.1

यज्ञेन वै प्रजापतिः प्रजा असृजत ता उपयडिभ-रेवासृजत
यदुपयज उपयजति प्रजा एव तद् यजमानः सृजते जघनार्द्धादव
द्वति जघनार्द्धाद्धि प्रजाः प्रजायन्ते स्थविमतो ऽव द्वति स्थविमतो
हि प्रजाः प्रजायन्ते ऽसंभिन्दन्नव द्वति प्राणाना-मसंभेदाय न
पर्यावर्तयति यत् पर्यावर्तयेदुदावर्तः प्रजा ग्राहुकः स्याथ् समुद्रं गच्छ
स्वाहेत्याह रेत- [] 1

TS 6.4.1.2

एव तद् दधात्यन्तरिक्षं गच्छ स्वाहेत्याहाऽन्तरिक्षेणैवास्मै प्रजाः
प्र जनयत्यन्तरिक्षं ह्यनु प्रजाः प्रजायन्ते देव् सवितारं गच्छ
स्वाहेत्याह सवितृप्रसूत एवास्मै प्रजाः प्र जनयत्य-होरात्रे गच्छ

स्वाहेत्याहा-होरात्राभ्या-मेवास्मै प्रजाः प्र जनयत्य-होरात्रे
ह्यनु प्रजाः प्रजायन्ते मित्रावरुणौ गच्छ स्वाहे- [] 2

TS 6.4.1.3

-त्याह प्रजास्वेव प्रजातासु प्राणापानौ दधाति सोमं गच्छ स्वाहेत्याह
सौम्या हि देवतया प्रजा यज्ञं गच्छ स्वाहेत्याह प्रजा एव यज्ञियाः
करोति छन्दांसि गच्छ स्वाहेत्याह पशवो वै छन्दांसि
पशूनेवाव रुन्धे द्यावापृथिवी गच्छ स्वाहेत्याह प्रजा एव प्रजाता
द्यावापृथिवीभ्यामुभयतः परि गृह्णाति नभो- [] 3

TS 6.4.1.4

दिव्यं गच्छ स्वाहेत्याह प्रजाभ्य एव प्रजाताभ्यो वृष्टिं नि यच्छत्यग्निं
वैश्वानरं गच्छ स्वाहेत्याह प्रजा एव प्रजाता अस्यां प्रति ष्ठापयति
प्राणानां वा एषोऽव द्यति यो ऽवद्यति गुदस्य मनो मे हार्दि यच्छेत्याह
प्राणानेव यथास्थानमुप ह्वयते पशोर्वा आलब्धस्य हृदयं शुगृच्छति
सा हृदयशूल- [] 4

TS 6.4.1.5

-मभि॑ समेति॑ यत् पृथि॑व्याꣳ हृदय॑शूल-मुद्वास॑येत् पृथि॑वीꣳ
 शुचा॑र्पयेद् यद॑फस्वपः शुचा॑र्पयेच्छुष्क॑स्य चाऽऽर्द्र॑स्य च
 सन्धा॑वुद्-वास॑यत्युभय॑स्य शान्त्यै॑ यं द्वि॑ष्यात् तं ध्या॑ये-च्छु॑चैवैन-
 मर्प॑यति ॥ 5

(रेतो॑ - मि॒त्रावरु॑णौ गच्छ॒ स्वाहा - नभो॑ - हृदय॑शूलं -
 द्वात्रिं॑शच्च) (A1)

TS 6.4.2.1

देवा॑ वै य॒ज्ञमाग्नी॑द्ध्रे व्य॒भजन्त॑ ततो॒ यदत्य॑शिष्यत॒ तदब्रु॑वन् वस॒तु
 नु॑ न इ॒दमिति॑ तद् वस॒तीवरी॑णां वस॒तीवरि॑त्वं तस्मिन् प्रा॒तर्न
 सम॑शक्नुवन् तद॒फ्सु प्रा॑वेशयन् ता वस॒तीवरी॑रभवन्
 वस॒तीवरी॑र्गृह्णाति य॒ज्ञो वै वस॒तीवरी॑र्य॒ज्ञमेवाऽऽर॑भ्य गृही॒त्वोप
 वसति॑ यस्या॒गृहीता॑ अ॒भि नि॒म्रोचे॑-दनार॒ब्धोऽस्य॑ य॒ज्ञः स्याद्- [] 6

TS 6.4.2.2

य॒ज्ञं वि॑ च्छि॒न्धा-ज्ज्योति॑ष्या वा गृह्णी॒याद्धि॑रण्यं वा ऽव॒धाय
 सशु॑क्राणामेव गृह्णाति यो वा ब्राह्म॒णो बहु॑याजी तस्य कुंभ्या॒नां

गृ॒ह्णी॒याथ् स॒ हि गृ॒ही॒तव॒सती॒वरी॒को व॒सती॒वरी॒र्गृ॒ह्णाति॒ प॒शवो॒ वै
व॒सती॒वरीः॑ प॒शूने॒वाऽऽर॒भ्य गृ॒ही॒त्वोप॑ व॒सति॒ यद॒न्वीपं॑ ति॒ष्ठन्
गृ॒ह्णी॒यान्निर्मा॑र्गु॒का अ॒स्मात् प॒शवः॑ स्युः प्र॒तीपं॑ ति॒ष्ठन् गृ॒ह्णाति॑
प्रति॒रुद्ध्यै॒वास्मै॑ प॒शून् गृ॒ह्णाती॒न्द्रो- [] 7

TS 6.4.2.3

वृ॒त्रम॒हन्थ् सौऽ(१)पोऽ(१)भ्य॑म्रियत तासां॑ य॒न्मेद्ध्यं॑ य॒ज्ञिय॑
सदे॒वमा॒सीत् तद॑त्यमुच्यत ता वह॑न्तीरभवन् वह॑न्तीनां गृ॒ह्णाति॒ या
ए॒व मेद्ध्य॑या य॒ज्ञियाः॑ सदे॒वा आ॒प-स्ता॒सा-मे॒व गृ॒ह्णाति॒ नान्त॒मा
वह॑न्तीरतीयाद्- यद॑न्त॒मा वह॑न्तीरतीयाद् य॒ज्ञम॑ति मन्येत न स्था॑वराणां॑
गृ॒ह्णी॒याद् वरु॑णगृ॒हीता॒ वै स्था॑वरा यथ् स्था॑वराणां॑ गृ॒ह्णी॒याद्- [] 8

TS 6.4.2.4

-वरु॑णेनास्य य॒ज्ञं ग्रा॑हयेद् यद्-वै दि॒वा भव॑त्यपो रा॒त्रिः प्र॑ वि॒शति॒
तस्मा॑त् ता॒म्रा आ॒पो दि॒वा ददृ॑श्रे यन्नक्तं भव॑त्यपो ऽहः॒ प्र॑ वि॒शति॒
तस्मा॑च्च॒न्द्रा आ॒पो नक्तं॑ ददृ॑श्रे छा॒यायै॑ चाऽऽत॑पतश्च स॒न्धौ
गृ॒ह्णात्य॑-हो॒रात्रयो॑रे॒वास्मै॑ वर्णं॑ गृ॒ह्णाति॒ ह॒विष्म॑तीरि॒मा आ॒प इत्या॑ह
ह॒विष्कृ॑तानामे॒व गृ॒ह्णाति॒ ह॒विष्मा॑ अस्तु- [] 9

TS 6.4.2.5

सूर्य॑ इत्या॒ह॒ स॒शु॒क्राणा॑मे॒व गृ॒ह्णात्यनु॒ष्टु॒भा गृ॒ह्णाति॑ वा॒ग्वा
 अनु॒ष्टुग् वा॒चैवै॒नाः॒ सर्व॑या गृ॒ह्णाति॑ चतु॒ष्पद॒यर्चा॑ गृ॒ह्णाति॑ त्रिः सा॑दयति
 स॒प्त सं प॑द्यन्ते स॒प्तप॑दा श॒क्वरी॑ प॒शवः॑ श॒क्वरी॑ प॒शूने॒वाव॑ रु॒न्धे
 ऽस्मै॑ वै लो॒काय॑ गा॒र्ह॒पत्य॑ आ धी॒यते॑ ऽमु॒ष्मा आ॒हव॒नीयो॑ यद्
 गा॒र्ह॒पत्य॑ उप॒साद॑ये॒दस्मिन्॑ लो॒के प॒शुमा॑न्थ् स्याद्
 यदा॑ह॒वनी॒ये ऽमु॒ष्मिन्- [] 10

TS 6.4.2.6

लो॒के प॒शुमा॑न्थ् स्यादु॒भयो॑रु॒प सा॑दयत्यु॒भयो॑रे॒वैनं॑ लो॒कयोः॑
 प॒शुम॑न्तं करोति सर्व॒तः परि॑ हरति रक्ष॒साम॑प॒हत्या॑
 इन्द्रा॑ग्नि॒योर्भा॒गधे॒यीः स्थे॑त्याह यथा॒यजु॑रे॒वैतदा॑ग्नी॒द्ध्र उप॑
 वा॒सय॑त्ये॒तद्-वै य॒ज्ञस्या॑परा॒जितं॑ यदा॑ग्नी॒द्ध्रं यदे॒व य॒ज्ञस्या॑परा॒जितं॑
 तदे॒वैना॑ उप॒ वास॑यति यतः खलु॒ वै य॒ज्ञस्य॑ वित॒तस्य॑ न क्रि॒यते॑ ()
 तदनु॑ य॒ज्ञं रक्षा॑स्य॒व चर॑न्ति यद् वह॑न्तीनां गृ॒ह्णाति॑ क्रि॒यमा॑णमे॒व

तद् य॒ज्ञस्य॑ श॒ये र॒क्षसा॑-म॒नन्व॑व॒चाराय॑ न ह्ये॒ता ई॒लय॑न्त्या
तृ॒तीय॑स॒वनात्॑ परि॒ शेरे॑ य॒ज्ञस्य॑ स॒न्तत्यै॑ ॥ 11

(स्या - दिन्द्रो - गृह्णीया - दस्त्व - मुष्मिन् - क्रियते -
षड्विंशतिश्च) (A2)

TS 6.4.3.1

ब्र॒ह्मवा॑दि॒नो वद॑न्ति स त्वा अ॒ध्वर्युः॑ स्याद्-यः सोम॑मु॒पाव॑हरन्थ्
सर्वा॑भ्यो दे॒वता॑भ्य उ॒पाव॑हरेदिति ह॒दे त्वेत्या॑ह म॒नुष्ये॑भ्य ए॒वैतेन॑
करोति॑ म॒नसे॑ त्वेत्या॑ह पि॒तृभ्य॑ ए॒वैतेन॑ करोति दि॒वे त्वा सूर्या॑य
त्वेत्या॑ह दे॒वेभ्य॑ ए॒वैतेन॑ करोत्ये॒तावती॑र्वे दे॒वता॑स्ताभ्य ए॒वैनं॑
सर्वा॑भ्य उ॒पाव॑हरति पु॒रा वाचः॑- [] 12

TS 6.4.3.2

प्र॒वदि॑तोः प्रा॒तर॑नु॒वाक॑मु॒पाक॑रोति याव॑त्ये॒व वाक् ताम॑व रुन्धे
ऽपो ऽग्ने॑ ऽभि॒व्याहर॑ति य॒ज्ञो वा आपो॑ य॒ज्ञमे॒वाभि वाचं॑ वि सृ॒जति
सर्वा॑णि छ॒न्दास्य॑न्वाह प॒शवो॑ वै छ॒न्दासि॑ प॒शूने॒वाव रुन्धे॑
गाय॑त्रिया ते॒जस्काम॑स्य परि द॒ध्यात् त्रि॑ष्टुभे॒न्द्रिय॑कामस्य जग॑त्या

प॒शु॒का॒म॒स्या॒नु॒ष्टु॒भा॑ ॥ प्र॒ति॒ष्ठा॒का॒म॒स्य॑ प॒ङ्क्त्या॑ य॒ज्ञ॒का॒म॒स्य॑
वि॒रा॒जा ऽन्न॑का॒म॒स्य॑ शृ॒णो॒त्व॒ग्निः॑ स॒मि॒धा ह॒वं- [] 13

TS 6.4.3.3

म॒ इत्या॑ह स॒वि॒तृ॒प्र॒सू॒त ए॒व दे॒वता॑भ्यो नि॒वे॒द्यापो॑ ऽच्छै॒त्यप॑ इ॒ष्य
हो॒त॒रि॒त्या॑हे॒षित॑ हि क॒र्म क्रि॒यते॑ मै॒त्रा॒व॒रु॒णस्य॑ च॒म॒सा॒द्ध्व॒र्य॒वा
द्र॒वे॒त्या॑ह मि॒त्रा॒व॒रु॒णौ वा अ॒पां ने॒तारौ॑ ता॒भ्या॑मे॒वैना॑ अ॒च्छै॒ति
दे॒वी॒रा॒पो अ॒पां न॒पा॒दि॒त्या॒हाऽऽहु॑त्यै॒वैना॑ नि॒ष्क्री॑य गृ॒ह्णा॒त्यथो॑
ह॒वि॒ष्कृ॑ताना-मे॒वाभि॑घृ॒तानां॑ गृ॒ह्णा॒ति- [] 14

TS 6.4.3.4

का॒र्षि॒रसी॑त्या॒ह श॑म॒लमे॒वाऽऽसा॑मप॒ प्ला॒व॒यति॑ स॒मु॒द्र॒स्य॒ वो ऽक्षि॑त्या
उ॒न्न॒य इत्या॑ह तस्मा॒दद्य॑मा॒नाः पी॒य॒मा॒ना आ॒पो न क्षी॑यन्ते यो॒निर्वै
य॒ज्ञस्य॑ चा॒त्वा॒लं य॒ज्ञो व॑स॒ती॒वरी॑र्. हो॒तृ॒च॒म॒सं च॑ मै॒त्रा॒व॒रु॒णच॑म॒सं
च स॒स्पर्श्य॑ व॒सती॑वरी॒र्व्या॑न॒यति॑ य॒ज्ञस्य॑ स॒यो॒नि॒त्वा॒याथो॑ स्वा॒दे॒वैना॑
यो॒नेः प्र॑ ज॒न॒य॒त्य॒द्ध्व॒र्यो ज्वे॑-र॒पा(3) इत्या॑हो॒ते ()-म॑न॒न्न॒मु-रु॒ते॒माः

पश्येति वावैतदाह यद्यग्निष्टोमो जुहोति यद्युक्थ्यः परिधौ नि
 माष्टि यद्यतिरात्रो यजुर्वदन् प्र पद्यते यज्ञक्रतूनां व्यावृत्तयै ॥ 15

(वाचो-हव-मभिघृतानां गृह्णात्यु - त - पञ्चविंशतिश्च) (A3)

TS 6.4.4.1

देवस्य त्वा सवितुः प्रसव इति ग्रावाणमा दत्ते प्रसूत्या अश्विनौ-
 बाहुभ्यामित्याहाश्विनौ हि देवानामध्वर्यू आस्तां पूष्णो
 हस्ताभ्यामित्याह यत्यै पशवो वै सोमो व्यान उपांशुसवनो
 यदुपांशुसवन-मभि मिमीते व्यानमेव पशुषु दधातीन्द्राय त्वेन्द्राय
 त्वेति मिमीत इन्द्राय हि सोम आहियते पञ्च कृत्वो यजुषा

मिमीते- [] 16

TS 6.4.4.2

पञ्चाक्षरा पङ्क्तिः पाङ्क्तौ यज्ञो यज्ञमेवाव रुन्धे पञ्च कृत्वस्तूष्णीं
 दश सं पद्यन्ते दशाक्षरा विराडन्नं विराड् विराजैवान्नाद्यमव रुन्धे
 श्वात्राः स्थ वृत्रतुर इत्याहैष वा अपां सोमपीथो य एवं वेद
 नाफस्वार्तिमाच्छति यत्ते सोम दिवि ज्योतिरित्याहैभ्य एवैनं- [] 17

TS 6.4.4.3

ँलो॒के॒भ्यः॒ सं॑ भ॒रति॑ सो॒मो॒ वै॒ राजा॑ दि॒शो॒ऽभ्य॑द्द॒ध्याय॑त् स दि॒शो॒ ऽनु॑
प्रा॒वि॒शत् प्रा॒गपा॑गु॒दग॑ध॒रागि॑त्याह दि॒ग्भ्य॑ ए॒वैन॑ꣳ सं॑ भ॒रत्य॑थो दि॒श
ए॒वास्मा॑ अ॒व रु॒न्धे ऽम्ब॑ नि ष्व॒रेत्या॑ह का॒मुका॑ ए॒नꣳ स्त्रि॑यो भ॒वन्ति॑
य ए॒वं वै॒द यत् ते॑ सो॒मादा॑भ्यं॑ नाम॒ जागृ॑वीत्या- [] 18

TS 6.4.4.4

-है॒ष वै॒ सोम॑स्य सोम॒पीथो॑ य ए॒वं वै॒द न॒ सौम्या॑मार्ति॒माच्छ॑ति
घ्नन्ति॑ वा ए॒तत् सो॒मं य॑दभिषु॒ण्वन्त्य॑ꣳशू॒नप॑ गृह्णाति॒ त्राय॑त
ए॒वैनं॑ प्रा॒णा वा अ॒ꣳश॒वः प॒श॒वः सो॒मो ऽꣳशू॒न् पु॒नरपि॑ सृ॒जति॑
प्रा॒णाने॒व प॒शुषु॑ दधाति॒ द्वौद्वौ॑वपि॒ सृ॒जति॑ तस्माद् द्वौद्वौ॑ प्रा॒णाः ॥ 19
(य॒जुषा॑ मिमीत - ए॒नं - जा॒गृवी॑ति - च॒तुश्च॑त्वारिꣳश॒च्च) (A4)

TS 6.4.5.1

प्रा॒णो वा ए॒ष य॑दुपाꣳशु॒ र्यदु॑पाꣳश्व॒ग्रा ग्र॑हा गृह्यन्ते॑ प्रा॒णमे॒वानु॑
प्र॒ यन्त्य॑रु॒णो ह॑ स्माऽऽहौ॑प॒वेशिः॑ प्रा॒तस्स॒वन ए॒वाहं॑ य॒ज्ञꣳ सꣳ
स्था॑पयामि॒ तेन॑ ततः सꣳस्थि॑तेन च॒रामी॑त्यष्टौ कृ॒त्वो ऽग्ने॑ ऽभि
षु॒णोत्य॑ष्टाक्ष॒रा गा॒यत्री॑ गा॒यत्रं॑ प्रा॒तस्स॒वनं प्रा॒तस्स॒वनमे॒व

तेनाऽऽप्नोत्येकादश कृत्वो द्वितीय-मेकादशाक्षरा त्रिष्टुप् त्रैष्टुभं
माद्ध्यन्दिनः- [] 20

TS 6.4.5.2

सवनं माद्ध्यन्दिनमेव सवनं तेनाऽऽप्नोति द्वादश कृत्वस्तृतीयं
द्वादशाक्षरा जगती जागतं तृतीयसवनं तृतीयसवनमेव तेना
ऽऽ*प्नोत्येताः ह वाव स यज्ञस्य सऽस्थितिमुवाचा
स्कन्दायास्कन्नः हि तद्-यद्-यज्ञस्य सऽस्थितस्य स्कन्दत्यथो
खल्वाहुर्गायत्री वाव प्रातस्सवने नातिवाद इत्यनतिवादुक एनं
भ्रातृव्यो भवति य एवं वेद तस्मादष्टावष्टौ- [] 21

TS 6.4.5.3

कृत्वो ऽभिषुत्यं ब्रह्मवादिनो वदन्ति पवित्रवन्तो ऽन्ये ग्रहा गृह्यन्ते
किंपवित्र उपाऽशुरिति वाक्पवित्र इति ब्रूयाद्-वाचस्पतये पवस्व
वाजिन्नित्याह वाचैवैनं पवयति वृष्णो अऽशुभ्यामित्याह वृष्णो
ह्येतावऽशू यौ सोमस्य गभस्तिपूत इत्याह गभस्तिना ह्येनं पवयति
देवो देवानां पवित्रमसीत्याह देवो ह्येष- [] 22

TS 6.4.5.4

सन् देवानां पवित्रं येषां भागो ऽसि तेभ्यस्त्वेत्याह येषां ह्येष
 भागस्तेभ्य एनं गृह्णाति स्वाङ्कृतो ऽसीत्याह प्राणमेव स्वमकृत
 मधुमतीर्न इषस्कृधीत्याह सर्वमेवास्मा इदं स्वदयति विश्वेभ्य-
 स्त्वेन्द्रियेभ्यो दिव्येभ्यः पार्थिवेभ्य इत्याहोभयेष्वेव देवमनुष्येषु
 प्राणान् दधाति मनस्त्वा- [] 23

TS 6.4.5.5

ऽष्टिवत्याह मन एवाश्नुत उर्वन्तरिक्ष-मन्विहीत्याहा-न्तरिक्षदेवत्यो
 हि प्राणः स्वाहा त्वा सुभवः सूर्यायेत्याह प्राणा वै स्वभवसो
 देवास्तेष्वेव परोक्षं जुहोति देवेभ्यस्त्वा मरीचिपेभ्य इत्याहाऽऽदित्यस्य
 वै रश्मयो देवा मरीचिपास्तेषां तद् भागधेयं तानेव
 तेन प्रीणाति यदि कामयेत वर्षुकः पर्जन्यः- [] 24

TS 6.4.5.6

स्यादिति नीचा हस्तेन नि मृज्याद्-वृष्टिमेव नि यच्छति यदि
 कामयेतावर्षुकः स्यादित्युत्तानेन नि मृज्याद्-वृष्टिमेवोद्-यच्छति
 यद्यभिचरेदमुं जह्यथ त्वा होष्यामीति ब्रूयादाहुतिमेवैनं प्रेप्सन्

हन्ति॑ यदि॑ दू॒रे स्या॑दा तमि॒तोस्ति॑ष्ठेत् प्रा॒णमे॒वास्या॑नु॒गत्य॑ हन्ति॒
यद्य॑भि॒चरे॑दमुष्य- [] 25

TS 6.4.5.7

त्वा प्रा॒णे सा॑दया॒मीति॑ सा॒दये॒दसन्नो॑ वै प्रा॒णः प्रा॒णमे॒वास्य॑ सा॒दयति॑
षड्भि॑-र॒शुभिः॑ पव॒यति॑ षड् वा ऋ॒तव॑ ऋ॒तुभिरे॒वैनं॑ पव॒यति॑
त्रिः पव॑यति॒ त्रय॑ इ॒मे लो॒का ए॒भिरे॒वैनं॑ लो॒कैः पव॑यति॒ ब्रह्म॑वा॒दिनो॑
वद॑न्ति कस्मा॒त् स॒त्यात् त्रयः॑ प॒शूना॑ ह॒स्तादा॑ना इति॒ यत्
त्रि॒रुपा॑शु॒ हस्ते॑न वि॒गृह्णा॑ति तस्मा॒त् त्रयः॑ प॒शूना॑ ह॒स्तादा॑नाः
पुरु॑षो () ह॒स्ती म॒र्कटः॑ ॥ 26

(मा॒ध्यन्दि॑न - म॒ष्टाव॑ष्टा - वे॒ष - मन॑स्त्वा - प॒र्जन्यो॑ - ऽमु॒ष्य -
पुरु॑षो - द्वे च) (A5)

TS 6.4.6.1

दे॒वा वै यद् य॒ज्ञे ऽकु॑र्वत॒ तदसु॑रा अकुर्वत॒ ते दे॒वा उ॒पाशु॑ य॒ज्ञं
स॒स्थाप्य॑मप॒श्यन् तमु॒पाशु॑ सम॒स्थाप॑यन् ते ऽसु॒रा वज्र॑मु॒द्यत्य॑
दे॒वान॒भ्याय॑न्त॒ ते दे॒वा बि॑भ्यत॒ इन्द्र॑मु॒पाधा॑वन्

तानिन्द्रो॑ ऽन्तर्या॑मेणान्तर॑धत्त॒ तदन्तर्या॑मस्यान्तर्या॑मत्वं॑ यदन्तर्या॑मो गृह्यते॑
 भ्रातृ॑व्याने॒व तद् यज॑मानो ऽन्तर्द॑धत्ते॒ ऽन्तस्ते॑- [] 27

TS 6.4.6.2

दधामि॑ द्यावा॑पृथि॒वी अन्तरु॑-र्वन्तरि॑क्ष-मित्या॑हैभिरे॒व लो॒कैर्यज॑मानो
 भ्रातृ॑व्यानन्तर्द॑धत्ते॒ ते दे॒वा अ॑मन्यन्तेन्द्रो॒ वा इ॒दम॑भूद्-यद्
 वय॑ञ् स्म इति॑ ते॒ ऽब्रु॑वन् मघ॑वन्ननु॒ न आ भ॑जेति॒ सजो॑षा दे॒वैर॑वरैः
 परै॑श्चेत्यब्र॒वीद्-ये चै॒व दे॒वाः परे॒ ये चा॑वरे॒ तानु॑भया- [] 28

TS 6.4.6.3

नन्वा॑भजथ् सजो॑षा दे॒वैर॑वरैः परै॑श्चेत्या॒ह ये चै॒व दे॒वाः परे॒ ये
 चा॑वरे॒ तानु॑भया-नन्वा॑भज-त्यन्तर्या॑मे मघ॑वन् माद॒यस्वेत्या॑ह
 यज्ञा॑दे॒व यज॑मानं॒ नान्तरे॑त्युप॒याम॑गृहीतो॒ ऽसीत्या॑हापानस्य॒ धृत्यै॑
 यदु॑भावपवि॒त्रौ गृ॒ह्येया॑तां प्रा॒णम॑पानो॒ ऽनु न्यृ॑च्छेत् प्र॒मायु॑कः
 स्यात् प॒वित्र॑वानन्तर्या॑मो गृह्यते- [] 29

TS 6.4.6.4

प्राणा॑पानयो-र्वि॒धृत्यै॑ प्राणा॑पानौ वा ए॒तौ यदु॑पाञ्चन्तर्या॑मौ व्या॒न
 उपा॑ञ्शु॒सवनो॒ यं का॒मये॑त प्र॒मायु॑कः स्यादित्य॑सञ्स्पृष्टौ॒ तस्य॑

सादयेद्-व्यानेनैवास्य प्राणापानौ वि च्छिनत्ति ताजक् प्र मीयते यं
कामयेत् सर्वमायुरियादिति स७ स्पृष्टौ तस्य सादयेद्-व्यानेनैवास्य
प्राणापानौ सं तनोति सर्वमायुरेति ॥ 30

(त - उभयान् - गृह्यते - चतुश्चत्वारिंशच्च) (A6)

TS 6.4.7.1

वाग्वा एषा यदैन्द्रवायवो यदैन्द्रवायवाग्रा ग्रहा गृह्यन्ते वाचमेवानु
प्र यन्ति वायुं देवा अब्रुवन्थ सोम७ राजान७ हनामेति सौ ऽब्रवीद्
वरं ँवृणै मदग्रा एव वो ग्रहा गृह्यान्ता इति तस्मादैन्द्रवायवाग्रा
ग्रहा गृह्यन्ते तमघ्नन्थ सोऽपूयत् तं देवा नोपाधृष्णुवन् ते वा
युमब्रुवन्निमं नः स्वदये- [] 31

TS 6.4.7.2

-ति सौ ऽब्रवीद् वरं ँवृणै मद्देवत्यान्येव वः पात्राण्युच्यान्ता इति
तस्मान्नानादेवत्यानि सन्ति वायव्यान्युच्यन्ते तमैभ्यो वायुरेवास्वदयत्
तस्माद्-यत् पूयति तत् प्रवाते वि षजन्ति वायुर्.हि तस्य पवयिता
स्वदयिता तस्य विग्रहणं नाविन्दन्थ सा ऽदितिरब्रवीद् वरं ँवृणा अथ
मया वि गृह्णीद्ध्वं मद्देवत्या एव वः सोमाः - [] 32

TS 6.4.7.3

स॒न्ना अस॑-॒न्नित्यु॑पया॒मगृ॑हीतोऽसी-॒त्याहा-॑दिति॒देव॑त्या॒स्तेन॑
या॒नि हि दा॑रु॒मया॑णि॒ पात्रा॑ण्यस्यै॒ तानि॑ यो॒नेः संभू॑तानि॒ यानि॑
मृ॒न्मया॑नि सा॒क्षात् तान्य॑स्यै॒ तस्मा॑दे॒वमा॑ह वा॒ग्वै परा॑च्य-
व्या॒कृता॑ ऽव॒दत् ते दे॒वा इन्द्र॑मब्रुवन्नि॒मां नो॒ वाचं॑ ॐ व्या॒कुर्वि॑ति
सो॑ ऽब्र॒वीद् वरं॑ ॐ वृ॒णै मह्यं॑ चै॒वैष वा॑यवे॒ च सह॑ () गृ॒ह्याता॑
इति॑ तस्मा॒दैन्द्र॑वा॒यवः सह॑ गृ॒ह्यते॑ तामिन्द्रो॑ मद्ध्यतो॑ ऽव॒क्रम्य॑
व्या॒करो॑त् तस्मा॒दियं॑ ॐ व्या॒कृता॑ वा॒गुद्यते॑ तस्मा॒त् सकृ॑दिन्द्राय
मद्ध्यतो॑ गृ॒ह्यते॑ द्वि॒र्वाय॑वे॒ द्वौ हि॑ स वरा॒ववृ॑णीत ॥ 33

(स्व॒दय॑ - सो॒माः - स॒हा - षा॒वि॒शति॑श्च) (A7)

TS 6.4.8.1

मि॒त्रं दे॒वा अब्रु॑वन्थ् सोम॒ञ् राजा॑नञ् ह॒नामे॑ति सो॑ ऽब्र॒वीन्नाह॑ञ्
सर्व॑स्य॒ वा अ॒हं मि॒त्रम॑स्मीति॒ तमब्रु॑वन्. ह॒नामै॑वेति सो॑ ऽब्र॒वीद् वरं॑
ॐ वृ॒णै प॑यसै॒व मे सोम॑ञ् श्री॒णन्निति॑ तस्मा॒न्-मै॒त्राव॑रु॒णं प॑यसा

श्री॑णन्ति॑ तस्मात्॑ प॒शवोऽपा॑क्रामन् मि॒त्रः सन् कू॒रमक॑रिति॑ कू॒रमिव॑
खलु॑ वा ए॒षः - [] 34

TS 6.4.8.2

करो॑ति यः सोमे॑न यज॑ते तस्मात्॑ प॒शवो ऽप॑ क्रामन्ति॑ यन्मै॑त्रावरु॒णं
पय॑सा श्री॒णाति॑ प॒शुभिरे॑व तन्मि॒त्रं सम॑र्द्धयति॑ प॒शुभिर्य॑जमानं
पुरा॑ खलु॑ वावै॑वं मि॒त्रो ऽवे॒दप॒ मत् कू॒रं च॒क्रुषः॑ प॒शवः॑ क्रमि॒ष्यन्तीति॑
तस्मा॑दे॒वमवृ॑णीत वरु॒णं दे॒वा अब्रु॑वन् त्वयाऽ॒श॒भुवा॑ सोमं॑
राजा॑नं ह॒नामे॑ति॒ सो ऽब्र॑वीद् वरं॑ वृ॒णै मह्यं॑ चै- [] 35

TS 6.4.8.3

वैष॑ मि॒त्राय॑ च स॒ह गृ॑ह्याता इति॑ तस्मान्मै॑त्रावरु॒णः स॒ह गृ॑ह्यते
तस्मा॑द् राजा॒ राजा॑नम॒श॒भुवा॑ घ्नन्ति॑ वैश्ये॑न वैश्यं॑ शू॒द्रेण॑
शू॒द्रं न वा॑ इ॒दं दि॒वा न नक्त॑मासीदव्यावृ॒त्तं ते दे॒वा
मि॒त्रावरु॑णावब्रुवन्नि॒दं नो॑ वि वा॒सय॑तमिति॑ ताव॒ब्रूतां॑ वरं॑ वृ॒णावहा॑
एक॑ ए॒वाऽऽव॑त् पूर्॒वो ग्र॑हो गृह्याता इति॑ तस्मा॑दैन्द्रवा॒यवः॑ ()
पूर्॒वो मै॑त्रावरु॒णाद्-गृ॑ह्यते प्रा॒णापा॑नौ ह्ये॒तौ यदु॑पा॒श्वन्तर्या॑मौ

मि॒त्रोऽ॒हर॒जन॒यद्-व॒रु॒णो रा॒त्रिं ततो॒ वा इ॒दं व्यौ॑च्छद्-यन्-
मै॒त्राव॒रु॒णो गृ॒ह्यते॑ व्यु॒ष्ट्यै ॥ 36

(ए॒ष - चै॑ - न्द्र॒वा॒य॒वो - द्वावि॑ऽशतिश्च) (A8)

TS 6.4.9.1

य॒ज्ञस्य॑ शि॒रोऽच्छि॑द्यत ते दे॒वा अ॒श्वि॒ना॒वब्रु॑वन् भि॒षजौ॑ वै स्थ इ॒दं
य॒ज्ञस्य॑ शि॒रः प्र॒ति ध॒त्तमि॑ति ताव॒ब्रू॒तां व॑रं वृ॒णा॒वहै॑ ग्र॒ह ए॒व
ना॒वत्रा॑पि गृ॒ह्यता॑मि॒ति ता॒भ्या-मे॒तमा॑श्वि॒न-म॑गृ॒ह्णन् ततो॒ वै तौ
य॒ज्ञस्य॑ शि॒रः प्र॒त्यध॑त्तां य॒दाश्वि॑नो गृ॒ह्यते॑ य॒ज्ञस्य॑
निष्कृ॑त्यै तौ दे॒वा अब्रु॑वन् न॒पू॒तौ वा इ॒मौ म॑नुष्य॒चरौ॑- [] 37

TS 6.4.9.2

भि॒षजा॑वि॒ति तस्मा॑द् ब्रा॒ह्म॒णेन॑ भे॒षजं॑ न का॒र्यम॑पू॒तो ह्यै॑(1)षो
ऽमे॑द्ध्यो यो भि॒षक्तौ॑ ब॒हिष्प॑व॒माने॑न प॒वयि॑त्वा ता॒भ्या-मे॒तमा॑श्वि॒न-
म॑गृ॒ह्णन् तस्मा॑द् ब॒हिष्प॑व॒माने॑ स्तु॒त आ॑श्वि॒नो गृ॒ह्यते॑ तस्मा॑दे॒वं वि॒दुषा॑
ब॒हिष्प॑व॒मान॑ उ॒पस॑द्यः प॒वित्रं॑ वै ब॒हिष्प॑व॒मान॑ आ॒त्मान॑मे॒व प॑वयते

तयो॑ स्त्रे॒धा भै॑षज्यं॑ वि॒ न्यद॑धु॒रग्नौ॑ तृ॒तीयम॑प्सु तृ॒तीयं॑ ब्रा॒ह्मणे॑ तृ॒तीयं॑
तस्मा॑दुदपात्र- [] 38

TS 6.4.9.3

-मु॒पनि॒धाय॑ ब्रा॒ह्मणं॑ दक्षि॒णतो॑ नि॒षाद्य॑ भेष॒जं कुर्या॑द् याव॒देव॑
भेष॒जं तेन॑ करोति॒ समर्द्धु॑कमस्य कृतं॑ भवति॒ ब्रह्म॑वा॒दिनो॑ वदन्ति॒
कस्मा॑त् स॒त्यादे॑कपात्रा द्विदे॒वत्या॑ गृह्यन्ते॑ द्विपात्रा॑ हूयन्त॒ इति॑
यदे॑कपात्रा गृह्यन्ते॒ तस्मा॑देको॑ ऽन्तरतः प्रा॒णो द्वि॒पात्रा॑ हूयन्ते॒
तस्मा॑द् द्वौ॒ द्वौ ब॒हिष्ठा॑त् प्रा॒णाः प्रा॒णा वा ए॒ते यद् द्वि॒देव॑त्याः
प॒शव॑ इ॒डा यदि॒डां पूर्वा॑ द्विदे॒वत्ये॑भ्य उप॒ह्रये॑त- [] 39

TS 6.4.9.4

प॒शुभिः॑ प्रा॒णान॑न्तर्दधीत॒ प्रमा॑युकः स्याद् द्विदे॒वत्या॑न्
भक्ष॑यित्वे॒डामु॑प ह्रयते प्रा॒णाने॒वाऽऽत्म॑न् धि॒त्वा प॒शूनु॑प ह्रयते
वाग्वा॑ ऐन्द्र॒वायव॑श्चक्षु-मै॒त्रावरु॑णः श्रोत्र॑माश्विनः पु॒रस्ता॑दैन्द्र॒वायवं॑
भक्ष॑यति॒ तस्मा॑त् पु॒रस्ता॑द् वा॒चा वद॑ति पु॒रस्ता॑न्मै॒त्रावरु॑णं तस्मा॑त्
पु॒रस्ता॑च्चक्षु॒षा पश्य॑ति॒ सर्व॑तः परि॒हार॑माश्विनं तस्मा॑त् सर्व॑तः
श्रोत्रे॑ण शृणोति प्रा॒णा वा ए॒ते यद् द्वि॒देव॑त्या- [] 40

TS 6.4.9.5

अरि॑क्तानि॒ पात्रा॑णि सा॒दय॑ति तस्मा॒दरि॑क्ता अन्त॒रतः॑ प्रा॒णा यतः॑ खलु
 वै य॒ज्ञस्य॑ वि॒ततस्य॑ न क्रि॒यते॑ तदनु॒ य॒ज्ञꣳ रक्षाꣳस्य॑व चरन्ति
 यदरि॑क्तानि॒ पात्रा॑णि सा॒दय॑ति क्रि॒यमाण॑मेव तद् य॒ज्ञस्य॑ शये॒ रक्ष॑सा
 -मन॑न्वव॒चाराय॑ दक्षि॑णस्य ह॒विर्द॑धान॒स्योत्त॑रस्यां ँ॒वर्त॑न्याꣳ सा॒दय॑ति
 वाच्ये॑व वाचं॑ दधा॒त्या तृ॑तीय॒सव॑नात् परि॑ शेरे॒ य॒ज्ञस्य॑ सन्तत्यै ॥ 41

(म॒नुष्य॑चरा - वु॒दपा॑त्र - मु॒पह्व॑र्यत - द्वि॒देव॑त्याः -

षट्च॑त्वारिꣳशच्च) (A9)

TS 6.4.10.1

बृ॒हस्प॑तिर्दे॒वानां॑ पु॒रोहि॑त आसी-च्छण्डा॒मर्का॑-वसु॒राणां॑ ब्रह्म॑ण्वन्तो
 दे॒वा आ॑सन् ब्रह्म॑ण्वन्तोऽसु॒रास्ते॑(1) ऽन्योऽन्यं॑ नाश॒क्नुव॑-न्नभि॑भवितुं
 ते दे॒वाः शण्डा॑मर्का॒-वुपा॑मन्त्रयन्त॒ ताव॑ब्रू॒तां ँ॒वरं॑ ँ॒वृणा॑वहै॒ ग्रहा॑वेव
 नाव॑त्रापि॒ गृह्ये॑तामिति॒ ताभ्या॑मेतौ शु॒क्राम॑न्थिना-वगृह्णन् ततो॑ दे॒वा
 अ॒भवन्॑ पराऽसु॒रा य॑स्यै॒वं वि॒दुषः॑ शु॒क्राम॑न्थिनौ॒ गृह्ये॑ते भव॒त्यात्म॑ना
 ॥
 परा- [] 42

TS 6.4.10.2

ऽस्य भ्रातृव्यो भवति तौ देवा अपनुद्याऽऽत्मन इन्द्रायाजुहवु-रपनुत्तौ
 शण्डामर्कौ सहामुनेति ब्रूयाद्-यं द्विष्याद्-यमेव द्वेष्टि तेनैनौ
 सहाप नुदते स प्रथमः संकृति-विश्वकर्मत्येवैना-वात्मन इन्द्राया-
 जुहवुरिन्द्रो ह्येतानि रूपाणि करिक्रदचरदसौ वा आदित्यः

शुक्रश्चन्द्रमा मन्थ्यपिगृह्य प्राञ्चौ नि- [] 43

TS 6.4.10.3

ष्क्रामत-स्तस्मात् प्राञ्चौ यन्तौ न पश्यन्ति प्रत्यञ्चावावृत्य
 जुहुतस्तस्मात् प्रत्यञ्चौ यन्तौ पश्यन्ति चक्षुषी वा एते यज्ञस्य
 यच्छुक्रामन्थिनौ नासिकोत्तरवेदिरभितः परिक्रम्य जुहुतस्तस्मादभितो
 नासिकां चक्षुषी तस्मान्नासिकया चक्षुषी विधृते सर्वतः परि
 क्रामतो रक्षसामपहत्यै देवा वै याः प्राचीराहुतीरजुहवुर्ये

पुरस्तादसुरा आसन् ताऽ स्ताभिः प्रा- [] 44

TS 6.4.10.4

-णुदन्त याः प्रतीचीर्ये पश्चादसुरा आसन् ताऽ स्ताभिरपानुदन्त
 प्राचीरन्या आहुतयो हूयन्ते प्रत्यञ्चौ शुक्रामन्थिनौ पश्चाच्चैव

पुरस्ताच्च यजमानो भ्रातृव्यान् प्र णुदते तस्मात् पराचीः प्रजाः
 प्र वीयन्ते प्रतीचीर्जायन्ते शुक्रामन्थिनौ वा अनु प्रजाः प्र
 जायन्ते ऽत्रीश्चाद्याश्च सुवीराः प्रजाः प्रजनयन् परीहि शुक्रः

शुक्रशोचिषा- [] 45

TS 6.4.10.5

सुप्रजाः प्रजाः प्रजनयन् परीहि मन्थी मन्थिशोचिषेत्याहैता वै
 सुवीरा या अत्रीरेताः सुप्रजा या आद्या य एवं वेदान्यस्य प्रजा
 जायते नाऽऽद्या प्रजापतेरक्ष्यश्चयत् तत् परा ऽऽपतत् तद् विकङ्कतं
 प्राविशत् तद् विकङ्कते नारमत तद् यवं प्राविशत् तद् यवे ऽरमत तद्
 यवस्य- [] 46

TS 6.4.10.6

यवत्वं यद् वैकङ्कतं मन्थिपात्रं भवति सक्तुभिः श्रीणाति प्रजापतेरेव
 तच्चक्षुः सं भरति ब्रह्मवादिनो वदन्ति कस्मात् सत्यान्मन्थिपात्रं
 सदो नाश्नुत इत्यार्तपात्रं हीति ब्रूयाद्-यदश्नुवीतान्धो ऽध्वर्युः
 स्यादार्तिमाच्छेत् तस्मान्नाश्नुते ॥ 47

(आत्मना परा – नि – ष्र – शुक्रशोचिषा – यवस्य –
सप्तत्रिंशच्च) (A10)

TS 6.4.11.1

दे॒वा वै यद् य॒ज्ञे ऽकु॑र्वत॒ तद॑सुरा अकुर्वत॒ ते दे॒वा आ॑ग्रय॒णाग्रा॑न्
ग्र॒हान॑पश्यन् तान॑गृह्णत॒ ततो॑ वै तेऽग्रं॒ पर्या॑यन्. यस्यै॒वं वि॒दुष॑
आग्र॒यणा॑ग्रा॒ ग्रहा॑ गृह्यन्तेऽग्र॒मेव॑ समा॒नानां॑ पर्येति॒ रुग्ण॑वत्यर्चा
भ्रातृ॑व्यवतो गृह्णीयाद्-भ्रातृ॑व्यस्यै॒व रुक्त्वा॑ ऽग्रं॒ समा॒नानां॑ पर्येति॒
ये दे॒वा दि॒व्येका॑दश॒ स्थेत्या॑है- [] 48

TS 6.4.11.2

-ताव॑तीर्वे॒ दे॒वता॑स्ताभ्य॒ एवै॑नं॒ सर्वा॑भ्यो गृह्णात्येष॒ ते यो॒नि
विश्वे॑भ्यस्त्वा दे॒वेभ्य॑ इत्याह॒ वैश्व॑दे॒वो ह्येष॑ दे॒वतया॑ वाग्वै
दे॒वेभ्यो॑-ऽपा॒क्राम॑द्-य॒ज्ञाया॑तिष्ठ॒माना॑ ते दे॒वा वा॒च्यप॑क्रान्तायां॒ तूष्णीं॑
ग्र॒हान॑गृह्णत॒ सा ऽम॑न्यत॒ वाग॑न्तर्यन्ति॒ वै मे॒ति सा ऽऽग्र॑यणं
प्रत्या॑गच्छत्॒ तदा॑ग्र॒यण॑स्याऽऽग्र॒यण॑त्वं- [] 49

TS 6.4.11.3

तस्मादाग्रयणे वाग्वि सृज्यते यत् तूष्णीं पूर्वे ग्रहा गृह्यन्ते
 यथात्सारीयति म आख इयति नाप राथस्या-मीत्युपावसृजत्येवमेव
 तदध्वर्युराग्रयणं गृहीत्वा यज्ञमारभ्य वाचं वि सृजते त्रिर्हि
 करोत्युद्गातृ-नेव तद् वृणीते प्रजापतिर्वा एष यदाग्रयणो
 यदाग्रयणं गृहीत्वा हिं करोति प्रजापतिरेव- [] 50

TS 6.4.11.4

तत् प्रजा अभि जिघ्रति तस्माद् वथ्सं जातं गौरभि जिघ्रत्यात्मा वा
 एष यज्ञस्य यदाग्रयणः सवनेसवने ऽभि गृह्णात्यात्मन्नेव यज्ञं
 सं तनोत्युपरिष्ठादा नयति रेत एव तद् दधात्यधस्तादुप गृह्णाति
 प्र जनयत्येव तद्-ब्रह्मवादिनो वदन्ति कस्मात् सत्याद्-गायत्री
 कनिष्ठा छन्दसां सती सर्वाणि सवनानि वहतीत्ये ()-ष वै
 गायत्रियै वथ्सो यदाग्रयणस्तमेव तदभिनिवर्तं सर्वाणि सवनानि
 वहति तस्माद् वथ्समपाकृतं गौरभि नि वर्तते ॥ 51

(आहाऽऽ - ग्रयणत्वं - प्रजापतिरेवे - ति - विञ्शतिश्च) (A11)

Prasna Korvai with starting Padams of 1 to 11 Anuvaakams :-

(य॒ज्ञेन॑ ता॒ उप॒यडि॑भ - दे॒वा वै य॒ज्ञमा॑ग्नी॒ध्रे - ब्र॒ह्मवा॑दिनः स त्वै -
दे॒वस्य॑ ग्रा॒वाणं॑ - प्रा॒णो वा उ॒पा॒श्व॒ग्रा - दे॒वा वा उ॒पा॒शौ - वा॒ग्वै
- मि॒त्रं - य॒ज्ञस्य॑ - बृ॒हस्प॑ति - दे॒वा वा आ॒ग्र॒यणा॑ग्रा - ने॒का॒दश॑)

Korvai with starting Padams of 1, 11, 21 Series of Panchaatis :-

(य॒ज्ञेन॑ - लो॒के प॒शुमा॑न्थ् स्याथ् - स॒वनं॑ मा॒ध्यन्दि॑नं - वा॒ग्वा -
अ॒रि॒क्तानि॑ - तत् प्र॒जा - ए॒कप॑ञ्चा॒शत्)

First and Last Padam of Fourth Prasnam of 6th Kandam

(य॒ज्ञेन॑ - नि॒ वर्त॑ते)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां षष्ठकाण्डे चतुर्थः प्रश्नः

समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

6.5 षष्ठकाण्डे पञ्चमः प्रश्नः – सोममन्त्रब्राह्मणनिरूपणं

TS 6.5.1.1

इन्द्रो॑ वृ॒त्राय॑ वज्र॒मुदय॑च्छत् स वृ॒त्रो वज्रा॑दुद्य॒ताद॑बिभेथ् सो॑ ऽब्रवी॒न्मा॑
मे प्र हा॒-र॒स्ति वा इ॒दं म॑यि वी॒र्यं॑ तत् ते प्र दा॒स्यामी॑ति॒ तस्मा॑ उ॒क्थ्यं॑
प्राय॑च्छत् तस्मै॑ द्वि॒तीय॑मुदयच्छत् सो॑ ऽब्रवी॒न्मा॑ मे प्र हा॒र॒स्ति वा इ॒दं
म॑यि वी॒र्यं॑ तत् ते प्र दा॒स्यामी॑ति- [] 1

TS 6.5.1.2

तस्मा॑ उ॒क्थ्यमे॒व प्राय॑च्छत् तस्मै॑ तृ॒तीय॑मुदयच्छत् तं वि॒ष्णुर॑न्वतिष्ठत
ज॒हीति॑ सो॑ ऽब्रवी॒न्मा॑ मे प्र हा॒र॒स्ति वा इ॒दं म॑यि वी॒र्यं॑ तत् ते प्र
दा॒स्यामी॑ति॒ तस्मा॑ उ॒क्थ्यमे॒व प्राय॑च्छत् तं निर्मा॑यं भू॒तम॑हन् य॒ज्ञो हि
तस्य॑ मा॒या ऽऽसीद्-यदु॒क्थ्यो गृ॒ह्यत॑ इन्द्रि॒यमे॒व- [] 2

TS 6.5.1.3

तद् वी॒र्यं॑ य॒ज॒मानो॑ भ्रातृ॒व्यस्य॑ वृ॒ङ्क्ते॑ इन्द्राय॑ त्वा बृ॒हद्व॑ते वयस्वत
इत्या॑हेन्द्राय॑ हि स तं प्राय॑च्छत् तस्मै॑ त्वा वि॒ष्णावे॑ त्वेत्याह॑ यदेव

विष्णु॑र॒न्वति॑ष्ठत॒ ज॒हीति॑ तस्माद्-विष्णु॑म॒न्वाभ॑जति॒ त्रि॒र्निर्गृ॑ह्णाति॒ त्रि॒र्.
हि स॑ तं तस्मै॒ प्राय॑च्छ॒देष॑ ते॒ योनिः॑ पुन॑र्.हवि-रसीत्याह
पुनः॑पुन- [] 3

TS 6.5.1.4

ह्य॑स्मा-न्निर्गृ॑ह्णाति॒ चक्षु॑र्वा ए॒तद्-य॒ज्ञस्य॑ यदु॒क्थ्य-स्तस्मा॑दु॒क्थ्यं
हु॒तं सो॒मा अ॒न्वाय॑न्ति॒ तस्मा॑दा॒त्मा चक्षु॑र॒न्वेति॑ तस्मा॒देकं॑ य॒न्तं
ब॒हवोऽनु॑ यन्ति॒ तस्मा॑दे॒को ब॒हूनां॑ भ॒द्रो भ॑वति॒ तस्मा॑दे॒को ब॒हीर्जा॑या
वि॒न्दते॑ यदि॒ का॒मये॑ता-द्ध्व॒र्यु-रा॒त्मानं॑ य॒ज्ञय॑श॒सेना॑-र्पये॒य-
मि॒त्यन्तरा॑ऽऽह॒वनी॑यं च॒ हवि॑र्द्धानं च॒ तिष्ठ॑न्न॒व न॑ये- [] 4

TS 6.5.1.5

दा॒त्मान॑मे॒व य॒ज्ञय॑श॒सेना॑र्पयति॒ यदि॑ का॒मये॑त॒ यज॑मानं
य॒ज्ञ य॑श॒सेना॑र्पये॒य-मि॒त्यन्तरा॑ सदो॒हवि॑र्द्धाने॒ तिष्ठ॑न्न॒व
न॑येद्-य॒जमान॑मे॒व य॒ज्ञय॑श॒सेना॑-र्पयति॒ यदि॑ का॒मये॑त॒ सद॑स्यान्
य॒ज्ञ य॑श॒सेना॑र्पये॒यमि॒ति सद॑ आ॒लभ्या॑व न॑येथ् सद॒स्याने॑व
य॒ज्ञय॑श॒सेना॑र्पयति ॥ 5

(इती - न्द्रियमेव - पुनःपुन - नयेत् - त्रयस्त्रिंशच्च) (A1)

TS 6.5.2.1

आयु॒र्वा ए॒तद्-य॒ज्ञस्य॒ यद् ध्रु॒व उ॒त्त॒मो ग॒र्हाणां॑ गृ॒ह्यते॒ तस्मा॒दायुः॑
 प्रा॒णाना॑मु॒त्त॒मं मूर्द्धानं॑ दि॒वो अ॒रतिं॑ पृ॒थि॒व्या इ॒त्याह॑ मूर्द्धान॒मेवैन॑
 समा॒नानां॑ करोति वै॒श्वान॑रमृ॒ताय॑ जा॒तम॒ग्नि॒मित्या॑ह वै॒श्वान॑र॒ हि
 दे॒वत॒या ऽऽयु॑-रु॒भय॑तोवै॒श्वान॑रो गृ॒ह्यते॒ तस्मा॑दु॒भय॑तः प्रा॒णा अ॒धस्ता॑-
 च्चो॒परि॑ष्टा-च्चा॒र्द्धि॒नो ऽन्ये॑ ग॒र्हा गृ॒ह्यन्ते॒ ऽर्द्धी॑ ध्रु॒वस्त॑स्मा- [] 6

TS 6.5.2.2

-दर्द्ध्य॑वाङ् प्रा॒णो ऽन्ये॑षां प्रा॒णाना॑मु॒पोप्ते॒ ऽन्ये॑ ग॒र्हाः सा॒द्यन्ते॑ ऽनु॒पोप्ते॑
 ध्रु॒व-स्त॑स्मा॒-द॒स्थ॒ना ऽन्याः॑ प्र॒जाः प्र॒ति॒ति॒ष्ठन्ति॑ मा॒से॒नान्या॑ अ॒सुरा॑
 वा उ॒त्तर॑तः पृ॒थि॒वीं प॒र्या॒चि॒कीर्ष॑न् तां दे॒वा ध्रु॒वेणा॑दृ॒हन् तद् ध्रु॒वस्य॑
 ध्रु॒वत्वं यद् ध्रु॒व उ॒त्तर॑तः सा॒द्यते॒ धृत्या॑ आयु॒र्वा ए॒तद्-य॒ज्ञस्य॒
 यद् ध्रु॒व आ॒त्मा हो॒ता यद्धो॑तृ॒चम॑से ध्रु॒व-म॒वन॑य॒त्यात्म॑न्ने॒व
 य॒ज्ञस्या॑- [] 7

TS 6.5.2.3

-यु॒र्दधा॑ति पु॒रस्ता॑दु॒क्थस्या॑व॒नीय॒ इत्या॑हुः पु॒रस्ता॑द्द॒ध्यायु॑षो भु॒ङ्क्ते
 म॒द्ध्यतो॑ ऽव॒नीय॒ इत्या॑हुर्म॒द्ध्यमे॑न ह्यायु॑षो भु॒ङ्क्ते॑ उ॒त्तरा॑र्द्धे॒ ऽव॒नीय॒

इत्याहुरुत्तमेन ह्यायुषो भुङ्क्ते वैश्वदेव्यामृचि शस्यमानायामव नयति
वैश्वदेव्यो वै प्रजाः प्रजास्वेवाऽऽयुर्दधाति ॥ 8

(ध्रुवस्तस्मा - देव यज्ञस्यै - कान्नचत्वारिंशच्च) (A2)

TS 6.5.3.1

यज्ञेन वै देवाः सुवर्गं लोकमायन् ते ऽमन्यन्त मनुष्या
नो ऽन्वाभविष्यन्तीति ते सँवथ्सरेण योपयित्वा सुवर्गं लोकमायन्
तमृषय ऋतुग्रहै-रेवानु प्राजानन्. यदृतुग्रहा गृह्यन्ते सुवर्गस्य लोकस्य
प्रजात्यै द्वादश गृह्यन्ते द्वादश मासाः सँवथ्सरः सँवथ्सरस्य प्रजात्यै
सह प्रथमौ गृह्येते सहोत्तमौ तस्माद् द्वौद्वौवृतू उभयतोमुख-मृतुपात्रं
भवति को- [] 9

TS 6.5.3.2

हि तद्-वेद यत ऋतूनां मुखमृतुना प्रेष्येति षट् कृत्व आह
षड्वा ऋतव ऋतूनेव प्रीणात्यृतुभिरिति चतुश्चतुष्पद एव पशून्
प्रीणाति द्विः पुनर्. ऋतुना ऽऽह द्विपद एव प्रीणात्यृतुना प्रेष्येति
षट् कृत्व आहर्तुभिरिति चतुस्तस्मा-च्चतुष्पादः पशव
ऋतूनुप जीवन्ति द्विः- [] 10

TS 6.5.3.3

पुनर् ऋतुना ऽऽह तस्माद्-द्विपादश्चतुष्पदः पशूनुप जीवन्त्यृतुना
 प्रेष्येति षट् कृत्व आहर्तुभिरिति चतुर्द्विः पुनर् ऋतुना ऽऽहा
 ऽऽक्रमणमेव तथ् सेतुं यजमानः कुरुते सुवर्गस्य लोकस्य समष्ट्यै
 नान्यो ऽन्यमनु प्र पद्येत यदन्यो ऽन्यमनुप्रपद्येतर्तुर् ऋतुमनु
 प्रपद्येतर्तवो मोहुकाः स्युः- [] 11

TS 6.5.3.4

प्रसिद्धमेवा-द्ध्वर्युर्दक्षिणेन प्र पद्यते प्रसिद्धं प्रतिप्रस्थातोत्तरेण
 तस्मादादित्यः षण्मासो दक्षिणेनैति षडुत्तरेणो-पयामगृहीतो ऽसि
 सꣳसर्पो ऽस्यꣳहस्पत्याय त्वेत्याहास्ति त्रयोदशो मास इत्याहुस्तमेव
 तत् प्रीणाति ॥ 12

(को - जीवन्ति द्विः - स्यु - श्रुतुस्त्रिꣳशच्च) (A3)

TS 6.5.4.1

सुवर्गाय वा एते लोकाय गृह्यन्ते यदृतुग्रहा ज्योतिरिन्द्राग्नी
 यदैन्द्राग्नमृतुपात्रेण गृह्णाति ज्योतिरेवास्मा उपरिष्ठाद्-दधाति
 सुवर्गस्य लोकस्यानुख्यात्या ओजोभृतौ वा एतौ देवानां यदिन्द्राग्नी

यदैन्द्रा॑ग्नो॑ गृ॒ह्यत॑ ओज॒ ए॒वाव॑ रुन्धे वैश्व॒देव॑ꣳ शुक्र॒पात्रेण॑
 गृ॒ह्णाति॑ वैश्व॒देव्यो॑ वै प्र॒जा अ॒सावा॑दि॒त्यः शु॒क्रो यद्-वैश्व॒देव॑ꣳ
 शु॒क्रपा॑त्रेण॑ गृ॒ह्णाति॑ तस्मा॑दसा॒वादि॒त्यः- [] 13

TS 6.5.4.2

सर्वाः॑ प्र॒जाः प्र॒त्यङ्कु॑देति॒ तस्मा॑त् सर्व॑ ए॒व म॑न्यते मां प्र॒त्युद॑गा॒दिति॑
 वैश्व॒देव॑ꣳ शु॒क्रपा॑त्रेण॑ गृ॒ह्णाति॑ वैश्व॒देव्यो॑ वै प्र॒जास्तेजः॑ शु॒क्रो यद्-
 वैश्व॒देव॑ꣳ शु॒क्रपा॑त्रेण॑ गृ॒ह्णाति॑ प्र॒जास्वे॒व तेजो॑ दधाति ॥ 14

(तस्मा॑दसा॒वादि॒त्य - स्त्रि॑ꣳश॒च्च) (A4)

TS 6.5.5.1

इन्द्रो॑ मरु॒द्भिः साँ॑विद्येन॒ माद्ध्य॑न्दिने॒ सव॑ने वृ॒त्रम॑हन्. यन्माद्ध्य॑न्दिने॒
 सव॑ने मरु॒त्वती॑या गृ॒ह्यन्ते॑ वार्त्र॒घ्ना ए॒व ते य॑जमानस्य गृ॒ह्यन्ते॑ तस्य॑
 वृ॒त्रं ज॒घ्नुष॑ ऋ॒तवो॑ ऽमु॒ह्यन्थ॑स ऋ॒तुपा॑त्रेण॑ मरु॒त्वती॑यानगृ॒ह्णात् ततो॑ वै
 स ऋ॒तून् प्रा॑जानाद्-यद्दृ॒तुपा॑त्रेण॑ मरु॒त्वती॑या गृ॒ह्यन्त॑ ऋ॒तूनां॑ प्र॒जात्यै॑
 वज्रं॑ वा ए॒तं य॑जमानो॒ भ्रातृ॑व्याय॒ प्र हर॑ति॒ यन्मरु॒त्वती॑या उदे॒व
 प्र॒थमे॑न- [] 15

TS 6.5.5.2

यच्छति प्र हरति द्वितीयेन स्तृणुते तृतीयेनाऽऽयुधं वा एतद्-यजमानः
स७ स्कुरुते यन्मरुत्वतीया धनुरेव प्रथमो ज्या द्वितीय इषुस्तृतीयः
प्रत्येव प्रथमेन धत्ते वि सृजति द्वितीयेन विद्ध्यति
तृतीयेनेन्द्रो वृत्रं हत्वा परां परावत-मगच्छ-दपाराधमिति मन्यमानः
स हरितो ऽभवत् स एतान् मरुत्वतीया-नात्मस्परणा-नपश्यत्
तानगृह्णीत- [] 16

TS 6.5.5.3

प्राणमेव प्रथमेना-स्पृणुतापानं द्वितीयेनाऽऽत्मानं तृतीयेनाऽऽत्मस्परणा
वा एते यजमानस्य गृह्यन्ते यन्मरुत्वतीयाः प्राणमेव प्रथमेन स्पृणुते
ऽपानं द्वितीयेनाऽऽत्मानं तृतीयेनेन्द्रो वृत्रमहन् तं देवा अब्रुवन् महान्.
वा अयमभूद्-यो वृत्रमवधीदिति तन्महेन्द्रस्य महेन्द्रत्वं
स एतं माहेन्द्र-मुद्धार-मुदहरत वृत्रं हत्वा ऽन्यासु देवतास्व ()
धि यन्माहेन्द्रो गृह्यत उद्धारमेव तं यजमान उद्धारते ऽन्यासु प्रजास्वधि
शुक्रपात्रेण गृह्णाति यजमानदेवत्यो वै माहेन्द्रस्तेजः शुक्रो

यन्माहेन्द्र॑ शुक्रपात्रेण॑ गृह्णाति॑ यजमान॑ एव तेजो॑ दधाति ॥ 17

(प्रथमेना॑ - गृह्णीत॑ - देवता॑स्व - षावि॑शतिश्च) (A5)

TS 6.5.6.1

अदि॑तिः पु॒त्रका॑मा सा॒द्ध्येभ्यो॑ दे॒वेभ्यो॑ ब्रह्मौ॒दन-म॑पचत् तस्या॑
उ॒च्छे॑षण-मददु॒-स्तत् प्रा॑श्नाथ् सा रेतो॑ ऽधत्त॑ तस्यै॑ चत्वार॑ आदित्या॑
अजा॑यन्त सा द्वि॒तीयम॑पचथ् सा ऽम॒न्यतो॑च्छे॒षणान्म॑ इमे॒ ऽज॑त
यदग्रै॑ प्राशि॒ष्यामी॒तो मे॒ वसी॑या॒सो ज॑निष्यन्त॒ इति॑ सा ऽग्रे॑ प्राश्नाथ्
सा रेतो॑ ऽधत्त॑ तस्यै॑ व्यृद्ध-माण्ड॑मजायत॒ साऽऽदि॒त्येभ्य॑ एव-[] 18

TS 6.5.6.2

तृ॒तीयम॑पचद्-भोगाय॑ म इ॒दं श्रान्त॑मस्त्विति॒ ते ऽब्रु॑वन् वरं॑ वृ॒णाम॑है
यो ऽतो॑ जायाता॒ अस्माक॑स्य॒ स एको॑ ऽसद्-यो॑ ऽस्य॒ प्रजा॑यामृद्ध्यता॑
अस्माकं॑ भोगाय॑ भवादिति॒ ततो॑ वि॒वस्वाना॑दित्यो॒ ऽजा॑यत॒ तस्य॑ वा
इ॒यं प्र॒जा यन्म॑नु॒ष्यास्ता॑स्वेक॒ एव॑र्द्धो॒ यो य॑जते॒ स दे॒वानां॑ भोगाय॑
भवति॑ दे॒वा वै य॒ज्ञाद्- [] 19

TS 6.5.6.3

रु॒द्र-म॒न्त-रा॒यन्त् स आ॒दि॒त्या॒न॒न्वा॒क्र॒म॒त॒ ते द्वि॒दे॒व॒त्या॒न् प्रा॒प॒द्यन्त॒
 तान् न॒ प्र॒ति प्रा॒य॒च्छन् तस्मा॒दपि॒ व॒द्ध्यं प्र॒प॒न्नं न॒ प्र॒ति प्र॒ य॒च्छन्ति॒
 तस्मा॑द् द्वि॒दे॒व॒त्यै॑भ्य आ॒दि॒त्यो निर्गृ॑ह्यते॒ यदु॒च्छे॑षणा-दजा॒यन्त॒
 तस्मा॑दु॒च्छे॑षणाद्-गृह्यते॒ तिसृ॑भिर्. ऋ॒ग्भिर्गृ॑ह्णाति॒ मा॒ता पि॒ता
 पु॒त्रस्त॑दे॒व तन्मि॑थु॒नमु॒ल्बं गर्भो॑ ज॒रायु॑ तदे॒व तन्- [] 20

TS 6.5.6.4

मि॒थु॒नं प॒शवो॑ वा ए॒ते यदा॑दि॒त्य ऊ॒र्दधि॑ द॒ध्ना म॑द्ध्यतः
 श्री॑णा॒त्यूर्ज॑मे॒व प॒शूनां॑ म॒द्ध्यतो॑ दधाति॒ शृ॒तात॒ङ्क्ये॑न मे॒द्ध्यत्वाय॑
 तस्मा॑दा॒मा प॒क्वं दु॒हे प॒शवो॑ वा ए॒ते यदा॑दि॒त्यः परि॑श्रित्य॒ गृह्णा॑ति
 प्र॒तिरु॑द्ध्यै॒वास्मै॑ प॒शून् गृह्णा॑ति॒ प॒शवो॑ वा ए॒ते यदा॑दि॒त्य ए॒ष रु॒द्रो
 यद॒ग्निः परि॑श्रित्य॒ गृह्णा॑ति॒ रु॒द्रादे॒व प॒शून्त॑र्दधा- [] 21

TS 6.5.6.5

-त्येष॑ वै वि॒वस्वा॑नादि॒त्यो यदु॑पा॒शु॒स॒वनः॑ स ए॒तमे॒व सो॑मपी॒थं
 परि॑ श॒य आ॑ तृ॒तीय॑स॒वनाद्-वि॒वस्व॑ आदि॒त्यैष॑ ते सो॒मपी॒थ इ॒त्याह॑
 वि॒वस्व॑न्तमे॒वाऽऽदि॒त्यं सो॑मपी॒थेन॑ स-म॒र्दध॑यति॒ या दि॒व्या

वृष्टिस्तया॑ त्वा श्री॒णामी॒ति वृष्टि॑कामस्य श्रीणीयाद्-वृष्टिमे॒वाव रुन्धे॑
यदि॑ ताजक् प्रस्कन्देद्-वर्षु॑कः पर्जन्यः॑ स्याद्-यदि॑ चिर-
मवर्षु॑को न () सादयत्यसन्नाद्धि॑ प्रजाः प्रजायन्ते॑ नानु॑ वषट्करोति॑
यदनु॑वषट्कुर्याद्-रुद्रं॑ प्रजा अन्ववसृजे॑न्न हुत्वा ऽन्वीक्षे॑त यदन्वीक्षे॑त
चक्षुर॑स्य प्रमायु॒कः स्यात् तस्मान्ना॑न्वीक्ष्यः ॥ 22

(एव - यज्ञा - ज्जरायु तदेव तद् - न्तर्दधाति - न -

सप्तविंशतिश्च) (A6)

TS 6.5.7.1

अन्तर्या॑मपात्रेण॑ सावि॒त्रमा॒ग्रय॑णाद्-गृह्णाति॑ प्रजापति॒र्वा एष॑
यदा॑ग्रयणः॑ प्र॒जानां॑ प्र॒जन॑नाय न सादयत्यसन्नाद्धि॑ प्रजाः प्रजायन्ते॑
नानु॑ वषट् करोति॑ यदनु॑वषट्कुर्याद्-रुद्रं॑ प्रजा अन्ववसृजे॑देष वै
गाय॑त्रो दे॒वानां॑ यथ् सवि॒तैष गाय॑त्रियै लोके॑ गृह्यते॑ यदा॑ग्रय॒णो
यदन्तर्या॑मपात्रेण॑ सावि॒त्रमा॒ग्रय॑णाद्-गृह्णाति॑ स्वादे॒वैनं॑ योने॒र्निर्गृ॑ह्णाति॑
विश्वे॑- [] 23

TS 6.5.7.2

दे॒वास्तृ॒तीय॑ꣳ स॒वनं॑ नो॒दय॑च्छन् ते स॒वितारं॑ प्रा॒तस्स॒वनभा॑गꣳ
सन्तं॑ तृ॒तीयस॒वनम॒भि पर्य॑णयन् ततो॒ वै ते तृ॒तीय॑ꣳ स॒वनमु॑दयच्छन्
यत् तृ॒तीयस॒वने सा॑वि॒त्रो गृ॒ह्यते॑ तृ॒तीयस्य॑ स॒वनस्यो॑द्यत्यै
स॒वितृ॑पा॒त्रेण॑ वै॒श्वदे॒वं क॒लशा॑द्-गृ॒ह्णाति॑ वै॒श्वदे॒व्यो वै प्र॒जा वै॒श्वदे॒वः
क॒लशः॑ स॒विता॑ प्र॒स॒वाना॑मी॒शे यथ् स॒वितृ॑पा॒त्रेण॑ वै॒श्वदे॒वं क॒लशा॑द्-
गृ॒ह्णाति॑ स॒वितृ॑प्र॒सूत॑ ए॒वास्मै॑ प्र॒जाः प्र- [] 24

TS 6.5.7.3

ज॒नय॑ति॒ सोमे॑ सोम॒मभि॑ गृ॒ह्णाति॑ रे॒त ए॒व तद्-द॑धाति॒ सुश॑र्मा॒ ऽसि
सुप्र॑ति॒ष्ठान॒ इत्या॑ह सोमे॒ हि सोम॑-म॒भिगृ॑ह्णाति॒ प्रति॑ष्ठित्या ए॒तस्मिन्
वा अ॒पि ग्र॑हे॒ मनु॑ष्यै॒भ्यो दे॒वेभ्यः॑ पि॒तृभ्यः॑ क्रि॒यते सु॑शर्मा॒ ऽसि
सुप्र॑ति॒ष्ठान॒ इत्या॑ह मनु॑ष्यै॒भ्य ए॒वैते॑न करोति बृ॒हदि॑त्याह दे॒वेभ्य
ए॒वैते॑न करोति॒ नम॑ इत्याह पि॒तृभ्य॑ ए॒वैते॑न करोत्ये () ता॒वती॑ वै
दे॒वता॑स्ता॒भ्य ए॒वैनꣳ सर्वा॑भ्यो गृ॒ह्णात्ये॑ष ते यो॒निर्वि॑श्वै॒भ्यस्त्वा दे॒वेभ्य
इत्या॑ह वै॒श्वदे॒वो ह्ये॑षः ॥ 25

(विश्वे - प्र - पितृभ्य एवैतेन करोत्ये - कान्नविश्रुतिश्च) (A7)

TS 6.5.8.1

प्रा॒णो वा ए॒ष यदु॒पा॒शु-र्यदु॒पा॒शुपा॒त्रेण॑ प्रथ॒मश्चो॒त्तमश्च॑ ग्र॒हौ
 गृ॒ह्येते॑ प्रा॒णमे॒वानु॑ प्र॒यन्ति॑ प्रा॒णम॒नूद्-यन्ति॑ प्र॒जाप॒तिर्वा ए॒ष यदा॑ग्र॒यणः॑
 प्रा॒ण उ॒पा॒शुः प॒त्नीः प्र॒जाः प्र॒ जन॑यन्ति यदु॒पा॒शुपा॒त्रेण॑
 पा॒त्नीव॑तमा॒ग्र॒यणाद्-गृ॒ह्णाति॑ प्र॒जानां॑ प्र॒जन॑नाय॒ तस्मात् प्रा॒णं प्र॒जा
 अनु॑ प्र॒ जाय॑न्ते दे॒वा वा इ॒तइ॒तः प॒त्नीः सु॒वर्ग- [] 26

TS 6.5.8.2

ँलो॒कम॑जिगा॒सन् ते सु॒वर्गं॑ ँलो॒कं न प्रा॑जा॒नन् त ए॒तं
 पा॒त्नीव॑तमप॒श्यन् तम॑गृ॒ह्णत॑ ततो॒ वै ते सु॒वर्गं॑ ँलो॒कं प्रा॑जा॒नन् यत्
 पा॒त्नीव॑तो गृ॒ह्यते॑ सु॒वर्ग॑स्य॒ लोक॑स्य॒ प्र॒जात्यै॑ स सोमो॒ नाति॑ष्ठत॒ स्त्रीभ्यो॑
 गृ॒ह्यमा॑णस्तं घृ॒तं व॑ज्रं कृ॒त्वाऽध॑नन् तं निरि॒न्द्रियं॑ भू॒तम॑गृ॒ह्णन् तस्मा॑त्
 स्त्रि॒यो निरि॑न्द्रि॒या अ॑दायादी॒रपि॑ पा॒पात् पु॒स उप॑स्ति॒तरं- [] 27

TS 6.5.8.3

ँव॑दन्ति यद्-घृ॒तेन॑ पा॒त्नीव॑त॒ श्रीणा॑ति॒ वज्रे॑णै॒वैनं॑ ँव॒शे कृ॒त्वा
 गृ॒ह्णा-त्यु॑प॒याम॑गृ॒हीतो॑ऽसीत्याहे॒यं वा॑ उप॒याम॑स्तस्मादि॒मां

प्रजा अनु प्र जायन्ते बृहस्पतिसुतस्य त इत्याह ब्रह्म वै देवानां
 बृहस्पतिर्ब्रह्मणैवास्मै प्रजाः प्र जनयतीन्दो इत्याह रेतो वा

इन्द्रू रेत एव तद्-दधातीन्द्रियाव इ- [] 28

TS 6.5.8.4

-त्याह प्रजा वा इन्द्रियं प्रजा एवास्मै प्र जनयत्यग्ना(3)

इत्याहाग्निर्वै रेतोधाः पत्नीव इत्याह मिथुनत्वाय सजूर्देवेन त्वष्ट्रा
 सोमं पिबेत्याह त्वष्टा वै पशूनां मिथुनानां रूपकृद्-रूप-मेव
 पशुषु दधाति देवा वै त्वष्टार-मजिघासन्थ् स पत्नीः प्रापद्यत तं
 न प्रति प्रायच्छन् तस्मादपि- [] 29

TS 6.5.8.5

वद्ध्यं प्रपन्नं न प्रति प्र यच्छन्ति तस्मात् पत्नीवते त्वष्ट्रे ऽपि गृह्यते
 न सादयत्यसन्नाद्धि प्रजाः प्रजायन्ते नानु वषट् करोति
 यदनुवषट्कुर्याद् -रुद्रं प्रजा अन्ववसृजेद्-यन्नानुवषट्कुर्या-दशान्त-
 मग्नीथ् सोमं भक्षयेदुपाश्वनु वषट् करोति न रुद्रं प्रजा अन्ववसृजति
 शान्तमग्नीथ् सोमं भक्षयत्यग्नी-त्रेष्टु-रूपस्थमा सीद- [] 30

TS 6.5.8.6

नेष्टः॑ पत्नी॑-मु॒दानये॒त्याहा॑-ग्नी॒देव॑ नेष्ट॑रि॒ रेतो॑ दधा॑ति॒ नेष्टा॑
 पत्न्या॑-मु॒द्गात्रा॑ सं ख्या॑पयति॒ प्रजा॑पति॒र्वा ए॒ष यदु॑द्गा॒ता प्र॒जानां॑
 प्र॒जन॑नायाप॒ उप प्र॑ वर्तयति॒ रेत॑ ए॒व तथ्॑ सिञ्च॑त्यूरु॒णोप॑ प्र
 वर्तय॑त्यूरु॒णा हि॑ रेतः॑ सिच्य॑ते॒ नग्नं॑कृत्यो-रु-मु॒प प्र॑ वर्तयति॒ यदा॑
 हि॒ नग्न॑ ऊ॒रुर्भव॑त्यथ॒ मिथु॑नी () भवतोऽथ॑ रेतः॑ सिच्य॑ते ऽथ॑ प्र॒जाः
 प्र॒ जाय॑न्ते ॥ 31

(पत्नीः॑ सु॒वर्ग - मु॒प॑स्ति॒तर - मि॒न्द्रिया॑व इत्य - पि - सीद -
 मिथु॑न्य - षौ च) (A8)

TS 6.5.9.1

इन्द्रो॑ वृ॒त्रम॑हन् तस्य॑ शी॒र्षक॑पाल-मु॒दौब्ज॑थ् स द्रो॑णकल॒शो ऽभव॑त्
 तस्मा॑त् सोमः॑ सम॒स्रव॑थ् स हा॑रियो॒जनो॑ ऽभव॑त् तं व्य॑चिकि॒त्स-
 ज्जु॑हवा॒नी(३) मा॑ हौषा(३)मि॒ति सो॑ ऽम॒न्यत॑ यद्बो॒ष्याम्या॑म॒ हौष्या॑मि
 यन्न॑ हौष्या॑मि य॒ज्ञवेश॑सं॒ करि॑ष्यामीति॒ तम॑दि॒ध्रय॑त॒ होतु॑
 सो॑ ऽग्नि॑-र॒ब्रवी॑न्न म॒य्याम॑ हौष्य॒सीति॑ तं धा॒नाभि॑-र॒श्रीणा॑त्-[] 32

TS 6.5.9.2

तञ् शृतं भूतमजुहोद्-यद्-धानाभिर्. हारियोजनञ् श्रीणाति शृतत्वाय
 शृतमेवैनं भूतं जुहोति बह्वीभिः श्रीणात्येतावती-रेवास्या-मुष्मिन्
 लोके कामदुघा भवन्त्यथो खल्वाहुरेता वा इन्द्रस्य पृञ्जयः
 कामदुघा यद्धारियोजनीरिति तस्माद्-बह्वीभिः श्रीणीयादृख्सामे वा
 इन्द्रस्य हरी सोमपानौ तयोः परिधय आधानं यदप्रहृत्य परिधी-
 ज्जुहुया-दन्तराधानाभ्यां- [] 33

TS 6.5.9.3

घासं प्र यच्छेत् प्रहृत्य परिधीञ्जुहोति निराधानाभ्यामेव घासं प्र
 यच्छत्युन्नेता जुहोति यातयामेव ह्येतर्ह्यदध्वर्युः स्वगाकृतो
 यदध्वर्युर्जुहुयाद्-यथा विमुक्तं पुनर्युनक्ति तादृगेव तच्छीर्ष-
 न्नाधिनिधाय जुहोति शीर्षतो हि स समभवद्-विक्रम्य जुहोति
 विक्रम्य हीन्द्रो वृत्रमहन्थ् समृद्ध्यै पशवो वै हारियोजनीर्यथ्
 संभिन्धादल्पा- [] 34

TS 6.5.9.4

ए॒नं प॒शवो॑ भु॒ञ्जन्त॑ उप॒ तिष्ठे॒रन्॒. यन्न॑ सं॒भिन्द्याद्-ब॒हव॑ ए॒नं
 प॒शवो॑ ऽभु॒ञ्जन्त॑ उप॒ तिष्ठे॒रन्॒ मनसा॑ सं॒ बाधत॑ उ॒भयं॑ करोति॒ ब॒हव॑
 ए॒वैनं॑ प॒शवो॑ भु॒ञ्जन्त॑ उप॒ तिष्ठन्त॑ उ॒न्नेतर्यु॑प॒हव॑-मि॒च्छन्ते॒ य ए॒व
 तन्न॑ सोमपी॒थस्तमे॒वाव॑ रुन्धत॒ उत्तर॑वेद्यां॒ नि व॑पति॒ प॒शवो॑ वा उत्तर॑वेदिः
 प॒शवो॑ हा॒रियो॒जनीः॑ प॒शुष्वे॒व प॒शून्॒ प्रति॑ ष्ठापयन्ति () ॥ 35

(अ॒श्रीणा॑ - द॒न्तरा॑धानाभ्या - म॒ल्याः॑ - स्थापयन्ति) (A9)

TS 6.5.10.1

ग्र॒हान्॒ वा अनु॑ प्र॒जाः प॒शवः॑ प्र॒ जायन्त॑ उपा॒श्वन्तर्या॑-माव॒जावयः॑
 शु॒क्राम॒न्थिनौ॑ पु॒रुषा॑ ऋ॒तुग्र॒हा-ने॑कशफा आ॒दित्य॑ग्र॒हं गा॒व
 आ॒दित्य॑ग्र॒हो भू॒यिष्ठा॑भिर्. ऋ॒ग्भिर्गृ॑ह्यते॒ तस्माद्-गा॒वः प॒शूनां॑
 भू॒यिष्ठा॑ यत् त्रि-रु॒पांशु॑ ह॒स्तेन॑ वि॒गृह्णा॑ति॒ तस्माद् द्वौ त्री॑नजा
 ज॒नय॑त्यथावयो॒ भूय॑सीः पि॒ता वा ए॒ष यदा॑ग्रयणः पु॒त्रः क॒लशो॑
 यदा॑ग्रयण॒ उप॒दस्ये॑त् क॒लशा॑द्-गृ॒ह्णीया॑द्-यथा पि॒ता- [] 36

TS 6.5.10.2

पु॒त्रं क्षि॒त उप॒धाव॑ति ता॒दृगे॒व तद्-यत् क॒लश॑ उप॒दस्ये॑-दाग्र॒यणाद्-
 गृ॒ह्णीयाद्-यथा पु॒त्रः पि॒तरं॑ क्षि॒त उप॒धाव॑ति ता॒दृगे॒व तदा॒त्मा वा
 ए॒ष य॒ज्ञस्य॑ यदाग्र॒यणो॑ यद्-ग्र॒हो वा क॒लशो॑ वोप॒दस्ये॑-दाग्र॒यणाद्-
 गृ॒ह्णीयादा॒त्मन॑ ए॒वाधि॑ य॒ज्ञं निष्क॑रोत्यवि॒ज्ञातो॒ वा ए॒ष गृ॒ह्यते॑
 यदाग्र॒यणः॑ स्था॒ल्या गृ॒ह्णाति॑ वाय॒व्येन॑ जु॒होति॑ तस्माद्- [] 37

TS 6.5.10.3

ग॒र्भेणा॑वि॒ज्ञातेन॑ ब्र॒ह्महा॑ ऽव॒भृथ॑मव॒ यन्ति॑ परा॒ स्था॒लीर॑स्यन्त्युद्-
 वाय॒व्यानि॑ हर॒न्ति तस्मा॑त् स्त्रि॒यं जा॒तां परा॑ ऽस्यन्त्युत् पु॒माँस॑
 हर॒न्ति यत् पु॒रोरु॑चमाह॒ यथा॑ वस्य॒स आ॒हरति॑ ता॒दृगे॒व तद्-यद्-ग्र॑हं
 गृ॒ह्णाति॑ यथा॒ वस्य॑स आ॒हृत्य॑ प्रा॒ऽऽह॑ ता॒दृगे॒व तद्-यत् सा॒दय॑ति यथा
 वस्य॑स उप॒निधा॑या-प॒क्राम॑ति ता॒दृगे॒व तद् यद् () वै य॒ज्ञस्य॑ सा॒म्ना
 यजु॑षा क्रि॒यते॑ शिथि॒लं तद्-यद्-चा॑ तद् दृ॒ढं पु॒रस्ता॑दुप॒यामा॑ यजु॑षा
 गृ॒ह्यन्त॑ उप॒रिष्ठा॑-दुप॒यामा॑ ऋ॒चा य॒ज्ञस्य॑ धृ॒त्यै ॥ 38

(यथा॑ पि॒ता-तस्मा॑-द॒पक्राम॑ति ता॒दृगे॒व तद् य-द॒ष्टाद॑श च) (A10)

TS 6.5.11.1

प्रान्यानि पात्राणि युज्यन्ते नान्यानि यानि पराचीनानि प्रयुज्यन्तेऽमुमेव
 तैर्लोकमभि जयति पराडिव ह्यसौ लोको यानि पुनःप्रयुज्यन्त
 इममेव तैर्लोकमभि जयति पुनः पुनरिव ह्ययं लोकः प्रान्यानि
 पात्राणि युज्यन्ते नान्यानि यानि पराचीनानि प्रयुज्यन्ते तान्यन्वोषधयः
 परा भवन्ति यानि पुनः- [] 39

TS 6.5.11.2

प्रयुज्यन्ते तान्यन्वोषधयः पुनरा भवन्ति प्रान्यानि पात्राणि युज्यन्ते
 नान्यानि यानि पराचीनानि प्रयुज्यन्ते तान्यन्वारण्याः पशवो ऽरण्यमप
 यन्ति यानि पुनः प्रयुज्यन्ते तान्यनु ग्राम्याः पशवो ग्राममुपावयन्ति
 यो वै ग्रहाणां निदानं वैद निदानवान् भवत्याज्यमित्युक्थं तद्-वै
 ग्रहाणां निदानं यदुपाशु शसति त- [] 40

TS 6.5.11.3

-दुपाश्वन्तर्यामयो-र्यदुच्चै-स्तदितरेषां ग्रहाणामेतद्-वै ग्रहाणां
 निदानं य एवं वैद निदानवान् भवति यो वै ग्रहाणां मिथुनं वैद
 प्र प्रजया पशुभिर्मिथुनैर्जायते स्थालीभिरन्ये ग्रहा गृह्यन्ते वायव्यैरन्य

ए॒तद्-वै॑ ग॒र्हाणां॑ मि॒थुनं॑ य॒ एवं॑ वै॒द प्र॑ प्र॒जया॑ प॒शुभिर्मि॑थु॒नैर्जा॑यत
इन्द्र॑स्त्वष्टुः सोम॑मभीष॒हा ऽपि॑ब॒थ् स वि॒ष्वङ्- [] 41

TS 6.5.11.4

॥
व्या॑र्च्छ॒थ् स आ॒त्मन्ना॒रम॑णं॒ नावि॑न्द॒थ् स ए॒तान॑नु॒सवनं॑
पु॒रोडा॑शा॒नप॑श्यत् तान् नि॒रव॑पत् तै॒र्वै स आ॒त्मन्ना॒रम॑ण-म॒कुरु॑त्
तस्मा॑दनु॒सवनं॑ पु॒रोडा॑शा॒ निरु॑प्यन्ते॒ तस्मा॑दनु॒सवनं॑ पु॒रोडा॑शानां॒
प्रा॒ञ्जीया॑दा॒त्म-न्ने॒वाऽऽर॑मणं॒ कुरु॑ते॒ नैन॑ꣳ सोमो॑ ऽति॒ पव॑ते
ब्र॒ह्मवा॑दि॒नो व॑दन्ति॒ नर्चा॑ न य॒जुषा॑ प॒ङ्क्ति॑रा॒प्यते॑ऽथ॒ किं () य॑ज्ञस्य॒
पा॒ङ्कत्व॑मि॒ति धा॒नाः क॑रं॒भः परि॑वा॒पः पु॒रोडा॑शः प॒यस्या॑ तेन॒
प॒ङ्क्ति॑रा॒प्यते॑ तद्-य॒ज्ञस्य॑ पा॒ङ्कत्वं॑ ॥ 42 (भव॑न्ति॒ यानि॒ पुनः॑-शꣳस॑ति
त-द्वि॒ष्वङ् - किं - चतु॑र्दश॒ च) (A11)

Prasna Korvai with starting Padams of 1 to 11 Anuvaakams :-

(इन्द्रो वृत्राया - ऽऽयुर्वे - यज्ञेन - सुवर्गा - येन्द्रो मरुद्धि -
रदिति - रन्तर्यामपात्रेण - प्राण उपाञ्शु पात्रे - णेन्द्रो वृत्रमहन्
तस्य - ग्रहान् - प्रान्या - न्येकादश)

Korvai with starting Padams of 1, 11, 21 Series of Panchaatis :-

(इन्द्रो वृत्राय - पुनर्. ऋतुनाऽऽह - मिथुनं पशवो -
नेष्टः पत्नी - मुपाञ्श्वन्तर्यामयो - द्विचत्वारिञ्शत्)

First and Last Padam of Fifth Prasnam of 6th Kandam

(इन्द्रो वृत्राय - पाङ्कत्वं)

॥ हरिः ओं ॥

॥ कृष्ण यजुर्वेदीय तैत्तिरीय संहितायां षष्ठकाण्डे पञ्चमः प्रश्नः

समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

6.6 षष्ठकाण्डे षष्ठः प्रश्नः – सोममन्त्रब्राह्मणनिरूपणं

TS 6.6.1.1

सुवर्गाय॑ वा ए॒तानि॑ लो॒काय॑ हू॒यन्ते॑ यद्-दाक्षि॑णानि॒ द्वाभ्यां॑
 गार्.ह॑पत्ये जुहोति॒ द्विपाद्-यज॑मानः॒ प्रतिष्ठि॑त्या आग्नी॑द्ध्रे
 जुहोत्यन्तरि॑क्ष ए॒वा ऽऽक्र॑मते॒ सदो ऽभ्यै॑ति सुवर्ग॑मेवैनं॒ लोकं॑ गमयति
 सौरी॑भ्यामृ॒ग्भ्यां गार्.ह॑पत्ये जुहोत्यमु॒मेवैनं॑ लोकं॒ समारो॑हयति
 नयव॑त्यर्चा ऽऽग्नी॑द्ध्रे जुहोति सुवर्ग॑स्य लो॒कस्या॒भिनी॑त्यै दि॒वं गच्छ॑
 सुवः॑ प॒तेति॑ हिरण्यं- [] 1

TS 6.6.1.2

हु॒त्वोद्-गृ॑ह्णाति सुवर्ग॑मेवैनं॒ लोकं॑ गमयति॒ रूपेण॑ वो
 रूप॑मभ्यैमीत्याह॒ रूपेण॑ ह्यासां॒ रूप॑मभ्यैति॒ यद्विर॑ण्येन॒ तुथो॑ वो
 विश्व॑वेदा॒ वि भज॑त्वित्याह॒ तुथो॑ ह॒ स्म वै विश्व॑वेदा॒ देवानां॑ दक्षि॒णा
 वि भज॑ति तेनै॒वैना॒ वि भज॑त्येतत् ते॒ अग्ने॑ राध- [] 2

TS 6.6.1.3

ऐति सोमच्युतमित्याह सोमच्युत७ ह्यस्य राध ऐति तन्मित्रस्य पथा
 नयेत्याह शान्त्या ऋतस्य पथा प्रेत चन्द्र दक्षिणा इत्याह सत्यं वा
 ऋत७ सत्येनैवैना ऋतेन वि भजति यज्ञस्य पथा सुविता
 नयन्तीरित्याह यज्ञस्य ह्येताः पथा यन्ति यद्-दक्षिणा

॥
 ब्राह्मणमद्य राद्ध्यास- [] 3

TS 6.6.1.4

मृषिमार्षेयमित्याहैष वै ब्राह्मण ऋषिमार्षेयो यः शुश्रुवान्
 तस्मादेवमाह वि सुवः पश्य व्यन्तरिक्षमित्याह सुवर्गमेवैनं
 लो०कं गमयति यतस्व सदस्यैरित्याह मित्रत्वायास्मद्वात्रा देवत्रा
 गच्छत मधुमतीः प्रदातारमा विशतेत्याह वयमिह प्रदातारः
 स्मो० ऽस्मानमुत्र मधुमतीरा विशतेति- [] 4

TS 6.6.1.5

वावैतदाह हिरण्यं ददाति ज्योतिर्वै हिरण्यं ज्योतिरेव पुरस्ताद्-धत्ते
 सुवर्गस्य लोकस्यानुख्यात्या अग्नीधे ददात्यग्निमुखानेवर्तून् प्रीणाति
 ब्रह्मणे ददाति प्रसूत्यै होत्रे ददात्यात्मा वा एष यज्ञस्य

यद्धो॒ता ऽऽत्मान॑मेव॒ यज्ञ॑स्य॒ दक्षि॑णाभिः॒ सम॑र्द्धयति ॥ 5

(हिरण्य॑ - रा॒थो - रा॒ध्यास - म॒मुत्र॑ म॒धु॑मती॒रा वि॑शतेत्य -
ष्टात्रि॑श्च) (A1)

TS 6.6.2.1

समि॑ष्टयजू॒षि जु॑होति॒ यज्ञ॑स्य॒ समि॑ष्व्यै॒ यद्-वै॑ य॒ज्ञस्य॑ क॒रं
यद्-विलि॑ष्टं॒ यद॑त्येति॒ यन्ना॑त्येति॒ यद॑तिक॒रोति॒ यन्ना॑पि॒ करो॑ति
तदे॒व तैः॑ प्री॒णाति॒ नव॑ जु॒होति॒ नव॑ वै पु॒रुषे॑ प्रा॒णाः पु॒रुषे॑ण॒ यज्ञः॑
समि॑तो॒ यावा॑ने॒व य॒ज्ञस्तं॑ प्री॒णाति॒ षड् ऋ॑ग्मियाणि॒ जुहो॑ति
षड्वा॑ ऋ॒तव॑ ऋ॒तूने॑व प्री॒णाति॒ त्री॑णि॒ यजू॒षि- [] 6

TS 6.6.2.2

त्रय॑ इ॒मे लो॒का इ॒माने॑व॒ लोकान्॑ प्री॒णाति॒ यज्ञ॑ य॒ज्ञं ग॑च्छ॒ यज्ञ॑पतिं
गच्छे॑त्याह॒ यज्ञ॑पति॒मेवैनं॑ गमयति॒ स्वां यो॑निं॒ गच्छे॑त्याह॒ स्वामे॑वैनं
यो॑निं॒ गम॑यत्येष॒ ते य॒ज्ञो य॒ज्ञप॑ते॒ सह॑सू॒क्तवा॑कः सु॒वीर॑ इत्याह
यज॑मान॒ एव॑ वी॒र्यं॑ दधाति॒ वासि॑ष्ठो॒ ह सा॑त्यह॒व्यो दे॑वभा॒गं प॑प्रच्छ
यथ् सृ॑ञ्जयान् बहु॒याजि॑नोऽयी॒यजो॑ य॒ज्ञे- [] 7

TS 6.6.2.3

य॒ज्ञं प्र॒त्यति॑ष्ठि॒पा(३) य॒ज्ञप॒ता(३)वि॒ति स॒ हो॒वाच॑ य॒ज्ञप॒तावि॑ति
स॒त्याद्-वै॑ सृ॒ञ्जयाः॑ प॒रा ब॒भूवु॑रिति हो॒वाच॑ य॒ज्ञे वा॒व य॒ज्ञः प्र॒तिष्ठा॑प्य
आ॒सीद्-य॑ज॒मान॒स्या-प॑राभा॒वाये॒ति दे॒वा गा॑तु॒विदो॑ गा॒तुं वि॒त्त्वा गा॑तु
-मि॒तेत्या॑ह॒ य॒ज्ञ ए॒व य॒ज्ञं प्र॒ति ष्ठा॑पयति॒ यज॑मान॒स्या-प॑राभा॒वाय ॥ ८

(यजू॑षि - य॒ज्ञ - एक॑च॒त्वारि॑श॒च्च) (A2)

TS 6.6.3.1

अ॒वभृ॑थ॒यजू॑षि जु॒होति॑ य॒देवा॑र्वा॒चीन॒-मेक॑हा॒यना॑दे॒नः क॒रोति॑
तदे॒व तै॑र॒व य॑ज॒ते ऽपो॑ऽवभृ॑थ-म॒वैत्य॑फ॒सु वै व॑रुणः सा॒क्षादे॒व
व॑रुण॒मव॑ य॒जते॑ व॒र्त्मना॑ वा अ॒न्वित्य॑ य॒ज्ञं र॑क्षा॒सि जि॑घा॒सन्ति॑
सा॒म्ना प्र॑स्तो॒ता ऽन्व॑वैति॒ साम॑ वै र॒क्षोहा॑ र॒क्षसा॑म॒पहत्यै॑ त्रि॒र्निध॑नमु॒पैति॑
त्रय॑ इ॒मे लो॒का ए॒भ्य ए॒व लो॒केभ्यो॑ र॒क्षा- [] ९

TS 6.6.3.2

-स्य॑प॒ हन्ति॑ पु॒रुषः॑पु॒रुषो॑ नि॒धन॑मु॒पैति॑ पु॒रुषः॑पु॒रुषो॑ हि र॒क्षस्वी॑
र॒क्षसा॑म॒पहत्या॑ उ॒रुं हि॑ राजा व॒रुणश्च॑का॒रेत्या॑ह॒ प्र॒तिष्ठि॑त्यै श॒तं
ते॑ राज॒न् भि॑ष॒जः स॒हस्र॑मित्या॒ह भे॑ष॒जमे॒वास्मै॑ क॒रोत्य॑भि॒ष्ठितो॑

वरुणस्य पाश इत्याह वरुणपाशमेवाभि तिष्ठति बर्.हिरभि
जुहोत्याहुतीनां प्रतिष्ठित्या अथो अग्निवत्येव जुहोत्यपबर्.हिषः

प्रयाजान्- [] 10

TS 6.6.3.3

यजति प्रजा वै बर्.हिः प्रजा एव वरुणपाशान्-मुञ्चत्याज्यभागौ
यजति यज्ञस्यैव चक्षुषी नान्तरेति वरुणं यजति वरुणपाशादेवैनं
मुञ्चत्यग्नीवरुणौ यजति साक्षादेवैनं वरुणपाशान् मुञ्चत्य-
पबर्.हिषावनूयाजौ यजति प्रजा वै बर्.हिः प्रजा एव वरुणपाशान्-
मुञ्चति चतुरः प्रयाजान्. यजति द्वावनूयाजौ षट्थं सं पद्यन्ते

षड्वा ऋतव- [] 11

TS 6.6.3.4

ऋतुष्वेव प्रति तिष्ठ-त्यवभृथ-निचङ्कुणेत्याह यथोदितमेव वरुणमव
यजते समुद्रे ते हृदय-मफस्वन्तरित्याह समुद्रे ह्यन्तर्वरुणः सं त्वा
विश-न्त्वोषधी-रुताऽऽप इत्याहाद्भि-रेवैनमोषधीभिः सम्यञ्चं दधाति
देवीराप एष वो गर्भ इत्याह यथायजुरेवैतत् पशवो वै- [] 12

TS 6.6.3.5

सोमो॑ यद्-भि॒न्दूनां॑ भ॒क्षये॑त् प॒शुमान्थ्-स्याद्-वरु॑ण-स्त्वे॒नं
 गृ॒ह्णीयाद्-यन्न॑ भ॒क्षये॑दप॒शुः स्या॒न्नैनं॑ वरु॑णो गृ॒ह्णीया-दुप॒स्पृश्य॑मे॒व
 प॒शुमान् भ॑वति॒ नैनं॑ वरु॑णो गृ॒ह्णाति॑ प्र॒तियु॑तो वरु॑णस्य॒ पाश॑ इत्या॒ह
 वरु॑णपाशादे॒व निर्मु॑च्यते ऽप्र॒तीक्ष॑मा यन्ति॒ वरु॑णस्यान्त॒र्हि॒त्या
 ए॒धो॑ ऽस्ये॒धिषी॑महीत्या॒ह समि॑धै॒वाग्निं॑ नम॒स्यन्त॑ () उ॒पाय॑न्ति
 तेजो॑ ऽसि॒ तेजो॑ मयि॒ धेही॑त्या॒ह तेज॑ ए॒वाऽऽत्म॑न् ध॒त्ते ॥ 13

(रक्षा॑सि - प्र॒याजा - नृ॒तवो - वै - नम॑स्यन्तो

- द्वा॒दश॑ च) (A3)

TS 6.6.4.1

स्फ्ये॑न वे॒दिमु॑द्भन्ति॒ रथा॑क्षेण॒ वि मि॑मी॒ते यू॒पं मि॑नोति॒ त्रिवृ॑तमे॒व
 वज्र॑ सं॒भृत्य॑ भ्रा॒तृव्या॑य प्र॒ हर॑ति॒ स्तृत्यै॑ यदन्त॒र्वेदि॑
 मि॒नुयाद्-दे॑वलोकम॒भि ज॑येद्-यद्-ब॒हिर्वे॑दि॒ मनु॑ष्यलोकं
 वै॒द्यन्त॑स्य॒ सन्धौ॑ मि॒नोत्यु॑भयो॒-लो॒कयो॑-र॒भिजि॑त्या॒ उप॑रस॒मितां॑
 मि॒नुयात् पितृ॑लोककामस्य॒ रश॑नस॒मितां॑ मनु॑ष्यलोककामस्य

च॒षाल॑स॒मि॒ता-मि॒न्द्रि॒यका॑मस्य॒ सर्वा॑न्त् स॒मान् प्र॑ति॒ष्ठाका॑मस्य॒ ये
त्रयो॑ म॒द्ध्यमा॑स्तान्त् स॒मान् प॒शुका॑मस्यै॒तान्. वा- [] 14

TS 6.6.4.2

अनु॑ प॒शव॑ उप॒ तिष्ठ॑न्ते प॒शुमा॑नेव॒ भव॑ति॒ व्यति॑षजे॒दित॑रान् प्र॒जयै॑वैनं
प॒शुभिर्व्य॑तिष॒जति॒ यं का॑मये॒त प्र॒मायु॑कः स्या॒दिति॑ गर्त॒मितं॑ तस्य॒
मि॒नुया॑दु॒त्तरा॑र्द्ध्यं॒ व॒र्षि॒ष्ठम॑थ॒ ह॒सीया॑ऽस॒मेषा॑ वै गर्त॒मिद्-य॑स्यै॒वं
मि॒नोति॑ ता॒जक् प्र॑ मी॒यते॑ दक्षि॒णार्द्ध्यं॑ व॒र्षि॒ष्ठं मि॒नुया॑थ्
सु॒वर्ग॑का॒मस्या॑थ॒ ह॒सीया॑ऽस-मा॒क्रम॑णमे॒व तथ्॑ से॒तुं य॑ज॒मानः॑
कुरु॑ते सु॒वर्ग॑स्य॒ लोक॑स्य॒ सम॑ष्ट्यै- [] 15

TS 6.6.4.3

यदे॑कस्मिन् यूपे॒ द्वे र॑शने॒ परि॒व्यय॑ति॒ तस्मा॑दे॒को द्वे॒ जाये॑ वि॒न्दते॒
यन्नै॑काऽर॒शनां॑ द्वयो॒र्. यूप॑योः परि॒व्यय॑ति॒ तस्मान्नै॑का॒ द्वौ प॑ती॒ विन्द॑ते
यं का॑मये॒त स्त्र्य॑स्य॒ जाये॑तेत्यु॒पान्ते॑ तस्य॒ व्यति॑षजे॒थ् स्त्र्यै॑वास्य॒
जाय॑ते॒ यं का॑मये॒त पु॑मानस्य॒ जाये॑तेत्या॒न्तं तस्य॒ प्र वै॑ष्टयेत्
पु॒माने॑वास्य- [] 16

TS 6.6.4.4

जा॒य॒ते ऽसुरा॑ वै दे॒वान् दक्षि॑णत॒ उपा॑नयन् तान् दे॒वा उप॑शयेनै॒वापा॑-
 नुद॑न्त॒ तदु॑पशयस्यो-पशय॒त्वं यद्-दक्षि॑णत॒ उप॑शय॒ उप॑शये
 भ्रातृ॑व्यापनु॒त्यै सर्वे॑ वा अ॒न्ये यू॒पाः पशु॑मन्तो ऽथो॒पशय॑
 ए॒वाप॑शुस्तस्य॒ यज॑मानः पशु॒र्यन्न॑ निर्दि॒शेदार्ति॑-मा॒च्छेद्-
 यज॑मानो ऽसौ ते पशु॒रिति॑ निर्दि॒शेद्-यं द्वि॒ष्याद्-यमे॒व- [] 17

TS 6.6.4.5

द्वेष्टि॑ तमस्मै पशुं॑ निर्दि॒शति॑ यदि न द्वि॒ष्यादा॒खुस्ते॑ पशु॒रिति॑ ब्रूयान्न
 ग्राम्या॑न् पशून्. हि॒नस्ति॑ नाऽऽर॒ण्यान् प्र॒जाप॑तिः प्र॒जा अ॑सृजत
 सो ऽन्नाद्ये॑न॒ व्यार्द्ध्यत॑ स ए॒तामे॑काद॒शिनी॑-मपश्यत् तया॒ वै
 सो ऽन्नाद्य॑मवा॒रुन्ध॑ यद्-दश॒ यूपा॑ भवन्ति॒ दशा॑क्षरा॒ विरा॑डन्नं॒ विरा॑ड्
 विरा॑जैवा-न्नाद्य॑मव॒ रुन्धे॑- [] 18

TS 6.6.4.6

य ए॒काद॑शः स्तन॑ ए॒वास्यै॑ स दु॒ह ए॒वैनां॑ तेन॒ वज्रो॑ वा ए॒षा सं
 मी॑यते॒ यदे॑काद॒शिनी॑ से॒श्वरा॑ पु॒रस्ता॑त् प्र॒त्यञ्चं॑ य॒ज्ञं सम्म॑र्दितो॒र्यत्
 पा॒त्नीव॑तं॒ मि॒नोति॑ य॒ज्ञस्य॑ प्र॒त्युत्त॑ब्धयै॒ सय॑त्वाय॑ ॥ 19

(वै-सम॑ष्व्यै - पु॒माने॑वा॒स्य - यमे॒व - रु॒न्धे - त्रि॑ञ्श॒च्च) (A4)

TS 6.6.5.1

प्र॒जाप॑तिः प्र॒जा अ॑सृ॒जत॑ स रि॒रिचा॑नो ऽम॒न्यत॑ स ए॒तामे॑का॒दशि॑नी-
मप॑श्यत् तया॒ वै स आ॑यु॒रिन्द्रि॑यं वी॒र्य॑मा॒त्मन्न॑धत्त प्र॒जा इ॒व ख॒लु वा
ए॒ष सृ॑जते॒ यो य॑जते॒ स ए॒तर्हि॑ रि॒रिचा॑न इ॒व य॑देषै॒काद॑शिनी
भव॑त्यायु॒रेव॑ तयै॒न्द्रि॑यं वी॒र्यं॑ य॒जमान॑ आ॒त्मन् ध॑त्ते प्रै॒वाऽऽग्ने॑येन
वाप॑यति मिथु॒नञ् सार॑स्व॒त्या क॑रोति॒ रेतः॑- [] 20

TS 6.6.5.2

सौ॒म्येन॑ द॒धाति॑ प्र॒ जन॑यति॒ पौष्णे॑न॒ बार्ह॑स्प॒त्यो भ॑वति॒ ब्रह्म॑
वै दे॒वानां॑ बृ॒हस्प॑तिर्ब्रह्म॒णैवा॑स्मै प्र॒जाः प्र॑ जन॒यति॑ वैश्व॒देवो॑ भ॒वति॑
वैश्व॒देव्यो॑ वै प्र॒जाः प्र॒जा ए॒वास्मै॑ प्र॒ जन॑यती-न्द्रि॒यमे॒वैन्द्रे॑णाव
रु॒न्धे वि॑शं॒ मारु॑तेनौ॒जो ब॑लमै॒न्द्राग्ने॑न॒ प्रस॑वाय॒ सावि॑त्रो॒ निर्व॑रुण॒त्वाय॑
वा॒रुणो॑ म॒द्ध्यत॑ ऐ॒न्द्रमा॑ ल॒भते॑ म॒द्ध्यत॑ ए॒वेन्द्रि॑यं य॒जमाने॑
द॒धाति॑- [] 21

TS 6.6.5.3

पु॒रस्ता॑दै॒न्द्रस्य॑ वै॒श्वदे॒वमा॑ ल॒भते॑ वै॒श्वदे॒वं वा॑ अ॒न्नम॒न्नमे॒व
 पु॒रस्ता॑द्-ध॒त्ते तस्मा॑त् पु॒रस्ता॑द॒न्नम॒द्यत॑ ऐ॒न्द्रमा॒लभ्य॑ मा॒रुत॑मा ल॒भते॑
 वि॒ड् वै म॒रुतो॑ वि॒शमे॒वास्मा॑ अनु॒ बद्ध॑नाति॒ यदि॑ का॒मये॑त यो ऽव॒गतः॑
 सोऽप॑ रु॒द्ध्यतां॑ यो ऽप॒रुद्धः॑ सो ऽव॑ ग॒च्छत्वित्यै॒न्द्रस्य॑ लो॒के वा॑रु॒णमा॑
 ल॒भेत॑ वा॒रुण॑स्य लो॒क ऐ॒न्द्रं- [] 22

TS 6.6.5.4

य॑ ए॒वाव॑गतः सो ऽप॒ रुद्ध्य॑ते यो ऽप॒रुद्धः॑ सो ऽव॑ ग॒च्छति॒ यदि॑
 का॒मये॑त प्र॒जा मु॒ह्येयु॑रिति॒ प॒शून् व्य॑तिष॒जेत् प्र॒जा ए॒व मो॑हयति॒
 यद॑भि॒वाह॑तो ऽपां॑ वा॒रुण॑मा॒लभेत॑ प्र॒जा व॑रु॒णो गृ॑ह्णीयाद्-दक्षि॒णत॑
 उद॑ञ्च॒मा ल॒भते॑ ऽप॒वाह॑तो ऽपां॑ प्र॒जाना॑-मव॒रुण॑ग्राहाय ॥ 23

(रेतो - यजमाने दधाति - लोक ऐन्द्रं - सप्तत्रिंशच्च) (A5)

TS 6.6.6.1

इ॒न्द्रः प॒त्निया॑ म॒नु-म॑याज॒यत् तां॑ प॒र्यग्निकृ॑ता-मु॒दसृ॑जत् तया
 म॒नुरा॑र्द्ध॒नोद्-यत्॑ प॒र्यग्निकृ॑तं पा॒त्नीव॑त-मु॒थ्सृ॑जति॒ यामे॒व म॒नुर्.
 ऋ॒द्धिमा॑र्द्ध॒नोत् तामे॒व य॑ज॒मान॑ ऋ॒द्धोति॑ य॒ज्ञस्य॑ वा अ॒प्रति॑ष्ठिताद्-

य॒ज्ञः॑ प॒रा भ॒वति॑ य॒ज्ञं प॒राभ॒वन्तं॑ य॒ज॒मा॒नो ऽनु॑ प॒रा भ॒वति॑ यदाज्येन
 पा॒नी॒व॒त् स॒॒स्था॒प॒यति॑ य॒ज्ञस्य॑ प्र॒ति॒ष्ठि॒त्यै य॒ज्ञं प्र॒ति॒ति॒ष्ठन्तं॑
 य॒ज॒मा॒नोऽनु॑ प्र॒ति ति॒ष्ठती॒ष्टं व॒प॒या- [] 24

TS 6.6.6.2

भ॒व॒त्य॒नि॒ष्टं॑ व॒श॒या ऽथ॑ पा॒नी॒व॒तेन॑ प्र च॒रति॑ ती॒र्थ ए॒व प्र च॒र॒त्य॒थो
 ए॒तर्ह्ये॒वा॒स्य॑ या॒म-स्त्वा॒ष्ट्रो भ॒वति॑ त्व॒ष्टा वै रे॒त॒सः॑ सि॒क्तस्य॑ रू॒पाणि॑
 वि॒ क॒रोति॑ तमे॒व वृ॒षा॒णं प॒नी॒ष्वपि॑ सृ॒जति॑ सो॒ ऽस्मै॑ रू॒पाणि॑
 वि॒ क॒रोति॑ ॥ 25 (व॒प॒या - ष॒ट्त्रिं॒शच्च) (A6)

TS 6.6.7.1

घ्नन्ति॑ वा ए॒तथ् सो॒मं य॒दभि॒षु॒ण्वन्ति॑ यथ् सो॒म्यो भ॒वति॑ यथा
 मृ॒ता॒या॒नु॒स्तर॑णीं घ्नन्ति॑ ता॒दृ॒गे॒व तद् यदु॒त्तरा॒र्द्धे॑ वा म॒द्ध्ये॑ वा
 जुहु॒याद्-दे॒वता॑भ्यः॑ स॒म॒दं द॒द्ध्याद्-दक्षि॑णा॒र्द्धे जु॒होत्ये॒षा वै
 पि॒तृ॒णां दि॒ख् स्वा॒या॒मे॒व दि॒शि पि॒तृन् नि॒रव॑दयत उ॒द्गा॒तृ॒भ्यो
 हर॑न्ति॑ सा॒मदे॒व॒त्यो वै सो॒म्यो यदे॒व सा॒म॒नः॑ छं॒बट्कु॑र्वन्ति॑ तस्यै॒व
 स शान्ति॑रवे- [] 26

TS 6.6.7.2

-क्षन्ते पवित्रं वै सौम्य आत्मानमेव पवयन्ते य आत्मानं न
परिपश्येदितासुः स्यादभिदिदिं कृत्वा ज्वेक्षेत तस्मिन्. ह्यात्मानं
परिपश्यत्यथो आत्मानमेव पवयते यो गतमनाः स्याथ् सो ज्वेक्षेत
यन्मे मनः परागतं यद्-वा मे अपरागतं ।

राज्ञा सोमेन तद्-वय-मस्मासु धारयामसीति मन एवात्मन्
दाधार- [] 27

TS 6.6.7.3

न गतमना भवत्यप वै तृतीयसवने यज्ञः क्रामतीजाना-
दनीजानमभ्या-ग्नावैष्णव्यर्चा घृतस्य यजत्यग्निः सर्वा देवता
विष्णुर्यज्ञो देवताश्चैव यज्ञं च दाधारोपांशु यजति मिथुनत्वाय
ब्रह्मवादिनो वदन्ति मित्रो यज्ञस्य स्विष्टं युवते वरुणो दुरिष्टं क्व
तर्हि यज्ञः क्व यजमानो भवतीति यन्मैत्रावरुणीं

वशा-मालभते मित्रेणैव- [] 28

TS 6.6.7.4

य॒ज्ञस्य॒ स्विष्ट॑ꣳ श॒मय॑ति॒ वरु॑णेन॒ दुरि॑ष्टं॒ नाऽऽ॒र्तिमा॒च्छति॑ य॒जमा॒नो
यथा॒ वै ला॒ङ्गले॑नो॒र्वरां॑ प्र॒भिन्द॑न्त्येव-मृ॒ख्सा॒मे य॒ज्ञं प्र॒ भिन्तो॑
यन्मै॑त्राव॒रुणीं॑ व॒शा-मा॒लभ॑ते॒ यज्ञा॑यैव प्र॒भिन्ना॑य म॒त्य-म॒न्ववा॑स्यति
शा॒न्त्यै या॑तया॒मानि॒ वा ए॒तस्य॒ छन्दा॑ꣳसि॒ य ई॒जानः॑ छ॒न्दसा॑मेष
रसो॒ यद्-व॒शा यन्मै॑त्राव॒रुणीं॑ व॒शामा॑लभते॒ छन्दा॑ꣳस्येव पु॒नरा
प्री॑णात्य () या॑तया॒मत्वा॒याथो॒ छन्द॑स्स्वेव॒ रसं॑ दधाति ॥ 29

(अ॒व - दा॒धार - मि॒त्रेणै॒व - प्री॑णाति - ष॒ट्च) (A7)

TS 6.6.8.1

दे॒वा वा इ॒न्द्रियं॑ वी॒र्यां॑(1) व्य॑भजन्त॒ ततो॒ यद॑त्यशिष्यत॒ तदति॑ग्राह्या
अ॒भवन्॑ तदति॒ग्राह्या॑णा-मति॒ग्राह्य॑त्वं यदति॒ग्राह्या॑ गृह्यन्त॒ इन्द्रि॑यमेव
तद्-वी॒र्यं॑ य॒जमा॑न आ॒त्मन् ध॑त्ते तेज॒ आग्ने॑येनेन्द्रि॒य-मै॒न्द्रेण॑
ब्र॒ह्मव॑र्चसꣳ सौ॒र्येणो॑प॒स्तंभ॑नं वा ए॒तद्-य॒ज्ञस्य॒ यदति॑ग्राह्याश्च॒क्रे
पृ॒ष्ठानि॒ यत् पृ॑ष्ठे॒ न गृ॑ह्णीयात् प्राञ्चं॑ य॒ज्ञं पृ॒ष्ठानि॒ सꣳ
शृ॒णीयु॑र्यदु॒क्थ्ये- [] 30

TS 6.6.8.2

गृह्णीयात् प्रत्यञ्चं यज्ञमतिग्राह्याः सञ् शृणीयुर्विश्वजिति सर्वपृष्ठे
 ग्रहीतव्या यज्ञस्य सवीर्यत्वाय प्रजापतिर्देवेभ्यो यज्ञान् व्यादिशथ् स
 प्रियास्तनूरप न्यधत्त तदतिग्राह्या अभवन् वितनुस्तस्य यज्ञ इत्याहुर्य-
 स्यातिग्राह्या न गृह्यन्त इत्यप्यग्निष्टोमे ग्रहीतव्या यज्ञस्य सतनुत्वाय
 देवता वै सर्वाः सदृशीरासन् ता न व्यावृत-मगच्छन् ते देवा- [] 31

TS 6.6.8.3

एत एतान् ग्रहानपश्यन् तानगृह्णताऽऽग्नेय-मग्निरैन्द्रमिन्द्रः सौर्यञ्
 सूर्यस्ततो वै ते ऽन्याभि-र्देवताभि-र्व्यावृतमगच्छन्. यस्यैवं विदुष
 एते ग्रहा गृह्यन्ते व्यावृतमेव पाप्मना भ्रातृव्येण गच्छतीमे लोका
 ज्योतिष्मन्तः समावद्वीर्याः कार्या इत्याहुराग्नेयेनास्मिन् लोके
 ज्योतिर्द्धत्त ऐन्द्रेणान्तरिक्ष इन्द्रवायू हि सयुजौ सौर्येणामुष्मिन्
 लोके- [] 32

TS 6.6.8.4

ज्योतिर्द्धत्ते ज्योतिष्मन्तोऽस्मा इमे लोका भवन्ति समावद्वीर्यानेनान्
 कुरुत एतान्. वै ग्रहान् बंबाविश्ववयसा-ववित्तां

ताभ्यामिमे लोकाः पराञ्चश्चार्वाञ्चश्च प्राभुर्यस्यैवं विदुष एते ग्रहा
गृह्यन्ते प्रास्मा इमे लोकाः पराञ्चश्चार्वाञ्चश्च भान्ति ॥ 33

(उक्थ्य- देवा - अमुष्मिन् लोक - एकात्रचत्वारिंशच्च) (A8)

TS 6.6.9.1

देवा वै यद्-यज्ञे ऽकुर्वत तदसुरा अकुर्वत ते देवा अदाभ्ये छन्दाऽसि
सवनानि समस्थापयन् ततो देवा अभवन् परा ऽसुरा यस्यैवं
विदुषो ऽदाभ्यो गृह्यते भवत्यात्मना परा ऽस्य भ्रातृव्यो भवति यद्-वै
देवा असुरा-नदाभ्ये-नादभ्नुवन् तददाभ्यस्या-दाभ्यत्वं य एवं वैद
दभ्नोत्येव भ्रातृव्यं नैनं भ्रातृव्यो दभ्नोत्ये- [] 34

TS 6.6.9.2

-षा वै प्रजापते-रतिमोक्षिणी नाम तनूर्यददाभ्य उपनद्धस्य
गृह्णात्यतिमुक्त्या अति पाप्मानं भ्रातृव्यं मुच्यते य एवं वैद
घ्नन्ति वा एतथ् सोमं यदभिषुण्वन्ति सोमे हन्यमाने यज्ञो
हन्यते यज्ञे यजमानो ब्रह्मवादिनो वदन्ति किं तद्-यज्ञे यजमानः
कुरुते येन जीवन्थ् सुवर्गं लोकमेतीति जीवग्रहो वा एष

यददाभ्यो ऽनभिषुतस्य गृह्णाति () जीवन्तमेवैनं सुवर्गं
 लो॒कं ग॑मयति वि वा ए॒तद्-य॒ज्ञं छि॑न्दन्ति यददाभ्ये स॒-स्था॑पय-
 न्त्यं॒शून॑पि सृ॒जति॑ य॒ज्ञस्य॑ सन्तत्यै ॥ 35

(द॒भ्नो॒त्य - न॑भिषुतस्य गृह्णात्ये - कान्नवि॑शतिश्च) (A9)

TS 6.6.10.1

दे॒वा वै प्र॒बाहु॑ग्-ग्रहा-नगृह्णत स ए॒तं प्र॒जाप॑ति-र॒शु-म॑पश्यत्
 तम॑गृह्णीत तेन वै स आ॒र्द्ध॑नोद्-यस्यै॒वं वि॑दुषो ऽशु-गृह्यत
 ऋ॒र्द्ध॑नोत्ये॒व सकृ॑दभिषुतस्य गृह्णाति सकृ॒द्धि॑ स तेनाऽऽर्द्ध॑नोन्मनसा
 गृह्णाति॑ मन इ॒व हि प्र॒जाप॑तिः प्र॒जाप॑तेराप्त्या औ॒दुंब॑रेण गृह्णात्यूर्वा
 उ॒दुंब॑र ऊ॒र्जमे॑वाव रु॒न्धे च॑तुःस्रक्ति भवति दि॒क्ष्वे- [] 36

TS 6.6.10.2

-व प्रति तिष्ठति यो वा अ॒शो-रा॒यत॑नं वे॒दाऽऽय॑तनवान् भवति
 वाम॑दे॒व्यमि॑ति॒ साम॒ तद्-वा अ॒स्याऽऽय॑तनं मनसा गायमानो
 गृह्णा॑त्या॒यत॑नवाने॒व भव॑ति यद॒र्द्ध्व॑र्यु-र॒शुं गृह्ण॑न् ना॒र्द्धये॑दुभाभ्यां
 न॒र्द्धये॑ता॒र्द्ध्व॑र्यवे च यज॑मानाय च यद॒र्द्धये॑-दुभाभ्या-
 मृ॒द्ध्ये॑तानवानं गृह्णाति सै॒वास्य॑र्द्धिर्. हिर॑ण्यमभि व्यनित्य ()-

मृतं वै हिरण्यमायुः प्राण आयुषैवामृतमभि धिनोति शतमानं भवति
शतायुः पुरुषः शतेन्द्रिय आयुष्येवेन्द्रिये प्रति तिष्ठति ॥ 37

(दिक्ष्व - निति - वि०शतिश्च) (A10)

TS 6.6.11.1

प्रजापति-दे॒वेभ्यो॑ य॒ज्ञान् व्यादि॑शथ् स रि॒रिचानो॑ ऽमन्यत स य॒ज्ञाना॑
षोड॑श॒धेन्द्रि॒यं वी॒र्य॑मा॒त्मान॑मभि समक्खि॒दत् तथ् षो॑ड॒श्यभ॑वन्न वै
षो॑ड॒शी नाम॑ य॒ज्ञो ऽस्ति॑ यद्-वाव षो॑ड॒श॑ स्तोत्र॑ षो॑ड॒श॑ श॒स्त्रं
तेन॑ षो॑ड॒शी तथ् षो॑ड॒शिनः॑ षो॑ड॒शित्वं॑ यथ् षो॑ड॒शी गृ॒ह्यत॑ इन्द्रि॒यमे
व तद्-वी॒र्यं॑ य॒जमान॑ आ॒त्मन् ध॑त्ते दे॒वेभ्यो॑ वै सु॒वर्गो॑

लोको- [] 38

TS 6.6.11.2

न प्रा॑भवत् त ए॒त॑ षो॑ड॒शिन॑मपश्यन् तम॑गृह्णत॒ ततो॑ वै तेभ्यः
सु॒वर्गो॑ लो॒कः प्रा॑भवद्-यथ् षो॑ड॒शी गृ॒ह्यते॑ सु॒वर्ग॑स्य
लो॒कस्या॑भिजित्या॒ इन्द्रो॑ वै दे॒वाना॑मानुजावर॒ आसी॑थ् स

प्र॒जा॒प॒ति॒मु॒पा॒धा॒व॒त् तस्मा॑ ए॒त॒ षोड॑शि॒नं प्रा॒य॒च्छ॒त् तम॑गृ॒ह्णी॒त ततो॑
वै सोऽ॒ग्रं दे॒व॒ता॒नां पर्ये॑द्-यस्यै॒वं वि॒दुषः॑ षोड॒शी गृ॒ह्यते- [] 39

TS 6.6.11.3

ऽग्र॑मे॒व स॒मा॒ना॒नां पर्ये॑ति प्रा॒तस्स॒वने॑ गृ॒ह्णाति॑ वज्रो॒ वै षोड॑शी
वज्रः॑ प्रा॒तस्स॒वने॑ स्वा॒दे॒वैनं॑ यो॒नेर्नि॑गृ॒ह्णाति॑ स॒वने॑स॒वने॑ ऽभि
गृ॒ह्णाति॑ स॒वना॑त्स॒वना॑दे॒वैनं॑ प्र॒ जन॑यति तृ॒तीय॑स॒वने॑ प॒शु॒का॒म॒स्य
गृ॒ह्णी॒याद्-वज्रो॑ वै षोड॒शी प॒श॒व॒स्तृ॒तीय॑स॒वने॑ वज्रे॑णै॒वास्मै॑
तृ॒तीय॑स॒वना॑त् प॒शू॒नव॑ रु॒न्धे नो॑क्थ्ये गृ॒ह्णी॒यात् प्र॒जा वै प॒श॒व
उ॒क्थानि॑ यदु॒क्थ्ये- [] 40

TS 6.6.11.4

गृ॒ह्णी॒यात् प्र॒जां प॒शू॒न॒स्य॑ निर्द॒हे॒दति॑रा॒त्रे प॒शु॒का॒म॒स्य॑ गृ॒ह्णी॒याद्-वज्रो॑
वै षोड॑शी वज्रे॑णै॒वास्मै॑ प॒शू॒नव॑रु॒द्ध्य रा॒त्रि॒योप॑रि॒ष्टा-
च्छ॒म॒य॒त्य॒प्यग्नि॑ष्टो॒मे रा॒ज॒न्य॑स्य गृ॒ह्णी॒याद्-व्या॒वृ॒त्का॑मो॒ हि रा॒ज॒न्यो॑
य॒ज॒ते सा॒ह ए॒वास्मै॑ वज्रं॑ गृ॒ह्णाति॑ स ए॒नं वज्रो॑ भू॒त्या इ॒न्धे निर्वा॑
दह॑-त्ये॒कवि॑श॒ स्तो॒त्रं भ॑वति प्र॒ति॒ष्ठि॒त्यै हरि॑वच्छ॒स्यत॑ इ॒न्द्र॒स्य
प्रि॒यं धा॑मो- [] 41

TS 6.6.11.5

॥
 -पा॒प्नोति॑ क॒नीया॑ऽसि॒ वै दे॒वेषु॑ छ॒न्दा॑ऽस्यास॒न् ज्याया॑ऽ-स्य॒सुरेषु॑
 ते दे॒वाः क॒नीय॑सा॒ छन्द॑सा॒ ज्यायः॑ छ॒न्दो ऽभि॑ व्य॒शऽस॒न् ततो॑ वै
 ते ऽसु॑राणां॒ लो॒कम॑वृ॒ञ्जत॑ यत् क॒नीय॑सा॒ छन्द॑सा॒ ज्यायः॑
 छ॒न्दो ऽभि॑वि॒शऽस॒ति भ्रा॑तृ॒व्यस्यै॑व तल्लो॒कं वृ॑ङ्के षड॒क्षरा॑ण्यति
 रेच॑यन्ति॒ षड् वा ऋ॒तव॑ ऋ॒तूने॑व प्री॒णाति॑ च॒त्वारि॑ पूर्वा॒ण्यव॑
 कल्प॑यन्ति-[] 42

TS 6.6.11.6

चतु॑ष्पद॒ एव॑ प॒शून॑व॒ रुन्धे॑ द्वे॒ उत्तरे॑ द्वि॒पद॑ ए॒वाव॑ रुन्धे
 ऽनु॑ष्टु॒भम॑भि॒ सं पा॑दयन्ति॒ वाग्वा॑ अनु॒ष्टुप् तस्मा॑त् प्रा॒णानां॑
 वा॒गुत्त॑मा॒ समया॑विषि॒ते सूर्ये॑ षोड॒शिनः॑ स्तो॒त्र-मु॒पाक॑रोत्ये॒तस्मिन्
 वै लो॒क इन्द्रो॑ वृ॒त्रम॑हन्थ् सा॒क्षादे॑व वज्रं॒ भ्रातृ॑व्याय
 प्र॒ हर॑-त्यरुणपि॒शङ्गो॑ ऽश्वो॒ दक्षि॑णै॒तद्-वै॑ वज्र॒स्य रू॒पऽस॑मृ॒द्ध्यै ॥ 43

(लो॒को - वि॒दुषः॑ षोड॒शी गृ॒ह्यते॑ - यदु॒क्थ्ये॑ - धाम॑ - कल्प॑यन्ति
 - सप्त॑च॒त्वारि॑ऽशच्च) (A11)

Prasna Korvai with starting Padams of 1 to 11 Anuvaakams :-

(सुवर्गाय॑ यद् दाक्षि॑णानि॑ - समिष्ट॑ यजू॒ - ष्यवभृ॑थ यजू॒षि -
स्फ्ये॑न - प्रजा॑पतिरेकादशिनी॑ - मिन्द्रः॑ पत्न्या॑ - घ्नन्ति॑ - देवा॑
वा इन्द्रि॑यं वीर्यं॑ - देवा॑ वा अदा॑भ्ये - देवा॑ वै प्रबा॑हुक् -
प्रजा॑पतिर्दे॒वेभ्यः॑ स रि॑रिचानः॑ - षोड॑शधैकादश॑)

Korvai with starting Padams of 1, 11, 21 Series of Panchaatis :-

(सुवर्गाय॑ - यजति॑ प्रजाः॑ - सौम्ये॑न - गृह्णी॑यात् प्रत्यञ्चं॑ -
गृह्णी॑यात् प्रजां॑ पशून् - त्रिच॑त्वारिंशत्)

First and Last Padam of sixth Prasnam of 6th Kandam :-

(सुवर्गाय॑ - वज्र॑स्य रूपं॑ समृद्ध्यै॑)

Kaanda Korvai with starting Padams of 6 Prasanams of Kandam 6

(प्राचीनव॒शं - य - च्चा॒त्वा॒ला - द्य॒जे॒ने - न्द्रः -
सुव॒र्गा॒य - षट्)

॥ हरिः ओं ॥

॥ कृष्ण यजुर्वेदीय तैत्तिरीय संहितायां षष्ठकाण्डे षष्ठः प्रश्नः समाप्तः ॥

॥ इति षष्ठं काण्डं ॥

Details of Anuvakam, Panchati and Padam for Kandam 6

	Anuvakam	Panchati	Padams
Prasna 1	11	76	3840
Prasna 2	11	59	3085
Prasna 3	11	62	3155
Prasna 4	11	51	2626
Prasna 5	11	42	2150
Prasna 6	11	43	2125
Total	66	333	16981